

માથ્થી લોખલી હારી ખોબાર પ્રસ્તાવના

માથ્થી લોખલી હારી ખોબાર ઈસુલ ઈસરાયેલ લોકહા ખ્રિસ્તા રુપામાય દેખાડેહે, ઈ ઈસુકોય હારાં કોઅના એને ખારાબ આત્માહાન કાડના, ચ્યા હિકાડના બારામાય, ડોગાવોય ઉપદેશ કોઅના બારામાય (અધ્યાય 5-7), હોરગા રાજ્યા દાખલા દેઅના બારામાય (અધ્યાય 13), એને જૈતુન ડોગાવોય હિકાડના બારામાય લોખલાં હેય. ડોગાવોયને ઉપદેશામાય બોરકાતે વચન 5:18-20, એને પ્રભુ હિકાડલી પ્રાર્થના 6:5-15 બી સામીલ હેય. ઈ ચોપડી મહાન આદેશા 28:18-20 આરે પારવાયેહે, પાછા-પાછા ઓઅનારા પ્રસંગ એને, “હાત સ્નાપિત” વાતહેથી ઈસુ એને ધાર્મિક આગેવાનાહા વોયમાય ટક્કર હેય (અધ્યાય 23). ચાર હારી ખોબારે ચોપડી હારકા, માથ્થી ચોપડી બી ખ્રિસ્તા ત્રીન વોરહા સેવકાઈ એને ચ્યા મોરણા એને મોઅલા માઅને પાછા જીવી ઉઠના બારામાય દિયાન કેન્દ્રિત કોઅહે. માથ્થી ઈ હારી ખોબાર લગભગ ઇસવી સન 50 તે 60 વોયમાય લોખલાં હેય.

ઈસુવા પીડી

(લુક. 3:23-38)

1 ઈ ઈસુ ખ્રિસ્તા આગલ્યા ડાયહા નાંવહા યાદી હેય જીં આબ્રાહામા એને દાઉદ રાજા પીડી હેય.

2 આબ્રાહામા પોહો ઈસાક, ઈસાકા પોહો ચાફૂબ, ચાફૂબા પોહા યહૂદા એને ચ્યા બાહા આતા.

3 યહૂદા પોહા પેરેસ એને ઝેરાહ આતા, એને ચ્યાહા આયહો તામાર આતી, એને પેરેસા પોહો હેસ્રોન, એને હેસ્રોના પોહો એરામ આતો.

4 એને એરામા પોહો અમીનાદાબ, એને અમીનાદાબા પોહો નાહશોન, એને નહશોના પોહો સલમોન આતો.

5 સલમોન એને રાહાબા પોહો બોઆજ આતો, બોઆજ એને રૂથે પોહો ઓબેદ આતો, રૂથ ઓબેદા આયહો આતી, ઓબેદા પોહો યિશૈ આતો.

6 એને યિશૈ પોહો દાઉદ રાજા, એને દાઉદ પોહો સુલેમાન આતો, યે થેએયેથી પોહો જાયો જીં પેલ્લી ઉરીયા થેએ આતી.

7 સુલેમાના પોહો રહાબામ, એને રહાબામા પોહો અબીયા, એને અબીયા પોહો આસા આતો.

8 આસા પોહો યહોશાફાટ આતો, એને યહોશાફાટ પોહો યોરામ, એને યોરામા પોહો ઉજીયા આતો.

9 ઉજીયા પોહો યોથામ, યોથામા પોહો આહાઝ, એને આહાઝા પોહો હિઝકીયા આતો.

10 હિઝકીયા પોહો મનશ્શે, મનશ્શે પોહો આમોન, એને આમોના પોહો યોશિયા આતો.

11 એને યોશિયા યખોન્યા એને ચ્યા બાહાહા આબહા આબહો આતો, યા ઈસરાયેલી લોક બાબેલા ગુલામગીરી માય જાં પેલ્લા જન્માલ યેના.

12 ગુલામ બોનીન બાબેલ માય જાયના સોમાયાથી લેઈને ઈસુવા જન્મા લોગુ, યા ઈસુ આગલ્યાડાયા આતા, યખોન્યા પોહો શાલતીયેલ, એને શાલતીયેલા પોહો ઝરુબાબેલ આતો.

13 ઝરુબાબેલા પોહો અબીહુદ, એને અબીહુદ પોહો એલ્યાકીમ, એને એલ્યાકીમા પોહો અઝોર આતો.

14 અઝોરા પોહો સાદોક, એને સાદોક પોહો અખીમ, એને અખીમા પોહો એલીહુદ આતો.

15 એલીહુદ પોહો એલીયાજર, એલીયાજરા પોહો મથ્યાન, એને મથ્યાના પોહો યાફૂબ આતો.

16 યાફૂબ પોહો યોસેફ, જો મરિયમે માટડો આતો, એને મરિયમે પોહો ઈસુ, જ્યાલ ખ્રિસ્ત આખતેહે.

17 યા પરમાણે આબ્રાહામાથી રાજા દાઉદ લોગુ ચૌવુદ પેડયો આત્યો, એને દાઉદ રાજાથી બાબેલા ગુલામગીરી માય જાઅના પેલ્લા ચૌવુદ પેડયો, એને બાબેલા ગુલામગીરી માય જાયના સમયાથી ખ્રિસ્ત લોગુ ચૌવુદ પેડયો આત્યો.

ઈસુવા જન્મો
(લુક. 2:1-7)

18 ઈસુ ખ્રિસ્તા જન્મો ઓઅના પેલ્લા એહેકેન ઓઅયા, કા જોવે આયહે મરિયમે માગણી યોસેફ આરે ઓઅયી, તોવે એ વોરાડ ઓઅના આ પેલ્લા જોવે તી કુંવારી આતી, તોવે એ પવિત્ર આત્મા સામથ્યા થી. મોયના રિયા.

19 યોસેફ જો મરિયમે આરે માગણી ઓઅલી આતી, તો યોક ન્યાયી માઅહું આતો એને એલ બોદહા હોમ્મે અપમાન કોઅરા નાંચ માગતો આતો, યાહાટી ઠાવકાજ આય એ આરે ઓઅલી માગણી તોડી દેઅના વિચાર કોઅયા (કાહાકા એ વોરાડા પેલ્લા મોયના રીયલા આતા જું નિયમા વિરુદ્ધ આતા).

20 જોવે તો યે વાતે વિચારમાય આતો તોવે પ્રભુ દૂત હોપનામાય યેઇન આખા લાગ્યો કા, “ઓ યોસેફ! દાઉદ રાજા કુળા, તું મરિયમેલ તો થેએ બોનાડા મા બીયહે, કાહાકા જું એ બુકામાય હેય, તી પવિત્ર આત્મા સામથ્યા થી હેતાં.

21 તી યોકા વાહના પોહાલ જન્મો દી એને તું આ નાંવ ઈસુ થોવજે, કાહાકા તો આ લોકહા પાપહા પાયને તારણ કોઅરી!”

22 ઈ બોદા યાહાટી ઓઅયા કા તી પુરાં ઓએ જું પોરમેહેરાય યશાયા ભવિષ્યવક્તા દ્વારા ઈસુ જન્મા બારામાય આખલા આતા, યશાયા ભવિષ્યવક્તાય એહેકેન લોખ્યાં,

23 “એઆ, યોક કુંવારી મોયના ઓઅરી એને યોકા વાહના પોહાલ જન્મો દી આ નાંવ ઈમાનુએલ થોવજા,” જ્યા નાંવા મોતલાબ હેય “પોરમેહેર આપહેઆરે હેય”

24 તોવે યોસેફ નિંદે માઅને જાગીન પ્રભુ દૂતા આગના ઇસાબે આય મરિયમે આરે વોરાડ કોઅઇ લેદા એને એલ આ ગોઅો લેય યેનો.

25 જાવ લોગુ એ પાહાલ જન્મો નાંચ દેનો તાંઉલોગુ આહા બેનહયા શારીરિક સબંધ નાંચ જાયો: એને યુસુફાય આ પોહા નાંવ ઈસુ થોવ્યા.

2

માગી લોકહા યેયના

1 જોવે હેરોદ રાજા યહૂદીયાવોય રાજ કોઅતો આતો, તોવે ઈસુવા જન્મો યહૂદા ભાગા બેથલેહેમ ગાવામાય જાયો, તોવે દિહી ઉદતા એહેરે માગી લોક યેઇન યેરૂસાલેમ શેહેરમાય પુછા લાગ્યા.

2 “તો પોહો કેસ હેય જ્યા યહૂદીયા રાજા બોનાહાટી જન્મો જાયોહો? કાહાકા આમાહાય દિહી ઉદતા એછે આ જન્મા તારો દેખ્યો એને આમા આ ભક્તિ કોઅરા યેનહા.”

3 યહૂદીયા રાજા જન્મા બારામાય વોનાઈન, હેરોદ રાજા એને યેરૂસાલેમ શેહેરમાઅને બોજ લોક ગાબરાય ગીયા.

4 તોવે હેરોદ રાજાય, લોકહા મુખ્ય યાજકાલ એને મૂસા નિયમ હિંકાડનારા ગુરુહુલ ચોકઠા કોઇન પુછ્યાં, “ખ્રિસ્તા જન્મા જાગા બારામાય ભવિષ્યવક્તા કાય આખતાહા?”

5 આહાય આલ જોવાબ દેનો, ખ્રિસ્તા જન્મો યહૂદીયા વિસ્તારા બેથલેહેમ ગાવામાય ઓઅરી, કાહાકા ભવિષ્યવક્તા મીખાથી બોજ પેલ્લા લોખવામાય યેનલા આતા જું પોરમેહેરાય આખલા આતા.

6 “ઓ યહૂદા ભાગા બેથલેહેમ ગાવા લોકહાય, તુમા યહૂદીયા આગેવાનાહામાય બોદહામાય વાહના નાંય હેતા; કાહાકા તુમહેમાય ચોક માઅહું યી જો અધિપતિ બોની, જો મા ઈસરાયેલ દેશા લોકહાહાટી રાખવાળી કોઅરી.”

7 હેરોદ રાજાય આ જન્મો ઓઅલા વાહના પોહા વોરહે જાંઅરા હાટી માગી લોકહાન દોબીન હાદિન આહાન પુછ્યાં કા, તારો નોક્કી કોઅહા સમાયામાય દેખાયો,

8 એને આય ઈ આખીન્ માગી લોકહાન બેથલેહેમ ગાવામાય દોવાડયા, “જાં, આ વાહના પોહા બારામાય નોક્કી રીતે ખોબાર કાડા, એને જોવે તો મિળી જાય તોવે માપાય યા એને પાછે જું કાય તુમાહાય દેખ્યા તીં માન આખા કા આંયબી જાયને આ ભક્તિ કોઉ.”

9 માગી લોક રાજા વાત વોનાઈન જાતા રિયા, એને વાટે ચાલતા આહાય તોજ તારો દેખ્યો જો તારો આહાય દિહી ઉદા એછે દેખ્યેલ, તો તારો આહા આગલા-આગલા હોરફ્યો એને આ જાગાવોય જાયને ઉબો રોય ગીયો જાં વાહનો પોહો આતો.

10 આ તારાલ એઇન બોજ ખુશ ઓઅયા.

11 આહાય આ ગોઆમાય જાયુન્ આ વાહના પોહાલ આ આયહે મરિયમે આરે દેખ્યાં, એને ઉબડા પોડીન આ પોહા પાગે પોડ્યા, એને

પોતે ઠેલ્યો ખોલીન ચ્યાલ હોના, એને લોબાન, એને બોળ બેટ દેના.

12 તોવે હોપનામાય ઈ ચેતાવણી વોનાઈન હેરોદ રાજાપાય પાછા ફિરી નાંચ જાયના, ચ્યાહાય રાજાલ નાંચ આખ્યાં એને બિજ્યે વાટયેથી ચ્યા ચ્યાહા દેશામાય જાતા રિયા.

મિસર દેશામાય જાયના

13 ચ્યા જાતા રિયા ચ્યા પાછે, પ્રભુ ચોક દૂતાય હોપનામાય ચોસેફાલ દેખાઈન આખ્યાં, “ઉઠ! ચ્યા વાહના પોહાલ એને ચ્યા આયહેલ લેઈને મિસર દેશામાય નાહી જો, એને જાવ લોગુ આંચ તુલ નાંચ આખું, તાંવ લોગુ તાંજ રોજે, કાહાકા હેરોદ રાજા ચા વાહના પોહાલ હોદી રિયહો કા તો ચ્યાલ માઆઈ ટાકે.”

14 તોવે તો રાતીજ ઉઠીન વાહના પોહાલ એને ચ્યા આયહેલ લેઈને મિસરમાય ચાલ પોડયો.

15 એને હેરોદ રાજા મોએ તાંવ લોગુ મિસરમાય રિયો ચાહાટી કા જીં વચન પ્રભુય ભવિષ્યવક્તા હોશેથી બોજ પેલ્લા આખ્યેલ તીં પુરાં ઓઈ: “માયે મા પાહાલ મિસર માચને હાધા.” હોશે 11:1

વાહના પાહાહાન માઆઈ ટાકના

16 હેરોદ રાજા ખિજવાય ગીયો જોવે ચ્યાલ લાગ્યા કા માગી લોકહાય ચ્યાઆરે દોગો કોઅયો, ચ્યાય સૈનિકાહાલ દોવાડ્યા બેથલેહેમ ગાવા એને ચ્યા પાહી-પાહીના ઠીકાણાહામાયને બોદા વાહના પોહાહાલ માઆઈ દેય, જ્યે બેન વોરહા એને ચ્યા કોઅતા વાહને આતે, ઈ માગી લોકહાન પેલ્લા તારો દેખાના આધારાવોચ આતા.

17 તોવે જીં વચન ચિર્મયા ભવિષ્યવક્તાથી પોરમેહેરાય આખલા આતા તીં પુરાં ઓઅયા.

18 “રામાહામાય* તાં ચોક બાયે આવાજ વોનાયા ચેનો જીં રોડી રિઅલી આતી,

રોડના એને મોઠો આવાજ,
રાહેલ પોતાના પોહહાહાટી રોડી રિઅલી આતી,
એને તી ઠાવકી નાંચ રા આતી કાહાકા ચ્યે આમી મોઇ ગીઇલે આતે.”

મિસરમાયને પાછા ચેયના

* 2:18 રામાહા ઓ ઓહડો જાગો આતો જાં દાઉદ રાજા કુળા લોક રોતા આતા.

19 યોસેફ, મરિયમ એને ચ્યાહા પોહો ઈસુ આજુ મિસરમાયજ આતો, તોવે હેરોદ રાજા મોરણા પાછે, પ્રભુવા દૂતાય મિસરમાય યોસેફાલ હોપનામાય દેખાડ્યાં એને આખ્યાં,

20 “ઉઠ, પાહા એને ચ્યા આયહેલ લેઈને ઈસરાયેલ દેશ માય જાતો રો, કાહાકા હેરોદ રાજા એને ચ્યા લોક જ્યા વાહના પાહાલ માઆઇ ટાકાં આતા, ચ્યા મોઅઇ ગીયહા”.

21 તો ઉઠયો, એને પોહાલ એને ચ્યા આયહેલ આરે લેઈને મિસર દેશ છોડીન એને ઈસરાયેલ દેશ માય યેનો.

22 બાકી જોવે યોસેફ વોનાઈન અરખિલાઉસ પોતાના આબહાલ હેરોદ રાજા જાગાવોય યહૂદીયા વિસ્તારાવોય રાજ કોઅઇ રિયહો, તાં જાવાથી તો બિઅયો; પાછે હોપનામાય પોરમેહેરથી ચેતાવણી લેઈને ગાલીલ ભાગામાય જાતો રિયો,

23 એને તો નાસરેત ગાવામાય જાયને રિયો, કાહાકા તીં વચન પુરાં ઓઅઇ, જું ભવિષ્યવક્તાહાથી ઈસુ બારામાય આખવામાય ચેનલા “તો નાજરેત ગાવા આખાયી.”

3

બાપતિસ્મા દેનારો યોહાન

(માર્ક 1:1-8; લુક. 3:1-9,15-17; યોહા. 1:19-28)

1 એને ચ્યા દિહીહયામાય યોહાન બાપતિસ્મા દેનારો ચેયન યહૂદીયા વિસ્તારા ઉજાડ જાગામાય જાયને ઈ પ્રચાર કોઅરા લાગ્યો,

2 “પાપ કોઅના છોડી દા, કાહાકા હોરગા રાજ્ય પાહી ચેય ગીયહા.”

3 તો ઓજ હેય જો યશાયા ભવિષ્યવક્તાયેબી જ્યા બારામાય આખલા આતા “ઉજાડ જાગામાય યોહાન બાબલીન આખહે કા પ્રભુ ચેયના વાટ તિયાર કોઆ, ચ્યો વાટયો હિંધો કોઆ જયેહવોયને તો ચેનારો હેય.”

4 ઓ યોહાન ઉટડા બુરા બોનાડલે ફાડકે પોવે, એને કંબરા આરે ચામડા પોટો બાંદે, એને ચ્યા ખાઅના ટોડે એને રાનીમોદ આતા.

5 તોવે યહૂદીયા વિસ્તારામાઅને, એને ચેરૂસાલેમ શેહેરામાઅને, એને ચારદેન નોચે ચોમખી રોનારા લોક નિંગીન ઉજાડ જાગામાય બાપતિસ્મા દેનારા યોહાના સંદેશ વોનાયા ગીયા.

6 જેહેકોય ચ્યાહાય પાપહાલ માની લેદા તોવે યોહાને લોકહાન ચારદેન નોયેમાય બાપતિસ્મા દેના.

7 જોવે યોહાને દેખ્યા પોરૂષી એને સાદૂકી લોક ચ્યાપાય બાપતિસ્મા લાંહાટી ચેય રીયહા, તે ચ્યાય આખ્યાં, તુમા જેરીવાળા હાપડા હારખા ખારાબ હેય, તુમહાન કુંચે પોરમેહેરા ન્યાયામાઅને નાહના ચેતાવણી દેની જો ચેનારો હેય?

8 ચાહાટી એહેકેન જીવા કા લોકહાન ખોબાર પોડે કા તુમાહાય પાપ કોઅના બંદ કોઅઇ દેનહા.

9 એને પોતે મોનામાય એહેકોય નાંચ વિચાર કોઅના કા આબ્રાહામ આપહે આબહો હેય, બાકી આંચ તુમહાન એહેકોય આખતાહાવ કા, પોરમેહેર આબ્રાહામાહાટી ચા દોગડાહા પાયને બી પોહે પૈદા કોઅઇ હોકહે.

10 જેહેકોય ચોક કુરાડાવાળો હારે ફળે નાંચ દેનારા હર ચોક મુળથી જાહાહાલ ખાંડીન આગડામાય ટાકી દાંહાટી તિયાર હેય, તેહેકોયનુજ આમી પોરમેહેર ચ્યાહા ન્યાય કોઅરાહાટી તિયાર હેય, જો પાપ કોઅના બંદ નાંચ કોઅે.

11 “આંચ તે પાઆયાકોય તુમહાન પાપ કોઅના બંદ કોઅરાહાટી બાપતિસ્મા દેતહાવ, બાકી જો મા પાછે ચેનારો હેય, તો મા કોઅતો મહાન ગોત્યેવાળો હેય: આંચ તે ચ્યા ચાકાર બોનીન ચ્યા ખાઅડા હુતળી છોડાબી લાયક્યે નાંચ હેય, એને તો તે તુમહાન પવિત્ર આત્મા એને આગડાકોય બાપતિસ્મા દી.

12 ચ્યા હૂપડાં ચ્યા આથામાય હેય, એને તો ચ્યા ખોળાં હારેકોય ચોખ્યાં કોઅરી, એને ચ્યા ગોંવ તો કોઠારામાય બેગા કોઅરી, બાકી બુહટા નાંચ ઉલાય ઓહડા આગડામાય ટાકીન હોલગાડી દી.”

યોહાનાથી ઈસુવા બાપતિસ્મા

(માર્ક 1:9-11; લુક. 3:21-22)

13 તોવે ચ્યે સમયે ઈસુ ગાલીલ ભાગામાઅને નિંગ્યો એને ચારદેન નોયે મેરાવોય યોહાનાથી બાપતિસ્મા લાંહાટી ચેનો.

14 બાકી યોહાન એહેકેન આખીન ચ્યાલ ઉબો રાખાં લાગ્યો કા, “માન તે તો આથેકોય બાપતિસ્મા લેઅના ગોરાજ હેય, એને તું તે માપાય ચેનહો?”

15 ઈસુવે ચ્યાલ ઓ જાવાબ દેનો કા, “એહેકેન ઓઅરા દે, કાહાકા યે રીતે આમા તીં બોદા કોઅઇ રીયહા જીં પોરમેહેરાલ આમહે થી જોજહે” તોવે, યોહાન ઈસુવાલ બાપતિસ્મા દાંહાટી તિયાર ઓઈ ગીયો.

16 ઈસુ બાપતિસ્મા લેયને તારાતુજ પાઅયામાયને બાઆ નિંગ્યો, અંજ ગેડીયે અં આકાશ ઉગડાં દેખ્યા એને પોરમેહેરા આત્મા કબુતરા રોકા ચ્યાવોય ઉતતા દેખ્યા.

17 હોરગામાઅને પોરમેહેરાય ઈસુ બારામાય આખ્યાં કા, “ઓ મા પ્રિય પોહો હેય, યાથી આંચ ખુશ હેતાંવ.”

4

સૈતાનાથી ઈસુવા પરીક્ષા

(માર્ક 1:12-13; લુક. 4:1-13)

1 તોવે સૈતાનાકોય ઈસુ પરીક્ષા ઓઅે યાહાટી પવિત્ર આત્મા ઈસુલ ઉજાડ જાગામાય લેય ગીયો.

2 એને તાં ચાળહી દિહી એને ચાળહી રાત ખાઅના નાંચ ખાદાં, ચ્યા પાછે ચ્યાલ બુખ લાગી.

3 તોવે સૈતાનાય ચ્યાપાય ચેયન ચ્યાલ આખ્યાં કા, “જો તું પોરમેહેરા પોહો ઓરી, તે આગના દેયને સાબિત કોઅઇ દે કા યા દોગડા બાખ્યો બોની જાય કા તું અંહેલ ખાય હોકે.”

4 ઈસુય જાવાબ દેનો કા, “પવિત્રશાસ્ત્રમાય લોખલાં હેય, કા માઅહું માત્ર બાખ્યે કોયજ નાંચ, બાકી તો પોરમેહેરા આખલા વચનાલ માનીન જીવતો રોય.”

5 તોવે સૈતાન ચ્યાલ પવિત્ર શેહેર યેરૂસાલેમમાય લેય ગીયો એને દેવાળા ઉચે મેરાવોય ઉબો કોઅયો.

6 એને ચ્યાલ આખ્યાં, “જો તું પોરમેહેરા પોહો ઓરી, તે તું પોતે નિચે કુદી પોડ એને સાબિત કોઅઇ દે કા તુલ જખમ નાંચ ઓઅરી, કાહાકા પવિત્રશાસ્ત્રમાય એહેકેન લોખલાં હેય કા, હોરગા દૂતહાલ તોહાટી આગના કોઅરી, એને તો પાગ દોગડાવોય આફળાય નાંચ ચ્યાહાટી ચ્યા આથાવોય જેલી લેઅરી.”

7 ઈસુવે ચ્યાલ આખ્યાં કા, “પવિત્રશાસ્ત્રમાય એહેકેનબી લોખલાં હેય, લોકહાય ચ્યાહા પ્રભુ પોરમેહેરા પરીક્ષા નાંચ કોઅરા જોજે.”

8 તોવે સૈતાન ચ્યાલ યોક બોજ મોઠા ઉચા ડોગાવોચ લેય ગીયો એને દુનિયામાયને બોદે રાજ્યે એને ચ્યા સુંદરતા ચ્યાલ દખાડયે.

9 એને સૈતાનાય ઈસુલ આખ્યાં કા, “જો તું મા પાગે પોડીન ભક્તિ કોઅહે તે આંચ ઈ બોદાજ તુલ દેય દિહી.”

10 તોવે ઈસુવે સૈતાનાલ આખ્યાં, ઓ સૈતાન દુર ઓઅઇ જો, કાહાકા પવિત્રશાસ્ત્રમાય લોખલાં હેય: તું પ્રભુ તો પોરમેહેર ચ્યા પાગે પોડ એને ચોખલા ચ્યાજ ભક્તિ કોઓ.

11 તોવે સૈતાન ઈસુવાલ છોડીન જાતો રિયો, એને હોરગા દૂત ચેયન ચ્યા ચાકરી કોએત.

ઈસુ ગાલીલમાય ચ્યા સેવા સુરુ કોઅહે

(માર્ક 1:14-15; લુક. 4:14-15)

12 જોવે તો વોનાયોકા ચોહાન બાપતિસ્મા દેનારાલ જેલેમાય કોંડી દેનહો, તોવે તો ચહૂદીયા ભાગામાઅને ગાલીલ ભાગામાય જાતો રિયો.

13 એને તો નાજરેત ગાવાલ છોડીન તો કાપરનાહુમ ગાવામાય જો દોરિયા મેરાવોચ જબુલુન એને નાફતાલી ભાગામાય જાયને રા લાગ્યો.

14 ઈ ચાહાટી જાયા કા યશાયા ભવિષ્યવક્તાથી આખલા આતા તીં પુરાં ઓએ.

15 તુમા લોક જ્યા જબુલુન એને નાફતાલી ભાગામાય રોતહા, એને જ્યા ગાલીલ દોરિયા પાહીના એને યારદેન નોયે દિહી ઉઘા મેરાવોચ હેય, ઈ ગાલીલ ભાગા ઓહડો ભાગ હેય તાં અમુક ગેર ચહૂદી લોક રોતાહા.

16 જ્યા લોક પોરમેહેરાલ વોળખ્યા વોગાર આંદારામાય બોઠલા આતા, ચ્યાહાય મોઠો ઉજવાડો દેખ્યો, એને મોરણા છાવડયેમાય બોઠલ આર્તે, ચ્યાહાવોચ ઉજવાડો ચોમક્યો.

17 ચ્યા સોમાયથી ઈસુય પ્રચાર કોઅના શુરવાત કોઅયા, “પાપ કોઅના છોડી દા કાહાકા હોરગા રાજ્ય પાહી ચેય ગીયહા.”

પેલ્લા શિષ્યહાન નિવાડના

(માર્ક 1:16-20; લુક. 5:1-11)

18 પાછે તો ગાલીલ દોરિયા મેરે રોયન જાં આતો તોવે, ચ્યેય પિત્તર આખતેહે તો સિમોન એને ચ્યા બાહા આંદ્રિયા યા બેની બાહાહાલ દોરિયામાય જાળ ટાકતા દેખ્યા; કાહાકા ચ્યા માછલે દોઅનારા આતા.

19 ઈસુવે ચ્યાહાન આખ્યાં, યા તુમા મા શિષ્ય બોના, આમી લોગુ તુમા માછલે દોઅનારા આતા, બાકી આંય તુમહાન હિકાડીહી કા લોકહાન કેહેકેન મા શિષ્ય બોનાડના હેય.

20 તોવે તારાતુજ ચ્યાહાય માછલે દોઅના છોડીન ઈસુવા શિષ્ય બોની ગીયા.

21 ઈસુ એને ચ્યા બેન શિષ્ય દોરિયા મેરે વાહાયોક આગલા ગીયા, ઈસુવે બિજા બેન બાહાહાલ એટલે ચ્યા તે જબદયા પોહા યાકૂબ એને યોહાનાલ ઉડીમાય બોહીન જાળ હાંદતા દેખ્યા, એને ચ્યાય ચ્યાહાલબી હાદ્યા.

22 પાછે ચ્યા તારાત ઉડીલ એને ચ્યા આબહો જબદયાલ છોડીન ગીયા એને ચ્યા ઈસુવા શિષ્ય બોન્યા.

ઈસુ હિકાડેહે, એને માંદા લોકહાન હારેં કોઅહે (લુક. 6:17-19)

23 પાછે ઈસુ બોદા ગાલીલ ભાગામાય ફિરીન એને યહૂદી લોકહા સોબાયે ઠિકાણામાય હિકાડે એને પોરમેહેરા રાજ્યા હારી ખોબાર આખતો એને માઅહામાયને બોદે જાત્યા બિમારી એને ચ્યાહામાઅને નોબળાય દુઉ કોઅતો રિયો.

24 એને બોદા સિરીયા વિસ્તારામાય ચ્યા ખોબાર ફેલાય ગીયી, તોવે જ્યા બિમાર આતા, જ્યાહાલ જુદા-જુદા જાત્યા રોગ એને દુઃખામાય પીડાલા આતા, એને જ્યાહાલ બુત લાગલા એને મિરગ્યે લોખવાવાળે આર્તે, એને ચ્યા બોદહાન ચ્યાહાય ચ્યાપાય લેય યેને એને ચ્યાય ચ્યા બોદા દુખ્યાહાલ હારેં કોઅયે.

25 પાછે ગાલીલ ભાગા દકોપોલીસ, યેરૂસાલેમ શહેર, યહૂદીયા વિસ્તારા એને ચારદેન નોયે ચ્યે મેરેને લોકહા ટોળા-ટોળા ઈસુ પાહાલારે ચાલતા લાગ્યા.

5

ઈસુ ખ્રિસ્તા ડોગાવોયને સંદેશ

(લુક. 6:20-23)

1 ઈસુ આ લોકહા ટોળાલ એઇન ડોગાવોય ચોડી ગીયો, એને જોવે તો હિકાડાંહાટી બોહી ગીયો તોવે આ શિષ્ય આ પાહી યેના.

2 તોવે ઈસુ ઈ આખીન આહાન હિકાડાં લાગ્યો કા:

3 “ધન્ય હેય જ્યા લોક આત્મિક રીતે ગરીબ હેતા, હોરગા રાજ્ય આહા હાટીજ હેય.

4 ધન્ય હેય જ્યે, શોક કોઅતેહે, કાહાકા પોરમેહેર આહાન ઈમાત દેઅરી.

5 ધન્ય હેતેં અયે, જ્યે નમ્ર હેતેં, કાહાકા દોરતી આહા ઓઅરી.

6 ધન્ય હેય અયે, જ્યાહાન ન્યાયપણા જીવન જીવાહાટી મોઠી ઇચ્છા હેય, કાહાકા પોરમેહેર આહાન તૃપ્ત કોઅરી.

7 ધન્ય હેતેં અયે, જ્યે દયાળુ હેતેં, કાહાકા પોરમેહેર આહાવોય દયા કોઅરી.

8 ધન્ય હેય અયે, જ્યાહા મોન ચોખ્ખેં હેતેં, કાહાકા અયે પોરમેહેરાલ એઅરી.

9 ધન્ય હેય અયે, જ્યે ચોકબિજાલ મેળાવનારેં હેય, કાહાકા અયે પોરમેહેરા પોહેં આખાયી.

10 ધન્ય હેય અયે, જ્યે ન્યાયપણા જીવન જીવના લેદે સતાવણી પામતેહેં, કાહાકા હોરગા રાજ્ય આહા હેતાં.

11 ધન્ય હેય તુમા, જોવે લોક તુમહાન મા શિષ્ય હેય, યા લેદે અપમાન કોઅરી, એને સતાવણી કોઅરી એને જુઠા બોલી બોલીન તુમહે વિરુદ્ધમાય બોદી રીતે ખારાબ વાતો આખરી.

12 તોવે આનંદિત એને મગન ઓઅજા, કાહાકા તુમહેહાટી હોરગામાય મોઠી ઇનામ હેય, આહાટી કા આહાય આ ભવિષ્યવક્તાહાન જ્યા તુમહેથી બોજ પેલ્લા આતા આહાન એજ પરમાણે સતાવણી કોઅયી.”

દુનિયા મીઠાં એને દુનિયા ઉજવાડો

(માર્ક 9:50; 4:21; લુક. 14:34-35; 8:16)

13 “તુમા યા દુનિયા લોકહાહાટી મીઠાં રોકે હેય, બાકી જોવે મીઠાં હોવાદવોગાર ઓઅઈ જાય, તોવે ચ્યાલ કોઅહી વસ્તુકોય ખારાં કોઅવામાય યેય? પાછે તીં કાંઈજ કામ નાંય લાગે, સિવાય યા કા ચ્યાલ બાઆ ટાકી દેયના એને માઅહા પાગા તોળે છુંદી દેઅના.

14 તુમા બોદા દુનિયા હાટી ઉજવાડા રોકે હેય, જું શેહેર ડોગાવોય વસલાં હેય તીં દુબી નાંય હોકે.

15 એને લોક દિવો લાવીન ચ્યાલ ટોપલ્યે તોળે નાંય થોવે, બાકી ચ્યાલ દીવત્યાવોય થોવતેહે, તોવે ચ્યા કોઈન બોદા માઅહા લોગુ ઉજવાડો પોઅચી હોકહે.

16 ચ્યાજ પરમાણે તુમહે ઉજવાડો માઅહા હોમ્મે ચોમકે કા ચ્યે તુમહે હારેં કામે એઈન તુમહે પોરમેહેર આબહો, જો હોરગામાય હેય, ચ્યા સ્તુતિ કોઅય.”

નિયમશાસ્ત્રા બારામાય શિક્ષણ

17 “ઈ મા હોમજાહા, કા આંય મૂસા નિયમશાસ્ત્રાલ એને ભવિષ્યવક્તાહા લેખાલ નાશ કોઅરા યેનહો, આંય નાશ કોઅરા નાંય યેનહો, બાકી પુરાં કોઅરા યેનહો.

18 કાહાકા આંય તુમહાન હાચ્યાં આખતાહાવ કા, જાંઉ લોગુ આકાશ એને દોરતી જાતા નાંય રોય એને બોદો ભવિષ્યવાણ્યો પુર્યો નાંઈ ઓઅરી, તાંઉલોગુ નિયમશાસ્ત્રા માઅને ચોક કાનો કા ચોક બિંદુ બી નાંય ઓટી.

19 યાહાટી કા જું કાદાં ચ્યા વાહની સે વાહની આગનામાયને ચોકબી નાંય પાળે, એને તેહેકોયન ચ્યો લોકહાન હિકાડે, તો હોરગા રાજમાય બોદહા કોઅતો વાહનો ગોણાયી, બાકી જો કાદો ચ્યા પાલન કોઅરી એને ચ્યાલ હિકાડી, તો હોરગા રાજ્યામાય મોઠો ગોણાયી.

20 કાહાકા આંય તુમહાન આખતાહાવ કા, જોવે તુમા મૂસા નિયમ હિકાડનારા ગુરુ એને પોરૂષી લોકહા ન્યાયપણા જીવન કોઅતા, તુમહે વોદારી ન્યાયપણા જીવન નાંય ઓઅરી, તે તુમા હોરગા રાજ્યામાય કોવેજ નાંય જાય હોકાહા.”

ગુસ્સો એને માઆઈ ટાકના બારામાય

21 “તુમા વોનાય ચુકલેં હેય, કા પોરમેહેરાય આમે આગલા ડાયા લોકહાન આખલા આતા કા ‘માઆઈ નાંય ટાકના,’ ‘એને જો કાદો માઆઈ ટાકી ચ્યાલ કોચર્યેમાય દોષ પાત્ર ગોણવામાય ચી’.

22 બાકી આંય તુમહાન આખતાહાવ કા જો ચ્યા બાહાવોય ગુસ્સો કોઅરી, ચ્યાલ પોરમેહેર સજા કોઅરી એને કાદો ચ્યા બાહાલ નોકામ્યા આખરી ચ્યાલ યહૂદીયાહા મોઠી સોબાયેમાય સજા કોઅરી; એને જો કાદો આખે ‘ઓ મૂર્ખ’ ચ્યાલ નરકા આગડા સજા દેવામાય ચી.

23 યાહાટી કા જોવે તું પોતાના દાન દેવાળામાય વેઢેવોય લેય યેનો, એને તાં તુલ યાદ યેય, કા કાદા માઆહા તુમહેકોય નુકસાન ઓઅયા.

24 તોવે તું તીં દાન દેવાળામાય થોવી દે, એને જાયને પેલ્લા ચ્યા માઆહા આરે હોમજી લાં જો એને તોવે યેઇન તીં બેટ ચોડાવ.

25 જો તું ફીરાદીવાળા આરે વાટે માંયજ હેય, ચ્યાઆરે જલદી હોમજી લે, એહેકેન નાંય બોના જોજે, કા તુલ તો ફીરાદો ન્યાય કોઅનારાલ હોઅપી દેય, એને ન્યાય કોઅનારો તુલ સીપાડાલ હોઅપી દેય, એને સીપાડા તુલ જેલેમાય કોંડી દેય.

26 આંય તુમહાન હાર્યાં આખતાહાવ કા, જાંઉ લોગુ બોદા પોયહા બોઅઇ નાંય દેય, તાંવ લોગુ તું જેલેમાઅને છુટી નાંય હોકહે.”

વ્યબિચારા બારામાય

27 તુમા જીં આગના આખલી હેય તી વોનાય ચુકલેં હેય કા, વ્યબિચાર મા કોઅહા.

28 બાકી આંય તુમહાન આખતાહાવ કા જો કાદો થેઅયેવોય ખારાબ નોજાર ટાકહે તો ચ્યે આરે પોતાના મોનામાય વ્યબિચાર કોઅઇ ચુકયોહો.

29 જો તો જમણો ડોળો પાપા કારણ બોને, તોવે તું ચ્યાલ કાડીન ટાકી દે, કાહાકા તોહાટી ઈ હારાં હેય કા તો શરીરમાઅને ચોક અવયવ નાશ ઓઅઇ જાય એને તો આખા શરીરાલ બોસામકોળીમાય નાંય ટાકલાં જાય.

30 એને જો તો જમણો આથ પાપા કારણ બોને, તે ચ્યાલ કાપી ટાકીન ટાકી દે, કાહાકા તોહાટી ઈ હારાં હેય કા તો શરીરમાઅને ચોક

અવયવ નાશ ઓઅઇ જાય એને તો આખા શરીરાલ બોસામકોળીમાય નાંય ટાકલાં જાય.

ફારગાત્યે બારામાય

(માથ્થી 19:9; માર્ક 10:11-12; લુક. 16:18)

31 “ઇબી આખવામાય યેનેલ કા જો કાદો પોતે થેઅયેલ ફારગાતી દાં માગહે એલ ફારગાતી દેય.

32 બાકી આંય તુમહાન ઈ આખતાહાવ કા જો કાદો પોતા થેઅયેલ વ્યબિયાર સિવાય કાદા બિજા કારણથી ફારગાતી દેય, તે તો એલ વ્યબિયાર કોઆડેહે, એને જો કાદો ફારગાતી દેનલ્યે આરે વોરાડ કોએ તે તો પોતે વ્યબિયાર કોઅહે.”

કોસામે બારામાય

33 પાછે તુમા વોનાઈ ગીઅલે હેય કા પોરમેહેરેય આગલા ડાયા લોકહાન આખલા આતા કા, જુઠી કોસામ નાંય ખાઅના, બાકી પ્રભુહાટી કોસામ પુરી કોઅના.

34 બાકી આંય તુમહાન ઈ આખતાહાવ કા, કોયદિહી કોસામ નાંય ખાઅના, નાંય હોરગા, કાહાકા તીં પોરમેહેરા સિંહાસન હેય.

35 નાંય દોરત્યે, કાહાકા તીં આ પાગ થોવના જાગો હેય, નાંય યેરૂસાલેમ શેહેર કાહાકા તીં મોઠા રાજા શેહેર હેય.

36 પોતાના ટોલધ્યે બી કોસામ નાંય ખાઅના કાહાકા તું યોક કીદ્યાલ બી ઉજળો નાંય કોઅઇ હોકે, કા નાંય કાળો કોઅઇ હોકતોહો.

37 બાકી તુમહે વાત હાં તે હાં નાંય તે નાંય રા જોજે; કાહાકા જીં કાય આથી વોદારે ઓઅરી તીં જુઠા કામહાથી એટલે સૈતાનથી ઓઅહે.

બદલો નાંય લેઅના

(લુક. 6:27-28,32-36)

38 “તુમા વોનાઈ ગીઇલે હેતેં કા નિયમશાસ્ત્ર માય કાય લોખલાં હેય કા ડોળા બદલે ડોળો, એને દાતા બોદલે દાત.

39 બાકી આંય તુમહાન ઈજ આખતાહાવ કા, દુષ્ટા બોદલો નાંય લેઅના, બાકી જો કાદો તો જમણા ગાલાવોય થાપડે કોઇન ઠોકે, તે બિજો ગાલ બી આઅએ ફીરવી દે.

40 એને જોવે કાદો તોવોય ન્યાયાલયામાય વિરુદ્ધ કોઈન તો ડોગલી માગે તોવે, ચ્યાલ કોટ બી દેય દેઅના.

41 જો કાદો તુલ ચોક કિ. મી. લેય જાંહાટી મજબુર બનાડે, તોવે ચ્યાઆરે તું બેન કિ. મી. દુઉ ચાલી જાજે.

42 જો કાદો તોપાય માગે ચ્યાલ તું દે, એને જો કાદો તોપાય ઉસના માગે ચ્યાલ મુંચ મા ફેરાવતો.”

દુશ્માનાહાવોય પ્રેમ કોઅના

(લુક. 6:27-28)

43 તુમા વોનાય ગીઇલે હેય કા, નિયમશાસ્ત્ર માય કાય લોખલાં હેય, તુમા બીજહા આરે પ્રેમ કોઅજા, એને તુમહે દુશ્માન વોય દુશ્માની કોઅજા.

44 બાકી આંય તુમહાન આખતાહાવ કા, પોતાના દુશ્માનાહાવોય પ્રેમ કોઅજા એને આપહાલ સતાવણી કોઅે ચ્યાહાહાટી પ્રાર્થના કોઅજા,

45 ચ્યાથી તુમા તુમહે હોરગ્યા આબહા પોહા બોનહા કાહાકા પોરમેહેર હારાં એને માઠાં લોકહાવોય દિહી દેહે, એને ન્યાયી એને અન્યાયી લોકહાહાટી પાઆઈ પાડહે.

46 કાહાકા જોવે તુમા તુમહે પ્રેમ રાખનારાહાવોય પ્રેમ રાખહા, તોવે પોરમેહેર ચ્યા પ્રતિક્ષણ નાંય દેય, કાહાકા કર લેનારા બી એહેકેનુજ કોઅતાહા.

47 એને તુમા તુમહે બાહાહાલુજ સલામ કોઅતાહા, તે કોઅહા મોઠા કામ કોઅતાહા? કાહાકા ગેર યહૂદી બી, જ્યા પોરમેહેરા નિયમા પાલન નાંય કોઅે, ચ્યા એહેકેનુજ કોઅતાહા.

48 ચાહાટી તુમા કાયામ તીંજ કોઆ જું હારાં હેય, જેહેકોય તુમહે હોરગામાઅને આબહો જું હારાં હેય તીંજ કોઅહે.

6

દાન દેયના બારામાય

(લુક. 11:2-4)

1 “હાયવીન રા! તુમા લોકહાન દેખાહાહાટી હારેં કામે મા કોઅહા, નાંય તે હોરગામાઅને પોરમેહેરા પાયને કાયબી પ્રતિક્ષણ નાંય મિળી.”

2 “ચાહાટી જોવે તુમા દાન દેય, તોવે મોઠો દેખાવો મા કોઅહા, જેહેકોય ડોંગ્યા સોબાયેહે ઠિકાણાહામાય એને ગલ્યેહેમાય કોઅતાહા, જેથી લોક ચ્યાહા વાહાવા કોઅે, બાકી તુમહાન આંય હાચ્યાં આખતાહાવ કા ચ્યા ચ્યાહા પ્રતિક્ષણ પામી ચુક્યાહા.

3 બાકી તુમા જોવે દાન દાહા તીં એહેકેન દેયના કા કાદાલ ખોબાર નાંય પોડે કા તુયે કાય દેનહા.

4 ચાહાટી કા તો જીં દેનલા દાન દુબલાં રોય, તોવે પોરમેહેર તો આબહો જો ગુપ્તમાય એઅહે તો તુલ પ્રતિક્ષણ દી.”

પ્રાર્થના બારામાય (લુક. 11:1-4)

5 “જોવે તુમા પ્રાર્થના કોઅહા, તોવે તુમા ડોંગ્યાહા રોકા નાંય કોઅના, કાહાકા લોકહાન દેખાડાહાટી ચ્યા લોક સોબાયેહે ઠિકાણામાય એને સોડકેહે ચોકડયેવોય ઉબા રોયન પ્રાર્થના કોઅના ચ્યાહાન હારાં ગોમહે. આંય તુમહાન હાચ્યાંજ આખહુ કા ચ્યા લોક તે ચ્યાહા ઇનામ પામી ચુક્યાહા તી લોકહા વાહવા હેય.

6 બાકી તું જોવે પ્રાર્થના કોઅે, તોવે તો ખોલ્યેમાય જો, એને બાઅણા બંદ કોઇન તો આબહો જો ગુપ્તમાય હેય ચ્યાલ પ્રાર્થના કોઓ, તોવે તો આબહો તુલ ગુપ્તમાયને એઅહે, તુલ પ્રતિક્ષણ દેઅરી.”

7 પ્રાર્થના કોઅતી સમયે ગેર યહૂદી લોકહા રોકા શબ્દાહાલ પાછી-પાછી નાંય બોલના, કાહાકા ચ્યા હુમાજતાહા કા આમા વદારે બોલહુ તોવે તો વોનાઈ.

8 ચ્યાહાટી તુમા ચ્યાહા રોકા મા બોનહા, કાહાકા તુમહાન કોહડા ગોરાજ હેય ઈ તુમહે પોરમેહેર આબહો, તુમા ચ્યાપાય માગા પેલ્લાજ જાંઆઈ લેહે.

9 ચાહાટી તુમા યા પરમાણે પ્રાર્થના કોઆ: ઓ આમે પોરમેહેર આબા, તું જો હોરગામાય હેય, તો નાંવ પવિત્ર માનલા જાય.

10 “તો રાજ્ય યેય, તો મોરજી જેહેકોય હોરગામાય પુરી ઓઅહે તેહેકોય દોરત્યેવોય બી ઓઅય.

11 આમહાન રોજ દિહી ખાઅના દે જું આમહાન ચ્યા દિહા હાટી જોજહે.

12 જેહેકોય જ્યાહાય આમે વિરુદ્ધ પાપ કોઅલા આતાં, ચ્યા વિરુદ્ધ્યાહાલ આમાહાય માફ કોઅયા, તેહેકોય તુંબી આમહે પાપહા માફ કોઓ.

13 આમહાન પરીક્ષામાય મા ટાકહે, બાકી સૈતાના કામહાથી બોચાડ, (કાહાકા રાજ્ય એને પરાક્રમ એને મહિમા ઈ કાયામ તોજ હેય. આમેન.)”

14 “ચાહાટી જોવે તુમા માઅહા પાપ માફ કોઅહા, તોવે પોરમેહેર, તુમહે આબહો જો હોરગામાય હેય, તુમાહાલ માફ કોઅરી.

15 બાકી જોવે તુમા બિજા લોકહાન માફ નાંય કોઅહા, તો તુમહે હોરગામાઅને આબહો બી તુમહે પાપ માફ નાંય કોઅરી.”

ઉપહા બારામાય

16 “જોવે તુમા ઉપહા કોઅે તે ડોંગ્યાહા રોકા તુમહે ચેહેરા નિરાશ મા રાખહા. કાહાકા ચ્યા લોક આમા ઉપહા હેજે એહેકેન આખાડાહાટી ચ્યાહા ચેહેરા ઉતાડતાહા. આંય તુમહાન હાઅ્યાં આખહુ કા ચ્યાહાન ચ્યા ઇનામ મિળી ગીયહા.

17 બાકી જોવે તુમા ઉપહા રાખે તોવે તુમહે ટોલપીલ તેલ લાવા એને તુમહે મું દોવજા.

18 ચાહાટી કા લોક તુમહે ઉપહા નાંય જાંઅે, બાકી તુમહે આબહો જો ગુપ્તમાય હેય, તુમહાન ઉપહા કોઅનારો જાંઅે, તોવે તો આબહો જો ગુપ્તમાય એઅહે, તો તુમહાન પ્રતિફળ દેઅરી.”

દોરત્યેવોય નાંય બાકી હોરગામાય મિલકાત ચોકઠી કોઆ (લુક. 12:33-34; 11:34-36; 16:13)

19 “આપહેહાટી દોરત્યેવોય મિલકાત મા બોઈ થોવહા, કાહાકા જાં ક્રિડે એને કાટ બોગડાવતેહે, એને જાં બાંડ ગુઉ તોડીન ચોરી કોઅઇ લેય જાતાહા.

20 બાકી આપહેહાટી હોરગામાય મિલકાત ચોકઠી કોઆ, જાં ચ્યાલ ઉદાડા નાંય બોગડાવે, એને કાટ નાંય લાગે, એને બાંડ ચેયન ચોરી બી નાંય કોઅે.

21 કાહાકા તો મોન કાયામ તાંજ લાગલા રોય જાં મિલકાત હેય.”

ડોળો શરીરા દિવા હારકો હેય

22 “ડોળો શરીરાહાટી દિવા રોકો હેય: જોવે તો ડોળો ચોખ્ખો રોય, તોવે તો બોદા શરીર ઉજવાડામાય ઓરી.

23 બાકી તો ડોળો ચોખ્ખો નાંચ રોય, તે તો બોદા શરીરમાય આંદારાં ઓરી, યાહાટી જોવે તુમા બુલથી ઈ હુમાજતાહા કા તુમહે મોન ઉજવાડામાય હેય બાકી આસલીમાય આંદારામાય હેય, તે તુમહે આંદારને આંદારાં આસલીમાય બોજ કાળાં હેય.”

કોઅયેહેજ વાતે ચિંતા નાંચ કોઅના

(લુક. 12:22-34)

24 કાદાબી માઅહું યોકાજ સમયે બેન દોણદ્યા ચાકરી નાંચ કોઅે, કાહાકા તો યોકા વિરુદ્ધ કોઅરી ને બિજાલ પ્રેમ કોઅરી, નાયતે યોકા આરે હારો ચાલી, એને બિજા આરે નાંચ હારો ચાલી, તુમા પોરમેહેરા એને મિલકાત યા બેન્યાહા ચાકરી આરેજ નાંચ કોઅઇ હોકે.

25 યાહાટી આંચ તુમહાન આખડુ કા, શારીરિક જીવના ચિંતા મા કોઅહા કા આમા કાય ખાઉ, એને કાય પિયહું, એને નાંચ તે આપહે શરીરા ચિંતા કોઅના, કા આમા કાય પોવહું. કાહાકા જીવન ખાઅનાથી, એને શરીર ફાડકાહા કોઅતા વોદારે કિમત્યા નાંચ હેય કા?

26 આકાશમાઅને ચિડહા એછે નોજાર કોઅયા એ વોઅેત નાંચ, એને વાડેત નાંચ, એને નાયતે કોઠયેમાય થોવેત તેરુંબી તુમહે હોરગામાઅને આબહો ચ્યાહાન ખાવાડેહે, તુમા તે ચ્યાહા કોઅતા બોજ કિમત્યા હેય.

27 કાય તુમહેમાઅને કાદોબી જીવના બારામાય ચિંતા કોઅવાથી પોતે જીવન લાંબાવી હોકહે?

28 “એને ફાડકાહાહાટી કાહા ચિંતા કોઅતાહા? જાડયેમાયને ફૂલજાડવાલ તુમા દિયાન કોઆ, એ કેહેકેન વોદેતેહે, એ કાય મેહનાત નાંચ કોઅેત, એને એ ફાડકે બી નાંચ બોનાડે.”

29 તેરુંબી આંચ તુમહાન આખડુ કા, સુલેમાન રાજાબી ચ્યા ઓલીબોદી મિલકાત આતી તેરુંબી ચ્યાય ચ્યાહા હારકે સુંદર ફાડકે પોવલે નાંચ.

30 જો પોરમેહેર રાનામાઅને ગાહીયા તીં આજે હેય એને કાલે વાડીન આગડામાય ટાકી દી, ઓહડાલ તો હારાં બોનાડેહ તે ઓ વોછો બોરહો થોવનારાહાય, તો હાઅ્યોજ તુમહે દેખભાલ કોઅરી.

31 “ચાહાટી તુમા ચિંતા કોઈન ઈ મા આખહા, કા આમા કાય ખાહું, એને કાય પિયહું, એને કાય પોવહું?

32 કાહાકા ગેર ચહૂદી લોક યો બોદો વાતો હોદતાહા, બાકી તુમહે હોરગામાઅને આબહો જાંઅહે કા તુમહાન ઈ બોદા જોજહે.

33 ચાહાટી તુમહેહાટી પેલ્લા ઈ મોહત્વા હેય કા, પોરમેહેરા રાજ્યા હોદ કોઅરા જોજે એને ન્યાયપણા જીવન જીવા જોજે, તોવે તુમહાન દોરત્યેવોયને બોદા વાના મિળી જાય.

34 ચાહાટી હાકાળ્યા દિહયા બારામાય ચિંતા મા કોઅહા, કાહાકા હાકાળ્યો દિહી આપેજ ચિંતા લી યી, આજ્યા દિહા હાટી આજ્યા દુઃખ બો હેય.”

7

બીજહાવોય દોષ નાંય લાવના
(લુક. 6:37-38,41-42)

1 “તુમા બિજા લોકહાવોય દોષ મા લાવહા, તે તુમાહાવોય બી બિજા લોક દોષ નાંય લાવી.

2 કાહાકા જ્યે પરમાણે તુમા દોષ લાવતેહે, અ્યેજ પરમાણે પોરમેહેર તુમાહાવોય બી દોષ લાવી, એને જ્યે રીતે, તુમા બીજહા ન્યાય કોઅતાહા, તેહેકોયજ પોરમેહેર તુમહે બી ન્યાય કોઅરી.”

3 તું તો બાહા વાહની-વાહની બુલહે ન્યાય કાહા કોઅતોહો, જીં અ્યા ડોળામાઅને કોયરા રોકા હેય, તુલ તો મોઠયો-મોઠયો બુલ્યો નાંય દેખાય?

4 જોવે તો પોતાનાજ જીવનમાય મોઠયો-મોઠયો બુલ્યો હેય, તે તુલ વાહની બુલ કોઅનારા કાદાબી માઅહા ન્યાય નાંય કોઅરા જોજે.

5 ઓ ડોંગી, પેલ્લો તો મોઠયો-મોઠયો બુલ્યો હુદરાવી લે, પાછે તું હારેં રીતે તો બાહા બુલ હુદરાવાહાટી અ્યા મોદાત કોઅય હોકહે.

6 “અ્યા લોકહાન પોરમેહેરા વચન મા આખહા જ્યા અ્યાલ વોનાયા નાંય માર્ગે, જોવે તુમા એહેકન કોઅહા, તે એહેકન ઓઅરી જેહેકોય

ચોખ્ખી વસ્તુ કુત્રહા આગલા ટાકી દેયના, એને ડુકરાહા આગલા મોતી ટાકના કાહાકા ચ્યે પાગહાતોળે ચ્યાહાન છુંદી ટાકી એને પાછે તુમહેવોય હમલો કોઅરી.”

માગના, હોદના, એને ઠોકના
(લુક. 11:9-13)

7 “તુમહાન જીં જોજે તીં પોરમેહેરાપાય માગા એને તો તુમહાન દી; હોદહા તે તુમહાન જોડી, ઠોકહા, તે તુમહેહાટી ઉગાડવામાય ચી.”

8 કાહાકા જો કાદો માગહે, ચ્યાલ મિળહે, એને જો કાદો હોદહે, ચ્યાલ જોડહે, એને જો કાદો ઠોકહે, ચ્યાહાટી ઉગાડી દેવામ ચેહે.

9 “જોવે પોહેં બાખે માગે, તોવે તુમહામાયને કાદો આબહો પોતે પોહાલ દોગડો નાંચ દેય.

10 ચેજ રીતે, જોવે તુમહે પોહેં માછલા માગે, તોવે ચ્યાલ જેરીવાળા હાપડાં નાંચ દેય.

11 એને જોવે તુમા ખારાબ હેય, તેરી તુમા તુમહે પોહાહાન તુમા હાર્યો વસ્તુ દાં જાંઅતેહે, તે તુમહે હોરગામાઅને આબહો બી ચ્યાપાઅને જ્યે માગતેહે ચ્યાહાન હારી વસ્તુ દેઅના જાંઅહે.”

12 ચાહાટી જીં કાય તુમા કોઆડાં માગતેહે કા લોક તુમહેઆરે કોએ, તુમાબી ચ્યાહાઆરે એહેકેનુજ કોઆ, કાહાકા મૂસા નિયમશાસ્ત્ર એને ભવિષ્યવક્તાહા શિક્ષણ બી ઈજ હેય.

હાકડી એને પોઅળી વાટ
(લુક. 13:24)

13 “પોરમેહેરા રાજ્યામાય જાઅના વાટ હાકડા બાઅણા માઅને જાહે, કાહાકા નાશ એછે જાનારા બાઆં પોઅળા હેય, એને ચ્યા વાટ હેલ્લી હેય, એને ચ્યામાઅને માજા જાનારા લોક બોજ હેય.

14 કાહાકા અનંતજીવનામાય જાયના બાઆં હાકડા એને વાટ કોઠણ હેય, એને જ્યાહાન તી વાટ જોડહે ચ્યા વોછાજ હેય.”

જાડ એને ચ્યા ફળ
(લુક. 6:43-44; 13:25-27)

15 જુઠા ભવિષ્યવક્તાહાથી હાયવીન રોયા, જ્યા ગેટાહા વેહે લેઈને તુમહેપાય ચેતાહા, બાકી હકીકત માય આ ફાડી ખાનારા જોનાવરા હારકા હેય.

16 આહા કામહાકોય તુમા આહાન વોળખી લાહા, લોક જાડહા માઅને દારાખે, એને કાટાહા જાડાહા પાયરે અંજીર નાંચ તોડે.

17 એને ચેજપરમાણે હારાં જાડ હારાં ફળ દેહે એને નોકામા જાડ ખારાબ ફળ દેહે.

18 હારાં જાડાલ ખારાબ ફળ નાંચ લાગે, એને નોકામા જાડાલ હારાં ફળ નાંચ લાગે.

19 જી-જી જાડ હારાં ફળ નાંચ દેય, તીં ખાંડીન આગડામાય ટાકી દેવામાય થી, જુઠા ભવિષ્યવક્તાહાલ બી ચેજપરમાણે ડોંડ દી.

20 ચેજપરમાણે તુમા આહા કામહાકોય વોળખી લાહા.

21 “જ્યે માન, ‘ઓ પ્રભુ! ઓ પ્રભુ!’ એહેકેન આખતેહે, આહામાઅને બોદાંજ લોક હોરગા રાજ્યમાય નાંચ જાય હોકી, બાકી તોજ જાય હોકી જો મા હોરગ્યા આબહા મોરજી પરમાણે જીવન જીવહે.

22 એને ન્યાય કોઅના દિહી બોજ લોક માન એહેકેન આખરી, ઓ પ્રભુ, ઓ પ્રભુ, કાય આમહાય તો નાવાકોય ભવિષ્યવાણ્યો કોઅલ્યો, એને તો નાવાકોય બુતાહાલ આમાહાય કાડલા, એને તો નાંવે આમહાય બોજ મોઠે ચમત્કારા કામે કોઅલે.

23 તોવે આંચ આહાન ચોખ્ખાં-ચોખ્ખાં આખહી, કા માયે તુમહાન કોવેજ નાંચ જાંઅયા, ઓ ખારાબ કામ કોઅનારાહાય, મા પાહીને જાતા રોયા.”

બેન ગોએ બાંદનારા
(લુક. 6:47-49)

24 “યાહાટી કા જો કાદો મા ચો વાતો વોનાયને માનહે, તો આ બુદ્ધિવાળા માઅહા રોકો હેય, જ્યાંચ પોતાના ગોઉ ખોલકડાવોય બાંધા.

25 પાછે પાંઈ પોડયો, નયાડો ચેનો એને વેડાં ચેના, એને તીં આ ગોઆલ જાય ઠોકાઈ, તેરુંબી તીં ગોઉ નાંચ પોડ્યા, કાહાકા આ ગોઆ પાયો ખોલકડાવોય બાંદલો આતો.

26 બાકી જો કાદો મા ચો વાતો વોનાયેહે એને નાંચ પાળે, તો ચ્યા મૂર્ખ માઅહા રોકો હેય જ્યેય ચ્યા ગોઉ રેટાવોય બાંધા.

27 પાછે પાંઈ પોડયો, નયાડો યેનો, એને વેડાં યેના, એને ચ્યા ગોઆલ જાય ઠોકાઈ, એને તીં ટુટી પોડીન આતા નાંચ આતા એહેકોય ઓઅઇ ગીયા.”

28 જોવે ઈસુવે હિકાડના બંદ કોઅયા, તોવે એહેકેન જાયા કા ચ્યા હિકાડના બારામાય લોકહાન નોવાય લાગી.

29 કાહાકા તો મૂસા નિયમ હિકાડનારા ગુરુહુ રોકો નાંચ, બાકી પુરાં ઓદિકારવાળા હારકો હિકાડે.

8

ઈસુ ચોક કોઢી માઅહાન હારો કોઅહે

(માર્ક 1:40-45; લુક. 5:12-16)

1 જોવે ઈસુ ચ્યા ડોગાવોયને ઉત્યો તોવે ચોક મોઠી ગીરદી ચ્યા પાહલા ગીયી.

2 એને એઅયા ચોક કોઢી માઅહું ઈસુવાપાય યેયન માંડયે પોડ્યા, એને આખ્યાં કા, “ઓ પ્રભુ, આંચ જાંઅતાહાંવ કા તું તો ઇચ્છાકોય તું માન ચોખ્ખો કોઅઇ હોકતોહો.”

3 ઈસુવે આથ લાંબો કોઇન ચ્યા આથ દોઅયો, એને આખ્યાં, મા મોરજી હેય કા તું ચોખ્ખો ઓઅઇ જો “એને તો તારાતુજ કોઢમાયને ચોખ્ખો ઓઅઇ ગીયો.

4 ઈસુવે ચ્યાલ આખ્યાં એએ, તો કાદાલ એહેકેન આખના નાંચ, કા માયે તુલ હારો કોઅયો બાકી જો એને યાજકાલ દેખાડ એને તું ચોખ્ખો ઓઅઇ ગીયો, ચ્યા બારામાય મૂસાય આગના કોઇન આખહી તી બેટ આઈન દે, ચ્યા લોકહા સાબિત્યે હાટી.”

જોમાદારા બોરહો

(લુક. 7:1-10; યોહા. 4:43-54)

5 જોવે ઈસુ કાપરનાહુમ ગાવામાય યેનો તોવે ચોક મુખ્ય જોમાદાર ઈસુપાય યેયન ચ્યાલ રાવ્યાં કોઅહે કા,

6 ઓ પ્રભુ, મા ચાકાર ગોઅમે લોકવાકોય બિમાર હેય તો ગોઅમે પાથાર્યેવોય પોડલો હેય.

7 ઈસુવે ચ્યાલ આખ્યાં, “આંય ચેયન ચ્યાલ હારો કોઅહી.”

8 મુખ્ય જોમાદારાય જવાબ દેનો, “ઓ પ્રભુ, આંય યા લાયકે નાંય હેય કા તું મા ગોઅમે ચેય, બાકી ઓલહાંજ આખી દે તે મા ચાકાર હારો ઓઅઇ જાઅરી.

9 કાહાકા આંયબી બિજા ઓદિકારા તાબામાઅને માઅહું હેતાંવ, એને મા તાબામાંય સિપાડાહા ચોક ટુકડી હેય, જોવે આંય ચોકાલ આખતાહાવ જો તોવે તો જાહાય, એને બિજાલ આખતાહાવ ચે તોવે તો ચેહે, એને જોવે મા ચાકારાલ આખતાહાવ ઈ કોઓ, તોવે તો કોઅહે.”

10 ઈ વોનાઈન ઈસુવાલ નોવાય લાગી, એને જ્યે ચ્યા પાહલા ચી રીઅલે આર્તે, આંય તુમહાન “હાચ્યાંજ આખતાહાવ કા માયે ઈસરાયેલ દેશામાય બી ચોક ઓહડા માઅહું નાંય દેખ્યહા, જો યા ગેર યહૂદ્યા હારકા માયેવોય બોરહો કોઅહે.

11 એને આંય તુમહાન આખતાહાવ કા પૂર્વ એને પચ્છીમ એસને બોજ ગેર યહૂદી લોક ચેઇન આબ્રાહામા એને ઈસાકા એને યાફૂબા આરે હોરગા રાજ્યામાય બોહરી.”

12 બાકી રાજ્યા પાહાહાન એટલે યહૂદી લોકહાન બાઆ આંદારામાય ટાકલા જાય. તાં રોડના એને દાત કોકડાવના હેય.

13 તોવે ઈસુવે જોમાદારાલ આખ્યાં, “ગોઓ જો, જેહેકોય તો બોરહો હેય તેહેકોયજ તોહાટી ઓઅરી” એને ચ્યેજ ગેડી ચ્યા ચાકાર હારો જાયો.

ઈસુવે ઘોણા માંદાહાલ હારે કોઅયે

(માર્ક 1:29-34; લુક. 4:38-41)

14 જોવે ઈસુ સિમોન પિત્તરા ગોઓ ગીયો તોવે સિમોન પિત્તરા હાહુ બોજ જોરાવલી આતી.

15 ઈસુવે ચ્યે આથ દોઅયો એને ચ્યેમાઅને જોરાં તારાતુજ ઉતી ગીયા, એને ઉઠીન તી ઈસુ એને ચ્યા શિષ્યહા ગાવાર ચાકરી કોઅતી લાગી.

16 જોવે જુંજડા પોડી ગીયા તોવે માઅહે ઈસુવાપાય બોજ જાત-જાત્યા દુખ્યાહાન એને જ્યાહામાય બુત વોળાગલા આતા ચ્યાહાન લેય યેને એને ઈસુવે ચ્યા બુતહાન ચ્યા વચના કોયન કાડી ટાક્યા, એને બોદા દુખ્યાહાન હારાં કોઅયા.

17 યાહાટી કા જી વચન યશાયા ભવિષ્યવક્તાથી આખલા આતા તીં પુરાં ઓઅઈ: “ચ્યાય પોતે આમે નોબળાયો પોતા ઉપે લેય લેદો એને આમે રોગ ઉપે લેય લેદા.”

ઈસુવા શિષ્ય કું બોની
(લુક. 9:57-62)

18 લોકહા બોજ ગીરદી એઇન ઈસુય શિષ્યહાન આખ્યાં આપા દોરિયા ચ્યેમેરે જાતા.

19 એને જેહેકેન તો જાંહાટી તિયાર જાયો ચોક મૂસા નિયમ હિકાડનારો ગુરુ યેઇન ઈસુલ આખ્યાં, “ઓ ગુરુ, તું જાં કેછ જાહે, તાં આંય તોઆરે યીહી.”

20 ઈસુય ચ્યાલ આખ્યાં “કોલાહા દોર હેતા એને આકાશામાય ઉડતા ચિડહા ગોરા હેતા, બાકી આંય, માઅહા પોહાપાય ચોક ગુઉ બી નાંય હેય કા જાં આંય હૂવી હોકુ.”

21 બિજો ચોક શિષ્ય આખહે, “પ્રભુ, માન પેલ્લા મા ગોઓ જાં દે, મા આબહાલ, આંય ડાટી દેયન યીહી, પાછે આંય યેયન તો શિષ્ય બોનહી.”

22 બાકી ઈસુવે આખ્યાં, “તું મા શિષ્ય બોનાહાટી મા આરે યે, ચ્યાહાલ ચ્યાહા લોકહા મોઅના વાટ જોવાં દે.”

ઈસુ વાવાજોડાલબી શાંત કોઅહે
(માર્ક 4:35-41; લુક. 8:22-25)

23 પાછો ઈસુ ઉડીમાય ચોડયો એને ચ્યા શિષ્યબી ચ્યાઆરે ચોડયા.

24 એને દોરિયામાય મોઠા વાવાજોડા યેના, ઓલા બોદા કા ઉડી લાફાહા કોઇન બુડી જાં કોઅહે બાકી ઈસુ હુતલો આતો.

25 તોવે ચ્યાપાય યેઇન ચ્યાલ જાગાડયો એને આખ્યાં, “ઓ પ્રભુ, આમહાન બોચાવ, આપા બુડી જાં કોઅજેહે.”

26 ઈસુવે ચ્યાહાન આખ્યાં, “ઓ વોછો બોરહો કોઅનારાહાય, તુમા કાહા ગાબરાતાહા?” તોવે ચ્યાય ઉઠીન વારાલ એને લાફાહાન દોમકાડયા, એને બોદા શાંત ઓઅઇ ગીયા.

27 એને ચ્યા નોવાય પામીન આખા લાગ્યા કા, ઈ કોહડા માઅહું હેય કા વારો એને પાઆય બી ચ્યા આગના માનતેહું.

બુત વોળાગલે બેન માઅહે ઈસુ હારે કોઅહે
(માર્ક 5:1-20; લુક. 8:26-39)

28 જોવે ઈસુ એને ચ્યા શિષ્ય દોરિયા એમેરે ગીરાસિયા ભાગામાય જાય પોઅચ્યા તોવે બેન માઅહે જ્યાહામાય બુત વોળાગલા આતા ચ્યે માહાણા માઅને નિંગીન ચ્યાલ મીળ્યે ચ્યા ઓલા કોઠણ આતા કા, ચ્યે વાટયેમાઅને કાદો નાંચ જાય હોકે.

29 ચ્યાહાય બોબલીન આખ્યાં ઓ પોરમેહેરા પોહા તો આમહે આરે કાય કામ હેય? કાય તું સોમાયા પેલ્લા આમહાન આબદા દાં યેનહો?

30 ચ્યાહાથી વાહાયોક દુઉ યોક ડુકરાહા ટોળો ચોઅયા કોઅે.

31 તોવે બુતાહાય ઈસુલ એહેકેન રાવ્યાં કોઇન આખ્યાં, “આમહાન ડુકરાહામાય દોવાડ ચ્યાહામાય નિંગી જાહું.”

32 ઈસુવે ચ્યાહાન આગના દેની, તોવે બુત નિંગીન ડુકરાહામાય ઉરાય ગીયા, એને ડુકરાહા બોદો ટોળો કોરાડા ઉપને દોરિયામાય જાયન ટુટી પોડયો, એને બુડી મોઅયો, લગભગ બેન ઓજાર ડુકરાહા ટોળો આતો.

33 એને ડુકરાહા ગોવાળ નાહી પોડ્યા, એને શેહેરામાય જાયને યે બોદ્યે વાતહેબારામાય એને જ્યાહામાય બુત આતા ચ્યા બારામાય બોદહાન ખોબાર દેની.

34 તોવે શેહેરામાઅને બોજ લોક ઈસુવાલ મિળાહાટી બાઆ નિંગી યેના, એને ચ્યાલ એઇન વિનાંતી કોઅયી કા આમહે હોદ માઅને જાતો રો.

9

લખવાવાળાલ હારો કોઅયો
(માર્ક 2:1-12; લુક. 5:17-26)

1 પાછો ઈસુ ઉડીમાય બોહીન દોરિયો પાર કોઈન પોતાના ગાવામાય યેનો.

2 એને કોલહાક લોક યોક લખવાવાળા માઅહાન ખાટલાવોય હુવાડીન ઈસુવાપાય લેય યેના, ઈસુવે જાઅયા કા ચ્યા માયેવોય બોરહો થોવતાહા, ચ્યે લખવાવાળા માઅહાન આખ્યાં, “ઓ બાહા, ઈમાત રાખ, તો પાપહાલ આંય માફ કોઅતાહાંવ.”

3 એને કોલાહાક મૂસા નિયમ હિકાડનારા ગુરુ આતા ચ્યાહાય વિચાર કોઅયો, “એલો તે પોરમેહેરા નિંદા કોઅહે”

4 ઈસુવે ચ્યાહા મોના વિચાર જાંઆઈન આખ્યાં, “તુમા તુમહે મોનામાય કાહા ખારાબ વિચાર કોઅતાહા?”

5 કાય આખના હેલ્લા હેય? તો પાપ માફ ઓઅઇ ગીયા ઈ આખના હેલ્લા હેય, કા ઉઠ ચાલા લાગ, ઈ આખના હેલ્લા હેય?

6 બાકી તુમહાન ખોબાર પોડા જોજે કા માન એટલે માઅહા પોહાલ દોરત્યેવોય લોકહા પાપ માફ કોઅના ઓદિકાર દેનલો હેય.” ચ્યાહાટી ઈસુ લખવાવાળા માઅહાન આખહે. “તુલ આંય આખતાહાવ, ઉઠ, તો ખાટલા લેઈને ગોઓ જો.”

7 તો ઉઠીન ચ્યા ગોઓ ગીયો.

8 લોક ઈ દેખીન બિઇ ગીયા એને પોરમેહેરા મહિમા કોઅરા લાગ્યા જ્યે માઅહાન ઓહડો ઓદિકાર દેનહો.

માથ્થી શિષ્યા તેડા

(માર્ક 2:13-17; લુક. 5:27-32)

9 જોવે ઈસુ તાઅને આગલા ગીયો, માથ્થી નાંવા યોક માઅહાન કર લેઅના નાકાવોય બોહલો દેખ્યો, એને ચ્યાલ આખ્યાં, “મા આરે ચાલ, આંય તુલ મા શિષ્ય બોનાવીહી.” તો કામ છોડીન ઈસુવાઆરે ગીયો.

10 જોવે ઈસુ એને ચ્યા શિષ્ય ગોઅમે રાતી ખાઅના ખાં બોહલા આતા, તોવે બો બોદા કર લેનારા એને પાપી લોક ઈસુ એને ચ્યા શિષ્યહાઆરે ખાં બોહા.

11 ઈ એઈન પોરૂષી લોકહાય ઈસુવા શિષ્યહાન આખ્યાં, “તુમહે ગુરુ કર લેનારાહા એને પાપી લોકહાઆરે કાહા ખાહે?”

12 ઈસુ ઈ વાત વોનાયો, એને મૂસા નિયમ હિકાડનારા ગુરુ એને પોરૂષી લોકહાન આખ્યાં, “જ્યે હારે હેતેં ચ્યાહાન ડાકટારા ગોરાજ નાંચ રોય, બાકી જ્યે દુખ્યે હેતેં ચ્યાહાન ગોરાજ હેય.

13 ચાહાટી તુમા જાયને યા મોતલાબ હિકી લા, માન તુમહે બલિદાન નાંચ જોજે, બાકી માન દયા ગોમહે, કાહાકા આંચ ન્યાયી લોકહાન નાંચ, બાકી પાખ્યાહાન બોચાવાં ચેનોહો.”

ઉપહા બારામાય

(માર્ક 2:18-22; લુક. 5:33-39)

14 તોવે ચોહાના શિષ્ય ઈસુપાય ચેના એને ચ્યાહાય આખ્યાં કા “કાય કારણ હેય કા આમા એને પોરૂષી લોક ઉપહા કોઅતાહા, બાકી તો શિષ્ય ઉપહા નાંચ કોઅેત.”

15 ઈસુવે ચ્યાહાન આખ્યાં, મા શિષ્ય એને આંચ, વોવડા એને ચ્યા દોસ્તારા રોકા હેતા, “જાવ લોગુ વોવડો ચ્યાહા હાતે રોય, તાંવ લોગુ ઉપહા કોઅઇ હોકતાહા? બાકી ચ્યાહા પાયને વોવડો લેવાય જાય, ઓહડા દિહી યી તોદિહી ચ્યા ઉપહા કોઅરી.”

16 માઅહે જુના ફાડકા આરે નોવા ફાડકા ઠિગળા નાંચ હિવેત, કાહાકા દોવ્યા પાછે નોવા ફાડકા ચંડળાય જાય એને જુના આજુ ચિઆઈ જાહે, એહેકેન તીં ફાડકા કામ નાંચ લાગે. એહેકેન મા શિક્ષા જુની રીતીરીવાજાહા આરે જોડે, તે મા શિક્ષા યા ફાડકા હારકી કાયજ કામ નાંચ લાગે.

17 એને માઅહે નોવો દારાખા રોહો જુના ચાંબડા ઠેલ્યેમાય નાંચ બોઅેત, કાહાકા ઠેલી ફાટી જાય, એને દારાખા રોહો વેરાય જાય બાકી નોવો દારાખા રોહો નોવ્યે ઠેલ્યેમાયજ બોઅતેહેં, એને બેની હારે હાયવાય રોતેહેં.

ઓદિકાર્યા પોહી જીવતી જાયી એને ચોક બાય હારી જાયી

(માર્ક 5:21-43; લુક. 8:40-56)

18 તો ચ્યાહાન ઈ વાત આખહે, તોવે યાઈર નાંવા સોબાયે ઠિકાણા આગેવાનાહા માઅને ચોક ચેનો એને ઈસુવા પાગે પોડયો. એને યાઈર બોજ રાવ્યો કોઅતો લાગ્યો, “મા વાહની પોહી આમી મોઅોઈ ગીયહી, બાકી તું ચેઇન ચ્યેલ આથ લાવહે, તોવે તીં જીવતી ઓઅઇ જાય”

19 ઈસુ ઉઠયો એને ચ્યા શિષ્યહાઆરે ચાલ પોડયો.

20 એને ચોક બાઈ ચ્યે બારા વોરહાથી લોચ પોડના બિમારી આતી, તી ચ્યા પાહલા યેની એને ફાડકા છેડાલ આથ લાવ્યો.

21 કાહાકા તી પોતે મોનામાય આખતી આતી, કા જોવે એલા ફાડકાલુજ આથ લાવહી તોવે મા બોચાવ ઓઅઇ જાય.

22 ઈસુવે ચ્યે એછે ફિરીન ચ્યેલ આખ્યાં, બોઅહી ઈમાત રાખ, માયે તો બોચાવ કોઅલો હેચ કાહાકા તુચે માયેવોચ બોરોહો કોઅલો હેચ, આમી તુલ એલી બિમારી નાંચ લાગે તોવે તી બાય તારાત હારી ઓઅઇ ગીચી.

23 ઈસુ સોબાયે ઠિકાણા આગેવાના ગોઓ યેનો, તાં થાળી તુર વાજાડનારાહાલ એને લોકહાન કાકાહા કોઅતા દેખ્યા,

24 તોવે ચ્યે આખ્યાં, “હોરકી જાં, પોહી મોઅચીહી નાંચ, બાકી હુતહી” તોવે ચ્યા ઓહરા લાગ્યા.

25 બાકી જોવે ચ્યે લોકહા ટોળાલ બાઆ કાડી દેના, એને ચ્યે ગોઅમે જાયન પોહચે આથ દોઅયો એને તી જીવી ઉઠી.

26 એને યે વાતે ખોબાર ચ્યા બોદા ગાવહામાય ફેલાય ગિઇ.

ઈસુ બેન આંદળાહાન દેખતા કોઅહે

27 તાઅને ઈસુ આગલા ગીચો તોવે બેન આંદળા ચ્યા પાહાલાને બોંબાલતા લાગ્યા કા, “ઓ દાઉદ રાજા કુળા પોહા, આમહાવોચ દયા કોઓ.”

28 જોવે તો ગોઅમે ગીચો, તોવે ચ્યા બેની આંદળા ચ્યાપાય યેના ઈસુવે ચ્યાહાન પુછ્યાં, “કાય તુમહાન બોરહો હેચ, કા આંચ હારાં કોઓઇ હોકહુ?” ચ્યાહાય આખ્યાં “આમા બોરહો કોઅજેહે કા તું હારો કોઅઇ હોકતોહો.”

29 તોવે ઈસુવે ચ્યાહા ડોળાહાલ દોઇન આખ્યાં કા “તુમા બોરહા કોઅતાહા યાહાટી તુમહાન હારાં કોઅતાહાંવ.”

30 તોવે ચ્યાહા ડોળા હારાં ઓઅઇ ગીચા, એને ઈસુવે ચ્યાહાન આખ્યાં, “હાયવીન રા, ઈ કાદાલ નાંચ ખોબાર પોડા જોજે કા માયે કોઅયા.”

31 બાકી ચ્યાહાય જાયને ચ્યા કામહા બારામાય બોદા ભાગામાય આખ્યાં.

ઈસુ યોકા મુકા માઅહાન હારો કોઅહે

32 જોવે ચ્યા બેની આંદળા વાટે જાય રીઅલા આતા, તોવે લોક યોક મુકા માઅહાલ, જ્યાલ બુત વોળાગલો આતો ઈસુપાય લેય યેને.

33 એને જોવે બુતાલ કાડયા પાછે, મૂકો બોલતો લાગ્યો. ચ્યાથી ગીરદીય નોવાય પામીન આખ્યાં, “ઈસરાયેલ દેશામાય ઓહડા કોવેજ નાંય દેખહયા.”

34 બાકી પોરૂષી લોકહાય આખ્યાં કા, “તો સૈતાન બુતાહા મુખ્ય હેય ચ્યા મોદાત લેઈને બુતાહાન તાંગાડેહે.”

ઈસુલ લોકહાવોય દયા યેની

35 એને ઈસુ ગાલીલ વિસ્તારમાય એને બોજ શેહેરાહામાય એને ગાવહામાય ફિરીન, ચ્યાહા સોબાયે ઠિકાણામાય હિકાડે, એને પોરમેહેરા રાજ્યા હારી ખોબાર આખતો એને માઅહામાયને બોદે જાત્યા બિમારી એને ચ્યાહામાઅને નોબળાય દુઉ કોઅતો રિયો.

36 લોકહા ટોળા એઇન, ચ્યાહાવોય ચ્યાલ દયા યેની, ચ્યે ચ્યા ગેટાહા રોકે આર્તે જ્યાહા ગોવાળ નાંય હેય, લાચાર એને ટાકાલાહા રોકે આર્તે.

37 તોવે ઈસુચ ચ્યા શિષ્યહાન આખ્યાં, “જેહેકોય રાનહા માય બોજ પાક રોહે, તેહેકોય બોજ લોક હેય, જ્યા પોરમેહેરા હારી ખોબારેવોય બોરહો કોઅરાહાટી તિચાર હેય, બાકી પોરમેહેરા રાજ્યા બારામાય આખનારા લોક વોછા હેતા.

38 યાહાટી તુમા પાક વાળા માલિકાલ વિનાંતી કોઆ કા તો રાનામાય કામ કોઅનારા લોકહાન દોવાડે.”

10

બારા શિષ્યહાન દેનલો ઓદિકાર એને ચ્યાહાન દેનલી સેવા
(માર્ક 6:7-13; લુક. 9:1-6)

1 પાછે ઈસુવે ચ્યા બાર શિષ્યહાન હાદિન, બુતાલ લોકહામાઅને કાડના ઓદિકાર દેનો એને બોદયે જાત્યા રોગ એને દુઃખ હારાં કોઅના ચ્યાહાન ઓદિકાર દેનો.

2 એને બાર પ્રેષિતાહા નાંવે ચેં હેતે: પેલ્લો, સિમોન જ્યાલ પિત્તર આખવામાય યેહે એને ચ્યા બાહા આંદ્રિયાસ, જબદયા પોહો યાકૂબ, એને ચ્યા બાહા યોહાન.

3 ફિલિપ, એને બારતોલોમી, થોમા, એને જકાતદાર માથ્થી, અલફિયા પોહો યાકૂબ, એને તદે.

4 સિમોન કનની, એને યહૂદા ઇસ્કારીયોત જ્યે ચ્યાલ દોઅવાડી દેનેલ.

શિષ્યહાન સેવાયે હાટી દોવાડના

5 યા બાર શિષ્યહાન ઈસુવે એહેકેન આખીન દોવાડયા કા: “ગેર યહૂદી લોકહામાય જાતા મા, એને સમરૂના કોઅહાબી શેહેરામાય ઉરાયાહા મા.

6 બાકી તુમા ઈસરાયેલ દેશા કુટુંબમાય ટાકાલા ગેટાહા એછે જાજા.

7 એને જાતા-જાતા તુમા એહેકેન હારી ખોબાર આખજા: કા હોરગા રાજ્ય પાહી યેય ગીઅલાં હેય.

8 દુખ્યાહાન હારે કોઅયા, મોઅલાહાન જીવતે કોઅરા, કોડબ્યાહાન હારે કોઅયા, એને બુતાહાન કાડી ટાકજા, તુમાહાય મોફાત મેળવ્યાહાં તે મોફાત દા.

9 તુમા તુમહે પાકીટ માય હોના, રુપાં નાયતે તાંબા લાહા મા.

10 વાટેહાટી ઠેલી મા લાહા, નાંય બેન જોડ ફાડકે લેતા, નાંય બેન જોડ વાઅણે એને બેન લાકડયોબી મા લેતા. કાહાકા કામ કોઅનારાલ ચ્યા ખાઅના મિળાં જોજે.”

11 “એને જ્યા કોઅહાબી શેહેરામાય નાયતે ગાવહામાય જાહા, તે ચ્યે માન એહેકેન પુછ્યાં કા ઈહીં કું હારો હેય એને જાઉં લોગુ તાંઅરે નાંય જાહા, તાંઉલોગુ ચ્યાજ ગોઅમે રોજા.

12 ગાઆમાય જાતાંજ ચ્યાહાલ બોરકાત દેજા.

13 એને તીં ગુઉ બોરકાતે લાયક્યે ઓઅરી તે તુમહે સુખ શાંતી ચ્યાહાવોય જાય, બાકી તીં લાયક્યે નાંય ઓઅરી તે તુમહે સુખ શાંતી તુમહેપાય વોળી યેઅરી.

14 એને જાં તુમહાન લોક નાંય હાદેત એને તુમહે નાંય હાંબળેત, તાંઅરે નિંગી જાયા, એને ચ્યાહાન નિશાણી દાંહાટી, તુમહે પાગહા

આરેને ઉદળાં તાંજ ખેખરી ટાકજા, ચ્યાહાન ઈ ચેતાવણી દાંહાટી કા પોરમેહેરા એહેરે મિળનારી સજા ચ્યા પોતેજ જાબાવદાર હેય.”

15 આંય તુમહાન હાચ્યાં આખતાહાવ, ન્યાયા દિહી ચ્યા શેહેરા દશા સદોમ એને ગમોરા શેહેરા કોઅતા વોદારી સાજા મિળી એને યાહા હાલાત બોજ ખારાબ ઓઅઇ જાઅરી.

ચેનાયો સતાવણ્યો

(માર્ક 13:9-13; લુક. 21:12-17)

16 “એઆ, આંય તુમહાન ગેટાહા હારખો તોઅસાહા વોચમાય દોવાડતાહું, ચ્યાહાટી હાપડાહા હારખા બોજ ઉશારી રોજા એને કબુતરાહા હારખા બોળા બોના.

17 બાકી તુમા લોકહાપાઅને હાયવીન રા, કાહાકા લોક તુમહાન કોચર્યેમાય લી જાય એને સોબાયે ઠિકાણાહામાય માર દી.

18 તુમા માંહાટી સરકારા, એને રાજહા આગલા એને ગેર ચહૂદી લોકહાવોચ સાક્ષી બોનાહાટી ઉબા કોઅલા જાહા.

19 જોવે તુમહાન ચ્યે કોચર્યેમાય દોઅવાડી દેય, તોવે કેહેકેન બોલના એને કાય આખના ચ્યા ચિંતા મા કોઅહા, કાહાકા જો કાય તુમહાન આખના હેય તીં ચ્યે સમયે આખાડી.”

20 કાહાકા આખનારે તુમા નાંય હેય, બાકી તુમહે પવિત્ર આત્મા તુમહેકોચ બોલી.

21 ચ્યે સમયે, જ્યા લોક માયેવોચ બોરહો નાંય કોઅેત, “ચ્યા ચ્યાહા બાહાહાલ દોઇન કોંડાડી દી, જ્યા માયેવોચ બોરહો કોઅતાહા ચ્યાહાન માઆઇ ટાકી, આબહો પોતે પાહાહા આરે એહેકેન કોઅરી એને પોહોં પોતે આયહે આબહા વિરુદ્ધ કોઅરી એને ચ્યાહાન માઆઇ ટાકી.”

22 કાહાકા તુમા મા શિષ્ય હેય યા લેદે, બોદે માઅહે તુમહેઆરે દુશ્માની કોઅરી; બાકી જ્યા લોક માયેવોચ બોરહો કોઅનામાય લાગી રોય, એને દોરત્યેવોચ ચ્યા જીવના છેલ્લે હુદી મા પાહલા ચાલતો રોય, ચ્યાલ પાપહા ડોંડ બોગાવનાથી તારણ ઓઅઇ જાઅરી.

23 જોવે તુમહાન ચ્યે યોકા શેહેરામાય સતાવે, તોવે બિજા શેહેરામાય નાહી પોડજા, આંય તુમહાન હાચ્યાંજ આખતાહાવ કા, તુમા આંય,

માઅહા પોહા યેઅના પેલ્લા ઈસરાયેલ દેશા બોદા ગાવાહામાય ગીયા બી નાંય આરી.

શિષ્ય ઓઅના મોતલાબ

24 “શિષ્ય આ ગુરુઆ કોઅતા મોઠો નાંય રોય, એને દોણ્યા કોઅતા મોઠો ચાકાર નાંય રોય.

25 ગુરુઆ હારખા શિષ્ય, એને ચાકાર દોણ્યા હારખો બોનના તીંજ બો હેય; જોવે આહાય ગોઆ દોણ્યાલ સૈતાન જો બુતાહા મુખ્ય આખ્યાં, જો ચ્યે દોણ્યા આરે ખારાબ વ્યવહાર કોઅતેહે, તે ચ્યે આ ચાકારાહા આરેબી ખારાબ વ્યવહાર કોઅરી.”

**કા દાક રાખના
(લુક. 12:2-7)**

26 “આહાટી માઅહાન ગાબરાના નાંય; કાહાકા કોઅહીજ વસ્તુ ઓહડી નાંય હેય કા તી ડાકલી રોય એને ચોકતી વસ્તુ ઓહડી નાંય હેય કા તી દુબાડી હોકાય બાકી બોદાજ ખુલ્લાં પોડી જાય.”

27 આંય જું તુમહાન આંદારામાય આખતાહાવ, તીં તુમા ઉજવાડામાય આખી દિયા; એને જો આંય કાનામાય દુંદરીન આખતાહાવ, તીં તુમા બોદે જાગે આખા.

28 જ્યે શરીરાલ માઆઇ ટાકી હોકતેહે, બાકી ચ્યે આત્માલ નાશ નાંય કોઅઇ હોકે, આહાન મા ગાબરાયાહા, બાકી જો શરીર એને આત્મા બેન્યાહાન બોસામકોળીમાય ટાકી હોકહે આ પોરમેહેરાલ ગાબરાજા.

29 હાકરીયે ચિડે બોજ હોયતે વેચાતેહે, તેરુંબી તુમહે હોરગ્યા આબહા મોરજી વોગાર આહામાઅને ચોકબી દોરતીવોય નાંય ટુટી પોડે.

30 પોરમેહેર તુમહે જીવના બોદી ચિંતા કોઅહે, તો ઇબી જાંઅહે કા તુમહે ટોલપીવોય કોલહા કીહી હેય.

31 ચાહાટી તુમા મા બીયહા, તુમા બોજ ચિડહા કોઅતાબી કિમત્યા હેતા.

ઈસુવાલ માનના કા નાંય માનના

(લુક. 12:8-9; 12:51-53; 14:26-27)

32 “જું માઅહું લોકહા હોમ્મે માની લેહે, તો મા શિષ્ય હેય, આંયબી મા હોરગામાઅને આબહાલ આખી દિહીં કા ઓ મા શિષ્ય હેય.

33 બાકી જું માઅહું માન માઅહા હોમ્મે નાંય માને, તે ચ્યાલ આંયબી મા હોરગામાઅને આબહાલ આખી દિહીં કા ઓ મા શિષ્ય નાંય હેય.”

ઈસુવા યેવાથી કાય પરિણામ જાયો

34 “ઈ મા હુમાજતા કા આંય દોરત્યેવોય લોકહાવોયમાય શાંતી દાં યેનોહો, આંય દોરત્યેવોય લોકહાવોયમાય શાંતી નાંય બાકી જગડો કોઆડાં યેનહો.

35 આંય યાહાટી યેનોહો કા: પોહાલ ચ્યા આબહા આરે, એને પોહયેલ આયહે આરે, એને વોવલ્યેહેન હાઅવેહે આરે, વિરુદ કોઅઇ દાવ.”

36 “માઅહા વિરુદ્યે ચ્યા પોતે ગોઅને માઅહેજ રોય.”

37 જું માઅહું આબહાલ યા આયહેલ મા કોઅતો બોજ પ્રેમ કોઅહે, તીં માઅહું મા શિષ્ય બોના લાયકે નાંય હેય, એને જું માઅહું પોહા યા પોહયેલ મા કોઅતો બોજ પ્રેમ કોઅહે, તીં મા શિષ્ય બોના લાયકે નાંય હેય.

38 જું માઅહું મા શિષ્ય ઓઅના લીદે દુઃખ નાંય વેઠે એને મોઅરાંહાટી તિયાર નાંય ઓઅે, તીં મા શિષ્ય બોના લાયકે નાંય હેય.

39 જું માઅહું પોતે જીવ બોચાડેહે, તો ચ્યાલ ગુમાવી દી, એને જો મા લીદે ચ્યા જીવ દેહે, તો ચ્યાલ મેળવી.

ઇનામ

(માર્ક 9:41)

40 “જો કાદોબી મા લીદે એહેકેન ચોકા પોહાલ દોયા દેખાડેહે, તો હાચ્યાંજ મા માની લેહે, જો કાદો મા માની લેહે, તો હાચ્યાંજ પોરમેહેરાબી માની લેહે જ્યાંય માન દોવાડયોહો.”

41 જું માઅહું ભવિષ્યવક્તાલ ભવિષ્યવક્તા જાંઆઈન માનહે, ચ્યાલ ભવિષ્યવક્તા હારખો ઇનામ મિળી; જું હારાં માઅહું હોમજીન હારાં માઅહાન માનહે, ચ્યાલ હારાં માઅહા હારખા ઇનામ મિળી.

42 જો કાદો ચોક ગોલાસ પાઆઈ તુમહાન યાહાટી પાજી કા તુમા મા શિષ્ય આખાતાહા, આંય તુમહાન હાચ્યાંજ આખતાહાવ કા પોરમેહેર નોક્કીજ ચ્યા માઅહાન ઇનામ દેઅરી.

11

ઈસુ એને બાપતિસ્મા દેનારો યોહાન
(લુક. 7:18-35)

1 જોવે ઈસુવાય ચ્યા બારા શિષ્યહાન આગના દેની, તોવે તો ચ્યાહા ગાવહામાય હિકાડાં એને હારી ખોબાર આખાહાટી જાતો રિયો.

2 યોહાન બાપતિસ્મા દેનારાય જેલેમાય રોયન ખ્રિસ્તા કામહા બારામાય વોનાયો એને ચ્યાય ચ્યા શિષ્યહાન ઈ પુછા હાટી દોવાડયા.

3 ચ્યાહાય ઈસુલ પુછ્યાં, “કાય તો તુંજ ખ્રિસ્ત હેય, જ્યાલ દોવાડના વાયદો પોરમેહેરાય કોઅલો આતો, કા આમા યોકતા બિજા વાટ જોવજે?”

4 ઈસુવાય જાવાબ દેનો, “જું તુમા વોનાતાહા એને એઅતાહા, તી બોદા જાયને યોહાનાલ આખી દા.”

5 કા આંદળે દેખતેહે એને લેંગડે ચાલતે ફીરતેહે, કોડળે હારાં કોઅવામાય ચેતહે એને બોઅરે વોનાતેહે, મોઅલે જીવતે ઊઠતેહે એને ગરીબાહાલ હારી ખોબાર આખવામાય ચેહે.

6 એને ધન્ય હેય જું, માયેવોય શંકા નાંચ કોઅેત.

ઈસુવાથી યોહાના સન્માન

7 જોવે યોહાના શિષ્ય તાઅને જાતા લાગ્યા, તોવે ઈસુ યોહાના બારામાય લોકહાન આખતો લાગ્યો કા, તુમા ઉજાડ જાગામાય કાય એરાહાટી ગીઇલે? કાય વારાકોય આલનારા બુરળ્યા?

8 પાછી તુમા કાય એરા ગીઇલે? મોઅર્ગે ફાડકે પોવલા લોકહાન કા? એઆ મોઅર્ગે ફાડકે પોવતેહે ચ્યે રાજમેહેલામાય રોતેહે.

9 તોવે તુમા કાય એરા ગીઇલે? ભવિષ્યવક્તાહાલ એરા કા? હાં, આંચ તુમહાન આખતાહાવ, બાકી ભવિષ્યવક્તાહા કોઅતાબી મોઠો હેય.

10 યોહાન બાપતિસ્મા દેનારો, તો માઅહું હેય, જ્યા બારામાય પવિત્રશાસ્ત્રામાય પોરમેહેર આખહે: એએ, આંચ તો પેલ્લા મા સંદેશ લેય ચેનારાલ દોવાડતાહાવ, જો તો પેલ્લા તોહાટી વાટ તિયાર કોઅરી.

11 તુમહાન આંય હાચ્યાં આખતાહાવ, કા જ્યા થેએયેથી જોન્માલ યેનલા હેય, ચ્યાહામાઅને યોહાન બાપતિસ્મા દેનારા કોઅતા કાદો મોઠો નાંય, તેરુંબી હોરગા રાજ્યામાય વાહનો ચ્યા કોઅતો મોઠો હેય.

12 જોવેને યોહાન બાપતિસ્મા દેનારાય સંદેશ દેયના સુરુ કોઅયા, ચ્યા દિહા પાયને આમી લોગુ હોરગા રાજ્યા હારી ખોબાર આખલી જાહે, એને બોદેજ યામાય ભાગીદાર ઓઅતેહે, યા દુનિયા ખારાબ લોક ચ્યાહાન નાશ કોઅરા કોશિશ કોઅતાહા.

13 ભવિષ્યવક્તાહા બોધો ચોપડયો એને મૂસા નિયમશાસ્ત્રામાય યોહાન બાપતિસ્મા દેનારા યેયના લોગુ રાજ્યા બારામાય ભવિષ્યવાણી કોઅલી આતી.

14 જો તુમા હાચ્યાં યે વાતેહેવોય બોરહો કોઅતેહે તે વોનાયા, ઓ યોહાનુજ એલીયા હેય, જ્યા યેઅના બારામાય ભવિષ્યવક્તાહાય આખલા આતા.

15 જો વોનાયાંહાટી તિયાર હેય તો વોનાય લેય એને ચ્યા બારામાય હુમજે.

16 બાકી ઈ પીડી કોહડી હેય? ઈ પીડી ચ્યા પાહહા રોકી હેય જ્યા આટામાય બોહીન હાંગાત્યાહાન હાત કોઇન આખતાહા.

17 આમાહાય તુમહેહાટી વોરાડા ગીતે લાવ્યે એને તુમા નાચ્યા નાંય, આમાહાય રોડના ગીતે આખ્યે, બાકી તુમા નાંય રોડયા.

18 ફાહાકા જોવે યોહાન બાપતિસ્મા દેનારો યેનો તોવે તો બોજ ઉપહા કોઅતો આતો, એને દારાખા રોહો નાંય પિતો આતો, એને તુમાહાય આખ્યાં, ચ્યામાય બુત હેય.

19 બાકી જોવે આંય, માઅહા પોહો સાદા ખાઅના ખાતો એને પાઆય એને દારાખા રોહો પિતો આતો, તોવે તુમા આખતા લાગ્યા “એઆ તો ખાદાડ એને સાકાટ માઅહું, કર લેનારાહા એને પાપહયા હાંગાત્યો હેય, તેરુ માઅહા કામહાકોય સાખિત ઓઅહે કા જ્ઞાની કું હેય.”

બોરહો નાંય થોવનારાહાલ હાય
(લુક. 10:13-15)

20 પાછે જ્યા શેહેરામાય ઈસુય બોજ મોઠે ચમત્કારા કામે કોઅલે તાઅને લોકહાન તો ઠોપકાડતો લાગ્યો, કાહાકા ચ્યાહાય પાપ કોઅના બંદ નાંચ કોઅયેલ.

21 “હાય ચ્યા લોક જ્યા ખુરાજીઈન શેહેરામાય રોતહા, હાય ચ્યા લોક જ્યા બેતસાદા ગાવામાય રોતહા, કાહાકા તુમહેમાય જ્યે કામે કોઅલે તોહડે ચમત્કારા કામે જોવે સુર એને સિદોના શેહેરામાય ઓઅતે તોવે ચ્યા લોક બોજ પેલ્લા ઉપહા કોઈન, ટોલપાવોય બુંબર્યા ખેખરી લેતા, ચ્યા ઈ દેખાડાં હાટી કા પાપ કોઅના બંદ કોઅયા.

22 બાકી આંચ તુમહાન આખતાહાવ, ન્યાયા દિહી, જું સાજા સુર એને સિદોનાલ દી, તી સાજા બોજ વોછી હેય જું સાજા તુમહાન દી.

23 એને કાપરનાહુમ ગાવા લોકહાય, કાય તુમા હોરગા લોગુ ઉચા ઓઅના આશા કોઅઈ રીઅલા હેય? તુમા નિચે અધોલોકમાય પાડી ટાકલા જાહા, કાહાકા તુમહેમાય જ્યે મોઠે ચમત્કારા કામે કોઅલે તોહડે સદોમ શેહેરમાય કોઅલે રોતે તોવે તો આજેલોગુ રોતો”

24 બાકી તુમહાન આંચ આખતાહાવ કા, ન્યાયા દિહી, જું સાજા સુર એને સદોમ શેહેરાલ દી, તી સાજા બોજ વોછી હેય જું સાજા તુમહાન દી.

વોજાકોય દાબાલે માયેપાંચ યેયન આરામ મેળવા
(લુક. 10:21-22)

25 ચ્યે સમયે ઈસુવે આખ્યાં, ઓ આબા, હોરગા એને દોરતી પ્રભુ, તો આભાર માનતાહાવ કાહાકા તુયે યો બોદો વાતો ઓકલ્યેવાળા લોકહાન એને હોમાજદાર લોકહાન નાંચ, બાકી જ્યા લોક સાદા સુદા હેય ચ્યાહાન દેખાડયોહો.

26 હાં, ઓ આબા, કાહાકા તુલ ઈજ ગોમ્યા.

27 મા આબહે માન બોદો ઓદિકાર દેય દેનહો, એને આબા સિવાય કાદો પાહાલ નાંચ જાંઆય, તેહેકોયજ પાહા સિવાય કાદો આબહાલ નાંચ જાંઆય, એને જ્યા લોકહાન આંચ, પોહો નિવાડતાહાવ, ચ્યા લોક આબહાલ જાઅરી.

28 ઓ બોદા મેહનાત કોઅનારાહાય, એને વોજાકોય દાબાલા લોકહાય તુમા મા પાહાય યા તુમહાન આંચ દિલાસો દિહી.

29 તુમા મા શિષ્ય બોના, માયે પાયને હીખી લીયા કાહાકા આંય નમ્ર એને દિન હેતાઉ એને તુમહે જીવાલ દિલાસો મિળી.

30 જીં આંય આખતાહાવ કા તીં તુમા કોઆ, તીં કોઅના કઠીણ નાંય હેય.

12

આરામા દિહાલ પાળના સાવાલ
(માર્ક 2:23-28; લુક. 6:1-5)

1 યોક આરામા દિહી, ઈસુ એને ચ્યા શિષ્ય રાનામાઅને જાતા આતા, એને ચ્યા શિષ્યહાન બુખ લાગી તોવે શિષ્ય કોઅહે પેંદી ખાં લાગ્યા.

2 તોવે પોરૂષી લોક ઈ એઇન ઈસુલ આખ્યાં, “એએ, તો શિષ્ય જીં કામ આરામા દિહી કોઅઇ રીઅલા હેય, તીં આમે નિયમા વિરુદ્ધ હેય, તુયે ચ્યાહાન એહેકેન નાંય કોઅરાહાટી આખા જોજે.”

3 ઈસુવે ચ્યાહાન આખ્યાં, “કાય તુમાહાય નાંય વાચ્યાહાં, કા દાઉદ રાજાય, જોવે ચ્યા હાંગાત્યાહાન બુખ લાગી તોવે કાય કોઅયેલ?

4 તોવે તો કેહેકેન પોરમેહેરા માંડવામાય ગીયો, એને બેટ ચોડાવલ્યો બાખ્યો લેઈને ખાધો, જ્યો યોખલા યાજકથી ખાવાય ચ્યો ચ્યે ખાધો, એને હાંગાત્યાહાન બી દેન્યો?

5 કાય તુમાહાય નિયમશાસ્ત્રમાય નાંય વાચ્યાહાં, કા યાજક આરામા દિહી દેવાળામાય આરામા દિહ્યા નિયમાલ તોડી તેબી નિર્દોષ રોઅરી?

6 બાકી આંય તુમહાન આખહુ કા ઈહી જો હેય તો દેવાળા કોઅતો મહાન હેય.

7 તુમા નાંય જાંએ કા પવિત્રશાસ્ત્રમાય યા શબ્દાહા કાય મોતલાબ હેય, જો તુમા જાઅતા તે મા નિર્દોષ શિષ્યહા નિંદા નાંય કોઅતા. મા હાટી બેટ ચોડાવના કોઅતા, મા ઇચ્છા હેય કા તુમા બીજહાવોય દયા કોઆ.

8 કાહાકા આંય, માઅહા પોહાલ આરામા દિહાવોય બી ઓદિકાર હેય.”

આથ ઉખાય ગીઅલા માઅહાન હારાં કોઅના
(માર્ક 3:1-6; લુક. 6:6-11)

9 તાઅને ચાલીન ચોક પોરમેહેરા પવિત્ર દિહી ઈસુ સોબાયે ઠિકાણે ગીયો.

10 તાં ચોક માઅહું આતા, ચ્યા આથ ઉખાલો આતો, પોરૂષી લોક ઈસુવાવોય દોષ લાવાહાટી પુછ્યાં, “કાય આરામા દિહી હારાં કોઅના ઠીક હેય?”

11 ચ્યાય ચ્યાહાન આખ્યાં, માની લા તુમહેમાઅને કાદા ચોક ગેટા હેય, જોવે તીં આરામા દિહી ખાડામાય પોડી જાય તે, તુમા ચ્યાલ નોક્કીજ બોચાવી લાહા.

12 હારાં, માઅહા કિંમાત ગેટા કોઅતા કોલાં વોદારી હેય, ચ્યાહાટી આરામા દિહી લોકહાન હારાં કોઅના યોગ્ય હેય.

13 તોવે ઈસુવે આથ ઉખાલા માઅહાન આખ્યાં, “તું તો આથ લાંબો કોઓ” એને ચ્યેય આથ લાંબાવ્યો, એને બિજા આથા હારખો હારો ઓઅઇ ગીયો.

14 તોવે પોરૂષી લોક બાઆ જાયને ઈસુલ માઅરાં હાટી યોજના બોનાડી કા, ચ્યાલ કેહેકેન આપા માઆઇ ટાકાડજે.

પોરમેહેરા નિવાડલા સેવાક

15 ઈ જાઇન ઈસુ તાઅને જાતો રિયો, એને બોજ લોક ચ્યા પાહલા ગીયા એને ચ્યાય બોદહાન હારેં કોઅયે.

16 ઈસુવે ચ્યાહાન કડાક ચેતાવણી દેની એને આખ્યાં લોકહાન ખોબાર નાંચ કોઅના કા આંચ કું હેય.

17 કા જીં વચન યશાયા ભવિષ્યવક્તાથી પોરમેહેરાય આખવામાય ચેનલા, તીં પુરાં ઓઅે:

18 “એઆ, ઓ મા સેવાક હેય, જ્યાલ માયે નિવડયોહો, મા પ્રિય, જ્યાથી મા મોન ખુશ હેય: આંચ મા આત્મા ચ્યામાય ટાકહી, એને તો ગેર ચહૂદી લોકહાન ન્યાયા ખોબાર કોઅરી

19 તો નાંચ જગડો કોઅરી, એને નાંચ તો બોંબલ્યા કોઅરી, એને નાંચ તો લોકહાવોચમાય ઘમંડાકોય બોઆયને સંદેશ હિકાડી.

20 એને તો કાદાબી નુકસાન નાંચ કોઅરી, જો ચોકા સુંદાલા બુરળ્યા રોકો નોબળો ઓરી, એને દુમાડા વાળો દિવો નાંચ ઉલવી, બાકી છેલ્લે તો ન્યાયામાય જીતી જાયના કારણ બોની.

21 એને ગેર ચહૂદી લોક ચ્યાવોય આશા રાખરી.”

ઈસુ એને બુતહા મુખ્ય સૈતાન
(માર્ક 3:20-30; લુક. 11:14-23; 12:10)

22 તોવે લોક ચોક આંદળો-મૂકો જ્યાલ બુત વોળાગલો આતો, ઈસુપાય લેય યેને, એને ઈસુય આલ હારાં કોઅયા, એને તો બોલા એને એઅરા લાગ્યો.

23 આથી બોદે નોવાય થી આખા લાગ્યે, “ઓ કા દાઉદ રાજા કુળામાઅને હેય?”

24 બાકી પોરૂષી લોકહાય ઈ વોનાઈન આખ્યાં, “ઈ તો સૈતાન જો બુતાહા મુખ્ય હેય આ મોદાત લેયા વોગાર બુતહાન નાંય તાંગાડે.”

25 તો આહા વિચાર જાંઆઈ ગીયો એને આખ્યાં કા, જ્યા બી કાદા ચોક દેશા લોક આહામાયજ કુટ પોડે તે તીં ઉજડી જાહે, એને કાદા શેહેર કા ગોઅમે કુટ પોડહે, તીં નાંય ટોકી હોકે.

26 એને જોવે સૈતાન પોતાનાજ બુતહા આરે લોડે, તે પોતાનાજ વિરુદ્ધી ઓઅઈ જાય; પાછે આ રાજ્ય કેહેકેન ટોકી રોય?

27 જોવે, આંય સૈતાન જો બુતાહા મુખ્ય હેય આ મોદાત કોઅઈ બુતહાન કાડહુ, તોવે તુમહે પીડી કા મોદાતકોય કાડતેહે? આહાટી તો તુમહે ન્યાય કોઅરી.

28 જોવે આંય પોરમેહેરા આત્મા મોદાતકોય બુત કાડહુ, તોવે પોરમેહેરા રાજ્ય તુમહે પાહી યી ચુકલા હેય.

29 કાદોબી સૈતાના હારકા તાકાતવાળા માઅહા ગુઉ લુટી નાંય હોકે, જાવ લોગુ આ તાકાતવાળા માઅહાન આરવાહાટી એને બાંદાહાટી તાકાતવાળો નાંય રોય, તોવે તો આ ગોઅમેને બોદાંજ લુટી લેય હોકહે.

30 જું માઅહું મા આરે નાંય હેય, તો મા વિરુદ્ધમાય હેય, એને જું માઅહું મા આરે ગોળો નાંય કોઅે તો વેરેહે.

31 આહાટી આંય તુમહાન આખહુ કા માઅહા બોદા જાત્યા પાપ એને નિંદા માફી મિળી જાય, બાકી પવિત્ર આત્મા નિંદા માફ નાંય કોઅવામાય યી.

32 જું કાદાં માઅહા પોહા વિરુદ્ધમાય વાત આખી, આ ઓ પાપ માફ કોઅવામાય યી, બાકી જું પવિત્ર આત્મા વિરુદ્ધમાય બોલી, આ પાપ

નાંય તે યા લોકહામાય એને નાંય તે પરલોક માય માફ કોઅવામાય યી.

જોહડા જાડ તોહડા ફળ
(લુક. 6:43-45)

33 “જોવે જાડ હારાં હેય, તોવે ય્યા ફળબી હારાં હેય, એને જાડ નોકામ્યા હેય, તોવે ફળબી નોકામ્યા હેય; કાહાકા જાડ ય્યા ફળ કોય વોળખાયેહે.

34 ઓ જેરીવાળા હાપડા રોકહાય, તુમા જુઠા ઓઇન કેહેકેન હારી વાત આખી હોકતાહા? કાહાકા જો મોનામાય બોઅલાં હેય, તીં મુયામાય યેહે.

35 યોક હારાં માઅહું મોના હારાં ભંડારા માઅને હાર્યો વાતો કાડહે, એને જુઠા માઅહું જુઠા ભંડારામાયને જુઠયો વાતો કાડહે.

36 એને આંય તુમહાન આખતાહાવ કા, જ્યો-જ્યો નોકામ્યો વાતો માઅહું આખી, ન્યાયા દિહીહયામાય એ બોદયે વાતહે ઇસાબ લેવામાય યી.

37 કાહાકા તું પોતા આખલી વાતહે કોઅઇ નિર્દોષ, એને પોતા આખલી વાતહે કોઅઇ દોષી ઠોરવામાય યી.”

હોરગ્યા રાજ્યા નિશાણી માગી બાકી નાંય દેની
(માર્ક 8:11-12; લુક. 11:29-32)

38 પાછે મૂસા નિયમ હિકાડનારા ગુરુ એને પોરૂષી લોક ઈસુવાપાય યેના ય્યાઆરે યર્યા કોઅતા લાગ્યા, એને ય્યાહાય માગણી કોઅયી કા, “ઓ ગુરુ, આકાશા એહેરે મોઠે ચમત્કાર દેખાડ, ય્યા ઈસુલ ફોસવા હાટી ઈ માગણી કોઅઇ રીયલા આતા.”

39 ય્યાય ય્યાહાન જાવાબ દેનો, “ઈ પીડી ખારાબ એને વ્યબિચારી લોક ચમત્કાર હોદતેહે, બાકી યોના ભવિષ્યવક્તા આરે જો જાયા ય્યાલ છોડીન બિજાં કાય ચિન્હ નાંય દેવાય.

40 યોનો ત્રીન રાત-દિહી માછલ્યે બુકામાય રિયો, તેહેકોયજ આંય, માઅહા પોહો ત્રીન રાત-દિહી દોરત્યેમાય રિયો.

41 નીનવે શહેરા લોક ન્યાયા દિહી યા પીડી લોકહાઆરે ય્યા દોષી ઠોરવી, કાહાકા ય્યાહાય યોના આખલ્યા વોનાયને પાપ છોડયા, એને

એરા, ઓ તો હેય જો યોના કોઅતો મોઠો હેય, બાકી તુમા પાપ છોડાહાટી મોનાઈ કોઅતેહે.

⁴² દક્ષીણ રાણી ન્યાયા દિહી યે પીડી લોકહાઆરે ઉઠીન ચ્યાહાન દોષી ઠોરવી, કાહાકા તી સુલેમાના જ્ઞાન વોનાયા હાટી બોજ દુરથી યેનેલ, એને એઆ, ઈહીં તો હેય, જો સુલેમાના કોઅતો મોઠો હેય, બાકી તુમા પાપ છોડાહાટી મોનાઈ કોઅતેહે.”

બુતા પાછા યેઅના

(લુક. 11:24-26)

⁴³ “જોવે બુત માઅહા માઅને નિંગી જાહે, તોવે ઉજાડ જાગામાય આરામ હોદતા ફિરહે, બાકી મીળે નાંય.

⁴⁴ તોવે પોતે પોતાલુજ આખહે, આંય જ્યા માઅહા માઅને યેનેલ, તાંજ ફિરી જાહીં, એને ફિરી યેઇન ચ્યાલ ચ્યા માઅહા જીવન ગાઆ રોકા દેખાયેહે જીં ચોખ્ખાં, સોબાડલા, એને રીકામા હેય.

⁴⁵ તોવે તીં જાઅને ચ્યે કોઅતા વોદારે હાંત બુતાહાલ લી યેહે, એને ચ્યે ચ્યા માઅહામાય ઉરાય જાતહે, એને તાંજ રોતેહે, ચ્યા માઅહા પાછલી દશા પેલ્લા કોઅતાબી ખારાબ બોની જાહે, યા પીડી ખારાબ લોકહા બી દશા એહેકેનુજ ખારાબ ઓઅરી.”

ઈસુવા આયહો એને ચ્યા બાહા

(માર્ક 3:31-35; લુક. 8:19-21)

⁴⁶ જોવે ઈસુ ચ્યે ગીરધે આરે વાતો કોઅતોજ આતો તોવે ચ્યા આયહો એને બાહા યેના, એને બાઆ ઉબે રિયે એને ચ્યાઆરે વાતો કોઅરા માગતે આર્તે.

⁴⁷ કાદાય ચ્યાલ આખ્યાં, એએ તો આયહો એને બાહા બાઆ ઉબે રીઅલે હેર્તે, એને તોઆરે વાતો કોઅરા માગતેહે.

⁴⁸ ઈ બોદા વોનાઈન આખનારાલ જાવાબ દેનો, “કું હેય મા આયહો? એને કું મા બાહા?”

⁴⁹ એને ચ્યા શિષ્યહા એછે ચ્યા આથ લાંબો કોઇન આખ્યાં, “એઆ, યે મા આયહો એને મા બાહા હેય.

⁵⁰ કાહાકા જીં કાદાં હોરગ્યા આબહા ઇચ્છા પુરી કોઅહે, તીંજ મા બાહા, એને મા બોઅહી એને મા આયહો હેય.”

13

બિયારો પોઅનારા દાખલો
(માર્ક 4:1-9; લુક. 8:4-8)

- 1 તોદિહી ઈસુ ગોઅરે નિંગીન દોરિયા મેરે જાયને બોઠો.
- 2 તોવે આપાય બોજ મોઠી ગીરદી બેગી ઓઈ ગીયી, કા તો ઉડીમાય ચોડી ગીયો, એને બોદે માઅહે મેરાવોય ઉબે રિયે.
- 3 એને ઈસુવે આહાન દાખલો દેયન બોજ વાતો હિકાડયો: “ચોક ખેડુત, બિયારો પોઆ રાનામાય ગીયો
- 4 એને પોએ તોવે કોલોહોખાન બિયારો વાટે મેરે પોડયો, એને ચિડે પોડીન તીં ખાય ગીયે.
- 5 એને કોલોહોખાન બિયારો ખડકાવાળી જમીનમાય પોડયો, તાં કાદુ ઓછો આતો, આહાટી બિઇ તારાતુજ ઉદી નિંગ્યા, કાહાકા તાં કાદુ ઉડે લોગુ નાંય આતો.
- 6 બાકી બોપરેહે દિહી ચોડયો એને તીડકો લાગ્યો તોવે તારાત તીં કોમાઈ ગીયા, એને મુળે નાંય બોઠે આહાટી તીં ઉખાઈ ગીયા.
- 7 એને કોલોહોખાન બિયારો કાટાહા જેખરાહામાય પોડયો, એને કાર્ટે વોદી ગીયે એને દાબાઈ ગીયો.
- 8 કોલોહોખાન બિયારો હારી જમીનમાય પોડયો, એને હારાં પાક્યા, કોલાહાક તીહી ગોણા, કોલાહાક હાંઈટ ગોણા, કોલાહાક હોવ ગોણા.
- 9 જ્યા વોનાયા હાટી તિયાર હેય આ વોનાય લેય.”

દાખલો દેઅના હેતુ
(માર્ક 4:10-12; લુક. 8:9-10)

- 10 તોવે શિષ્યહાય ઈસુવા પાહાય યેઇન આલ આખ્યાં, “એલહાન તું કાહા દાખલાહામાય નોકીજ હોમજાડતોહો?”
- 11 ઈસુવે જાવાબ દેનો, “તુમા તે પોરમેહેરા રાજ્યા દોબલી વાતો જાંઅતાહા, બાકી જ્યા માયેવોય બોરહો નાંય કોઅેત આ નાંય જાંઅે.”
- 12 કાહાકા જ્યા પાય હોમાજ હેય, તો વોદારી હોમાજ મેળવી, બાકી જ્યા પાય કાય હોમાજ નાંય મીળે, આપાય જું વોછીબી હોમાજ ઓરી તીં બી આપાઅને ખોવાય જાય.

13 આંય ચ્યાહાન દાખલાહા માંયજ હોમજાડતાહાવ, કાહાકા ચ્યા એએયા કોઅતાહા બાકી જાંએ નાંય, એને વોનાતાહા બાકી હોમજેત નાંય.

14 ચ્યાહા બારામાય યશાયા ભવિષ્યવક્તા આખલી ઈ ભવિષ્યવાણી પુરી ઓઅહોય: તુમા કાનાહાકોય તે વોનાયા, બાકી હોમજાહા નાંય; ડોળાહાકોય એએહા, બાકી તુમહાન હુજ નાંય પોડી.

15 કાહાકા યા લોકહા મોન કોઠાણ બોની ગીયહા, એને ચે કાનાહાકોય વોછા વોનાતેહે, એને ચ્યાહાય પોતે ડોળા મીચી લેદહા, કા એહેકેન નાંય ઓએ કા ડોળાકોય એઅતા લાગે, કાનાકોય વોનાતા લાગે, મોનાકોય હોમજે, એને મા એછે વોળી ચેય કા આંય ચ્યાહાન હારાં કોઅહુ.

16 બાકી તુમહે ડોળા ધન્ય હેય, કાહાકા ચ્યા એઅતાહા; એને તુમહે કાન ધન્ય કાહાકા ચ્યા વોનાતાહા.

17 કાહાકા આંય હાચ્યાં આખતાહાવ, બોજ ભવિષ્યવક્તા એને ન્યાયી લોકહાય તુમા જીં એઅતાહા તીં એરા ઇચ્છા રાખી, બાકી નાંય એએઈ હોક્યા એને તુમા વોનાતાહા તીં વોનાયા બોજ ઇચ્છા આતી, બાકી નાંય વોનાય હોક્યા.

બિયારો પોઅનારા દાખલો હમજાડના
(માર્ક 4:13-20; લુક. 8:11-15)

18 “આમી તુમા પોઅનારા દાખલો વોનાયા.

19 વાટેમાય પોડલો બિયારો ચ્યા હારખા હેતા, જીં માઅહું વચન વોનાયે બાકી તારાતુજ સૈતાન ચેઇન ચ્યાહા મોનામાઅને વચન વિહરાવી દેહે.

20 બિજા લોક ખડકાવાળી જાગા હારકા હેય જાં વોછોજ બિયારો પોડહે, યાહાટી ચે વચન વોનાયને તારાતુજ આનંદથી માની લેતહે,

21 બાકી પોરમેહેરા વચન ચ્યાહા મોનામાય ઉંડે નાંય ઉત્યા, ચ્યાહાટી ચે વોછા દિહાપુરતે રોતેહે, ચ્યા પાછે પોરમેહેરા વચના લેદે જોવે ઓડચણ કા દુઃખ ચેહે તોવે ચે તારાતુજ ટાકી પોડતેહે.

22 બિજા લોક કાટાહા જેખરાહા હારકા હેય, ચ્યાહાય તે વચન વોનાય લેદા, એને જીવના બારામાય ચિંતા, પોયહા લોબ, એને બીજી

લાલચ યેઇન પોરમેહેરા વચનાલ દાબી દેના, એને યે નોકામ્યા જીવન જીવતેહે.

23 બિજા લોક હારી જમીની હારકા હેય, પોરમેહેરા વચન વોનાઈન હોમજેહે, એને ફળબી દેહે; કાદા હોવ ગોણા દેય, કાદા હાઈટ ગોણા, એને કાદા તીહી ગોણા દેય.”

ગોંવ એને કડવા દાણા

24 ઈસુવાય ચ્યાહાન બિજો દાખલો દેનો કા, “હોરગા રાજ્ય ચ્યા બિયારો પોઅનારા ખેડુતા હારકા હેય જ્યાંય ચ્યા પોતાના રાનામાય હારો બિયારો ટાક્યો.

25 બાકી બોદા લોક હૂવી રીઅલા આતા, તોવે ચ્યા દુશ્માન રાતી યેઇન જાં ગોંવ પોઅલા આતા ચ્યાહામાય ટોળ્યા બિયારો પોઅોઈ નાહો.

26 તે જોવે બિયારો ઉઘો એને નીહીવાય પોડ્યા, તોવે ટોળ્યા દેખાયાં.

27 તોવે માલિકાપાય જાયને આવત્યાહાય આખ્યાં કા, માલિક, આમહાય તે રાનામાય હારો બિયારો પોઅોયેલ, તે આમી ટોળ્યા કેછને યેના?

28 ચે આખ્યાં, ઈ તે ચોકતા દુશ્માના કામ ઓરી આવત્યાહાય પુછ્યાં, તોવે આમા કાય કોઅજે? આમા જાયને ઉદલા ટોળ્યાલ ઉપડાવી ટાકજે કા?

29 ચે જાવાબ દેનો, નાંય, એહેકેન નાંય કોઅતા, કાય ઉદલા ટોળ્યા ઉપડાવત્યે વેળે ગોંવ બી ઉપડી ટાકે.

30 ચ્યાહાટી પાકે તાંવ લોગુ બેન્યાહાલ આરેજ વોદા દિયા, એને વાડત્યે વેળાયે વાડનારાહાન આંય આખહી, કા ટોળ્યાલ પેલ્લા બેગા કોઆ એને બાળી ટાકાંહાટી પૂળા બાંદા બાકી ગોંવ મા વોખારમાય બેગા કોઆ.”

રાયે દાણા દાખલો

(માર્ક 4:30-34; લુક. 13:18-21)

31 આજુ ચોક દાખલો આખ્યો, “હોરગા રાજ્ય ચોક રાયે દાણા હારકા હેય, રાયે દાણો લેઈને કાદે પોતાના રાનામાય પોઅયા.

32 બોદા બીયારાહામાય વાહાનો બિયારો હેય, બાકી ઉદહે તોવે તીં બોદા જાડવાહામાય મોઠા જાડ બોની જાહાય, એને આકાશમાય ઉડનારે ચિડેં યેઇન ચ્યા ડાળખ્યેહેવોય ગોરો કોઅતેહે.”

ખમીરા દાખલો (લુક. 13:20-21)

33 આજુ બિજો દાખલો ચ્યાહાન દેનો, “હોરગા રાજ્ય ખમીરા હારકા હેય જ્યાલ ચોક થેએયે લેઈને તીન માપ (તીન ચોપે) કુટામાય મોગલી દેના, એને બોદા ખમીર ઓઅઇ ગીયા.”

દાખલાહા વાપાર કોઅના

34 એને જોવેબી ઈસુ પોરમેહેરાબારામાય વાત આખે, તોવે દાખલા દેયન આખે.

35 જ્યેથી ભવિષ્યવક્તાથી આખલા વચન પુરાં ઓઅે, ચ્યાહાટી કા, “આંચ દાખલા દેયન વાત આખહી, જોવેને આકાશ એને દોરતી ઉસબાડી તોદરીહી દુબાડલી વાત આંચ દેખાડીહી.”

ઈસુ કડવા દાણા એટલે કાય તીં હુમજાડેહે

36 જોવે ઈસુ લોકહાન છોડીન ગોઅમે ગીયો, તોવે ચ્યા શિષ્ય ચ્યાપાય ચેના એને ચ્યાહાય ચ્યાલ આખ્યાં, “ટોળ્યાવાળો દાખલો આમહાન હોમજાડી દે.”

37 ઈસુવે આખ્યાં, “હારો બિયારો પોઅનારો ખેડુત માઅહા પોહો એટલે આંચ હેય.

38 રાન દુનિયા લોક હેય, હારો બિયારો પોરમેહેરા રાજ્યા લોક હેય. ટોળ્યા એટલે ચ્યા સૈતાના લોક હેય.

39 એને જ્યા દુશ્માનાય ટોળ્યા પોઅયા તો સૈતાન હેય, વાડણી ઈ દુનિયા છેવાટ હેય, એને વાડનારા હોરગા દૂત હેતા.

40 જોહેકોય ટોળ્યાલ વાડીન બેગો કોઇન આગડામાય હોલગાડી દેતહે, તેહેકોય દુનિયા છેલ્લા દિહીહયામાય ઓઅરી.

41 આંચ, માઅહા પોહો મા હોરગા દૂતહાન દોવાડીહી, એને ચ્યા રાજ્યમાઅને બોદા ઠોકારાહા કારણાહાલ એને પાપ કોઅનારાહાન ઓટાડી દી.

42 એને હોરગા દૂત આગડા બાઠયેમાય ટાકી દેઅરી, તાં રોડના એને દાત કોકડાવના હેય.

43 બાકી પોરમેહેરા લોક ચ્યાહા આબહા રાજ્યામાય દિહા હારકા ચોમકી, જ્યા વોનાયા હાટી તિયાર હેય ચ્યા વોનાય લેય.”

દોબાડલ્યે મિલકાતે દાખલો

44 હોરગા રાજ્યા રાનામાય દોબાડલ્યે મિલકાતે હારકા હેય, જોવે યોકા માઅહાન તીં મિળ્યાં, તે આ માઅહાય પાછા દોબાડી દેના, એને આનાંદથી જાયને આ બોદાંજ કાય વેચિન, આ રાનાલ વેચાતાં લેદા જ્યામાય આય મિલકાત દોબાડલી આતી.

મોઅગા હિરહા દાખલો

45 આજુ હોરગા રાજ્ય યોક વેપાર્યા હારકા હેય તો જ્યા હારાં હિરા હોદના માય આતો.

46 જોવે આલ બોજ કિમતી હિરો જોડયો તોવે તો ગીયો એને બોદી માલમિલકાત વેચી દેચન, તો હિરો વેચાતો લેદો.

માછે માઅના જાળે દાખલો

47 પાછી હોરગા રાજ્ય માછે દોઅના જાળે હારકા હેય, જું દોરિયામાય ટાકી, એને જાળ્યેમાય બોદી જાત્યે માછલે ચેય ગીયે.

48 એને જોવે જાળ બાઆય જાય તોવે માછે દોઅનારા જાળ મેરે તાણી લેય ચેના, એને બોહીન હારે-હારે માછલે ટોપલાહામાય બોઅરા લાગ્યા, એને નાંચ હારે માછલે ટાકી દેને.

49 દુનિયા છેલ્લે એહ્જકોય બોની, હોરગા દૂત ચેઇન હારાં માઅહાન પાપી લોકહામાઅને જુદા કોઅરી.

50 એને પાપી લોકહાન આગડા બાઠયેમાય ટાકી દી, તાં રોડના એને દાત કોકડાવના હેય.

જુના એને નવા કાય હેય આ હિકાડના મોતલાબ

51 “કાય તુમા ઈ બોદા હોમજી ગીયા?” આહાય આખ્યાં, “હોમાજજેહે.”

52 તોવે ઈસુવે આહાન આખ્યાં, “દરેક યોક જો મૂસા નિયમ હિકાડનારા ગુરુ જો હોરગા રાજ્યા શિષ્ય બોન્યો, તોવે તો આ ગોઆ માલિકા હારકો હેય, જ્યા બેની નોવી એને જુની શિક્ષા ચે જાગાવોચને બાઆ કાડહે, જાં તો બીજહાન મોદાત કોઅરાહાટી આહાન ચોકઠી કોઅહે.”

નાસરેતામાય ઈસુવા નાકાર

(માર્ક 6:1-6; લુક. 4:16-30)

53 જોવે ઈસુવે બોદા દાખલા પુરાં કોઅયા, તોવે તો કાપરનાહુમ શેહેરામાઅને ચાલ પોડયો.

54 એને પોતાના ગાવામાય ગીયા, એને ચ્યાહા સોબાયે ઠિકાણે હિકાડતો લાગ્યો, ચ્યા હિકાડના બારામાય ચ્યાહાન બોજ નોવાય લાગી એને ચ્યા આખતા લાગ્યા કા, “એલાલ ઓલા જ્ઞાન એને ઓલા ચમત્કાર કોઅરા ગોતી કેછને મિળી?”

55 કાય એલો હુતાર્યા પોહો હેય કા નાંચ? એલા આયહે નાંવ મરિયમ હેય કા નાંચ? એને એલા બાહા યાફૂબ એને યોસેસ એને સિમોન એને યહૂદા હેય કા નાંચ?

56 એને એલા બોઅયોહો આમહે આરે હેત્યો કા નાંચ? ચ્યાલ ઈ બોદા કેછને મિળ્યા?”

57 એને ચ્યા બારામાય ચ્યાહાય ઠોકાર ખાદી, બાકી ઈસુવે ચ્યાહાન આખ્યાં, “ભવિષ્યવક્તાલ બોદે માન દેત, ચ્યા ગાંવ એને પોતાના ગોઆશિવાય કેસુજ માનાવોગાર્યા નાંચ રોત.”

58 એને ચ્યાહા વોછા બોરહા લેદે, ચ્યે તાં વોછે ચમત્કારા કામે કોઅયે.

14

હેરોદ રાજા ઈસુવા બારામાય વોનાયો

(માર્ક 6:14-29; લુક. 9:7-9)

1 ચ્યે દિહી ચૌથાઈ દેશા હેરોદ રાજા ઈસુ મોઠા કામહા બારામાય વોનાયો,

2 એને ચ્યે ચ્યા ચાકારાલ આખ્યાં, “ઓ યોહાન બાપતિસ્મા દેનારો હેય, જો મોઅલા માઅને પાછો ઉઠયોહો યાહાટી ચ્યા આથે મોઠે ચિન્હે ઓઅતેહે.”

બાપતિસ્મા દેનારા યોહાના મોરણ

3 ઓ તો હેરોદ રાજા આતો જ્યાંચ ચ્યા બાહા ફિલિપા થેએ હેરોદિયાસ રાણેલ પોતાની થેએ બોનાવી લેદેલ, ચ્યાહાટી હેરોદે યોહાન બાપતિસ્મા દેનારાલ દોઅોયેલ એને બાંદિન જેલેમાય કોંડાડી દેનેલ.

4 કાહાકા યોહાન બાપતિસ્મા દેનારાય હેરોદ રાજાલ આખ્યેલ, તો પોતે બાહા થેએ તો રાખના ઠીક નાંચ.

5 એને ચ્યાલ માઆઇ ટાકાં માગતો આતો, બાકી ચ્યાલ લોકહા બિક આતી, કાહાકા લોક ચ્યાલ ભવિષ્યવક્તા હેચ એહેકેન માનેત.

6 પાછે જોવે હેરોદા જન્મા દિહી યેનો તોવે હેરોદિયાસ રાણ્યે પોહ્યે બોદા ટોળા આગલા નાચી દેખાડયાં એને ચ્યે હેરોદ રાજાલ ખુશ કોઅયો.

7 ચાહાટી હેરોદ રાજાય કોસામ ખાયન આખ્યાં કા, “તું જું કાય માગહે, તીં આંચ દિહી.”

8 ચ્યે આચહે ચ્યેલ હિકાડયાં ચ્યાપરમાણે ચેઇન ચ્યેચ આખ્યાં, “યોહાન બાપતિસ્મા દેનારા ટોલપા વાડીન થાળ્યેમાય ઈહીંજ લેચ ચેચ દે.”

9 રાજાલ દુઃખ લાગ્યા, બાકી જ્યાહાલ ચ્યે હાદલા ચ્યાહા હામ્મે ચ્યે કોસામ ખાદેલ, ચ્યાહાટી આગના કોઅયી, કા દેચ દે.

10 એને સીપાડાલ દોવાડીન યોહાન બાપતિસ્મા દેનારા ટોલપી વાડીન લાંહાટી રાજાય જલેમાય દોવાડયો.

11 એને ચ્યા ટોલપા થાળ્યેમાય થોવિન પોહ્યેલ દેચ દેની, એને તી ટોલપી ચ્યે આચેહેપાય લેચ ગીચી.

12 પાછે યોહાના શિષ્યહાન ખોબાર પોડી, કા યોહાનાલ માઆઇ ટાક્યોહો તોવે ચ્યા યેના, એને ચ્યા કુડી લેઈને ચ્યાહાય તી માહણામાય દાટી દેની, પાછે ઈસુવાપાય જાયને ખોબાર દેની.

ઈસુ પાય ઓજાર માઅહાન ખાવાડેહે

(માર્ક 6:30-44; લુક. 9:10-17; યોહા. 6:1-14)

13 જોવે ઈસુવાલ ઈ ખોબાર મિળી તોવે તાઅને તો ઉડીમાય બોહીન, ચોક ઉજાડ જાગામાય માઅહા પાયને આલાગ નિંગી ગીચો, બાકી લોકહાન ચ્યા ખોબાર પોડી, એને ચ્યાહા શેહેરામાઅને ચ્યા પાગે ચાલીન ચ્યા પાહલા યેના.

14 જોવે તો મેરાવોચ પોઅચ્યો, તોવે બોજ માઅહા ટોળો એઅયો, એને ચ્યાહાવોચ ચ્યાલ દયા યેની એને જ્યે દુઃખ્યે આર્તો, ચ્યે ચ્યાહા દુખાહાન હારાં કોઅયા.

15 એને જોવે દિહી બુડા લાગલો તોવે ચ્યા શિષ્યહાય ઈસુવાપાય ચેઇન આખ્યાં “ઉજાડ જાગો હેચ, એને દિહી બુડા વાય રિચહો. લોકહાન જાં દે કા ચોમખી ગાવહામાય એને ફોળ્યે-ફોળહ્યે માય જાયન ખાઅના વેચાતાં લેચ ચેચ હોકે.”

16 બાકી ઈસુવે ચ્યાહાન આખ્યાં, “ચ્યાહા જાઅના જરુર નાંય હેય, તુમાંજ ચ્યાહાન ખાઅના દિયા,”

17 બાકી ચ્યાહાય ચ્યાલ આખ્યાં, “ઈહીં આમહાપાય પાંયુજ બાખ્યો એને બેન માછલે હેતે.”

18 ઈસુચ ચ્યાહાન આખ્યાં, “ચ્યાહાન માયેપાંય લેય યા.”

19 પાછે ચ્યાય માઅહાન ગાહીયાવોય બોહતે કોય દેને, એને પાય બાખે એને બેન માછલે લેદે, એને હોરગા એછે એઈન પોરમેહેરા આભાર માન્યા એને કુટકા કોઈન શિષ્યહાન દેના, એને શિષ્યહાય લોકહાન વાટી દેના.

20 બોદહાય ખાદાં એને દારાઈ ગીયે, એને ચ્યાહાય ઉગારલા ટુકડાહાન બેગા કોઅયા, તે બારા ટોપલ્યો બોઆય ગીયો.

21 એને ખાનારે થેઅયો એને પાહાહાન છોડતા માટડા લગભગ પાય ઓજાર આતા.

ઈસુ પાઅયાવોય ચાલહે

(માર્ક 6:45-52; યોહા. 6:16-21)

22 એને તારાતુજ ચ્યે શિષ્યહાન ઉડીમાય બોહાડીન દોરિયા ચ્યેમેરે દોવાડયા, કા ચ્યા ચ્યાથી પેલ્લા ચ્યે મેરે જાતા રોય, જાવ હુદુ કા તો લોકહાન દોવાડી દેય.

23 એને લોકહાન જાં દેયન તો યોખલોજ યોકા ડોગાવોય પ્રાર્થના કોઅરાહાટી ચોડી ગીયો, એને રુવાળા પોડયા તોવે તો તાં યોખલોજ આતો.

24 ઉડી તે મેરાવોયને દુઉ આતા એને વારો હામ્મે આતો, તે ઉડી લાફાહા કોઈન આફળાતા જાય.

25 એને ઈસુ રાતી લગભગ ચાર વાગા ઓલહામાય તો દોરીયાવોય ચાલીન ચ્યાહાપાય યેનો.

26 બાકી જોવે શિષ્યહાય ઈસુલ દોરિયા ઉપે ચાલતા દેખીન, ચ્યા બોંબલી ઉઠયા કાહાકા ચ્યાહાય ચ્યાલ બુત જાંઆયો, એને ચ્યા ગાબરાય ગીયા.

27 કાહાકા બોદાજ ચ્યાલ દેખીન ગાબરાઈ ગીઅલા આતા, બાકી તારાતુજ ઈસુવે ચ્યાહાન હાત કોઈન આખ્યાં, “ઈમાત રાખા, આંય ઈસુ હેતાઉ ગાબરાયાહા મા.”

28 પિત્તરે જાવાબ દેનો કા, “ઓ પ્રભુ, જોવે તુંજ હેય તે, માન તોપાય યાહાટી પાઅયા ઉપને ચાલા આગના કોઓ.”

29 અ્યેય આખ્યાં, “ચે,” તોવે પિત્તર ઉડીમાઅને ઉત્યો એને પાઅયા ઉપે ચાલતો ઈસુવા એછે જાં લાગ્યો.

30 બાકી જોરમાય વારો ચેતો દેખીન તો બિઇ ગીયો, એને જોવે તો બુડતો લાગ્યો તોવે બોંબલીન આખ્યાં, “ઓ પ્રભુ, માન બોચાવ.”

31 ઈસુવે તારાત આથ લાંબો કોઅઈન ચ્યાલ દોઅયો એને ચ્યાલ આખ્યાં, “ઓ ઓછા બોરહાવાળા, તુચે કાહા સંદેહ કોઅયો?”

32 એને જોવે ચ્યા ઉડીમાય ચોડી ગીયા, તોવે વારો બોંદ ઓઅઇ ગીયો.

33 જ્યા ઉડીમાય આતા, ચ્યાહાય ચેયન ભક્તિ કોઇન આખ્યાં, “હાચ્યોજ, તું પોરમેહેરા પોહો હેય.”

ઈસુ ગેનેસારેતમાય માંદાહાલ હારો કોઅહે

(માર્ક 6:53-56)

34 જોવે ઈસુ એને ચ્યા શિષ્ય ચોક્યે ઉડીમાય ગાલીલા દોરિયામાય આજુ આગલા ગીયા એને ચ્યા ગેનેસારેત ભાગામાય ચેય પોઅચ્યા.

35 તાઅને લોકહાય ચ્યાલ વોળખીન, એને બોદા વિસ્તારામાય ખોબાર દોવાડી, એને બોદા દુઃખ્યાહાન ચ્યાપાય લેય ચેના.

36 એને ચ્યા રાવ્યો કોઅતા લાગ્યા કા તો ફાડકા છેડાલ આથ લાવાં દે; એને જોલે ચ્યા ફાડકાલ આથ લાવેત ચ્યા બોદહા બોચાવ ઓઅઇ ગીયો.

15

આગલ્યા ડાયહા રુડી પરમ્પરા પાળના સાવાલ

(માર્ક 7:1-23)

1 ચોક દિહી કોલહાક મૂસા નિયમ હિકાડનારા ગુરુ એને પોરૂષી લોક ચેરૂસાલેમ શેહેરમાઅને ચેનલા આતા, ઈસુપાય બેગો જાયા, યાહાટી પોરૂષી લોક એને મૂસા નિયમ હિકાડનારા ગુરુવાહાય ઈસુલ પુછ્યાં.

2 “તો શિષ્ય આમે વડીલાહા પરમ્પરા કાહાનાય માનેત? ચ્યા હારેકોય આથ દોવ્યા વોગાર મેલા આથહા કોય બાખે ખાતહા”

૩ ઈસુવે ચ્યાહાન જાવાબ દેનો, તુમા પોરમેહેરા આગના પાળના છોડી દેતહા કા “તુમા તુમહે રીવાજેકોય કામ કોઅઇ હોકે.

૪ કાહાકા પોરમેહેરાય આખ્યેલ તો આયહે આબહાલ માન દે, જું માઅહું આયહે આબહાલ ગાળી દેય, ચ્યાલ હાચ્યાંજ માઆઇ ટાકવામાય ચી.

૫ બાકી તુમા આખતાહા કા જું માઅહું આપહે આબહાલ એહેકેન આખહે, તુમહાન માયે પાયને જું કાય મિળી હોકતા આતા, તી પોરમેહેરાલ બેટ ચોડવી હોકધા.

૬ તે તો ચ્યા આબહા આદર નાંય કોઅે, એહેકેન તુમહે વડીલાહા રુડી પાળાહાટી તુમા પોરમેહેરા નિયમશાસ્ત્ર પાળના છોડી દેતહા.

૭ ઓ ડોંગી લોકહાય યશાયા ભવિષ્યવક્તાય તુમહે બારામાય હાચ્યાં આખ્યેલ કા.

૮ ચ્યા લોક મા બારામાય બોજ હારાં બોલતાહા બાકી ચ્યા માયેવોય હાચ્યાં પ્રેમ નાંય કોઅેત.

૯ એને ચ્યાહા ભક્તિ માંહાટી નકામી હેય, કાહાકા ચ્યા માઅહાથી બોનાડલા નિયામાહાન પોરમેહેરા નિયમા રુપામાય લોકહાન હિકાડતાહા.”

માઅહાન ખારાબ કોઅનાચો વાતો

૧૦ એને ઈસુવે લોકહાન પાહાય હાદિન ચ્યાહાન આખ્યાં, વોનાયા એને હોમજા.

૧૧ જું કાય માઅહા મુયામાય જાય ચ્યા લેદે તીં મેલાં નાંય કોઅઇ હોકે, બાકી ચ્યા મુયામાયને જું નિંગહે, તીંજ માઅહાન મેલાં કોઅહે.

૧૨ તોવે શિષ્યહાય ઈસુવાપાય ચેયન ચ્યાલ પુછ્યાં, “કાય તુમહાન ખોબાર હેય કા ઈ વાત વોનાઈન પોરૂષી લોકહાન જુઠા લાગ્યહાં?”

૧૩ બાકી ચે જાવાબ દેનો જું જાડ મા હોરગા આબહે નાંય રોપધા ચ્યાલ ઉપડી ટાકી.

૧૪ પોરૂષી લોકહા પાયને દુઉ રા, એલા આંદળા વાટ દેખાડનારા હેતા, જોવે આંદળા આંદળાલ લેય જાય તોવે બેની ખાડામાય પોડી.

૧૫ ઈ વોનાયને પિત્તરાય ઈસુલ આખ્યાં, “આમહાન ઓ દાખલો હોમજાડી દે.”

16 ઈસુવે શિષ્યહાન આખ્યાં, “કાય એહેકેન તુમહાનબી નાંય હોમજાય?

17 કાહાકા તીંચ્યાહા મોનામાય નાંય જાય, બાકી ચ્યા બુકામાય જાહે, એને પાછે તીં ઝાડાવાટે બાચા નિંગી જાહે.”

18 માચહું જીં વિચાર કોચહે, આખહે એને કોચહે, તીંજ માચહાન પોરમેહેરા હામ્મે મેલાં કોચહે.

19 કાહાકા ચ્યા મોનામાચરે ખારાબ વિચાર, ખૂન, વ્યબિચાર, લુચ્યાઈ, ચોરી, જુઠી સાક્ષી, નિંદા ઓહડે બોદે પાપે નિંગતેહે.

20 ઓહડે બોદે પાપ માચહાન મેલાં કોચતેહે, બાકી આથ દોવ્યા વોગાર ખાચના ખાચનાં માચહાન મેલાં નાંય કોચે.

કનાની જાત્યે બાયે બોરોહો (માર્ક 7:24-30)

21 એને ઈસુ તાચને નિંગીન સુર એને સિદોન નાંવા શહેરા આજુ-બાજુ વિસ્તારામાય ગીયો.

22 એને એઆ, ચ્યા દેશા ચોક કનાની બાય ચેની એને બોંબલીન આખા લાગી, “ઓ પ્રભુ દાઉદ રાજા કુળા પોહા, માયે ઉપે દયા કોઓ, મા પોહયેલ બુત બોજ દુઃખ દેહે.”

23 બાકી ઈસુ ઠાવકોજ રિયો એને કાયજ નાંય બોલ્યો, તોવે ચ્યા શિષ્યહાય ચ્યા પાહાય ચેચન વિનાંતી કોઇન આખ્યાં, “એલ્યે થેએયેલ દોવાડી દે, આમે પાહલા બોંબાલતી ચેહે.”

24 ઈસુવે જાવાબ દેનો, “પોરમેહેરે માન ઈસરાયેલ દેશા ચ્યા લોકહા પાય દોવાડયો જ્યા ટાકાલા ગેટાહા રોકા હેચ.”

25 બાકી તી બાઈ ચેની, ચ્યા પાગે પોડીન આખ્યાં ઓ પ્રભુ, માન મોદાત કોઓ.

26 ચ્યાય જાવાબ દેનો કા, “પાહાહા પાયને ખાચના માગના એને કુતરાહાલ ખાવાડના ઠીક નાંય હેચ.”

27 એ બાઈચ આખ્યાં, “હાચ્ચી વાત હેચ પ્રભુ, બાકી પાહાહા આથામાયને પોડલા ટુકડાહા ચૂરો કુત્રે ખાતહે. જીં ચ્યા માલિકા ટેબાલા ઉપેથી પોડલાં રોહે.”

28 તોવે ઈસુવે એલ આખ્યાં, “બાઈ તો હાચ્ચો બોરહો હેય, તો માગણી પરમાણે ઓઅઇ જાય.” એને એ પોહી એજ સમયે હારી ઓઅઇ ગીયી.

ઈસુ જાત જાત્યા માંદાહાલ હારે કોઅહે

29 એને તાઅને નિંગીન ઈસુ ગાલીલ દોરિયા પાય યેનો, એને ડોગાવોય ચોડીન તાં બોહોઈ ગીયો.

30 બોજ માઅહે લેગડાહાન, પાંગળ્યાહાલ, આંદળાહાન, મુકાહાન એને બીજે બોજ દુખ્યાહાન ચ્યાપાય લેય યેના, એને ચ્યા પાગહા પાહી થોવ્યા એને ઈસુવે ચ્યા બોદહાન હારાં કોઅયા.

31 આર્મી: જોવે માઅહાય મુકાહાન બોલતા દેખ્યા, પાંગળ્યાહાલ ચાલતા એને આંદળા દેખતા ઓઅયા, તોવે ચ્યાહાન નોવાય લાગી, એને ચ્યા ઈસરાયેલ દેશા પોરમેહેરા સ્તુતિ આખતા લાગ્યા.

**ચાર ઓજાર લોકહાન ખાવાડના
(માર્ક 8:1-10)**

32 ચ્યા દિહહામાય, બોજ લોક ઈસુ પાહી યેના એને ચોમખી ચોક મોઠો ટોળો બેગો જાયો, એને ચ્યાહાપાય ખાઅના નાંચ આતા, તોવે ઈસુવે ચ્યા શિષ્યહાન હાદિન આખ્યાં. “માન યા લોકહાવોય દયા યેહે, આમી તીન દિહી જાયહાં, ચ્યા માયેપાંચ હેતા, એને ચ્યાહાપાય ખાઅના કાયજ નાંચ આતા. ઈહીમાઅને કોલાહાક જાંઆ બોજ દુઉરે યેનહા, જોવે આંચ ચ્યાહાન બુખા ગોઓ દોવાડી દાંઉ, તોવે વાટેમાય ચ્યા થાકીન તાંજ ટુટી પોડી.”

33 શિષ્યહાય ઈસુવાલ આખ્યાં કા, “ચા ઉજાડ જાગામાય ઓલા બોદા લોકહાન ખાવાડા હાટી કેછને ખાઅના મીળે?”

34 ઈસુવે શિષ્યહાન પુછ્યાં, “તુમહેપાય કોલ્યો બાખ્યો હેત્યો?” ચ્યાહાય આખ્યાં, “આમહાપાય હાંત બાખ્યો હેય એને વોછે વાહને માછલે હેય.”

35 તોવે ઈસુય બોદા લોકહાન દોરત્યેવોય બોહરા આગના દેની.

36 પાછે હાંત બાખે એને માછલે લેદે એને પોરમેહેરા આભાર માનીન બાખ્યેહે ટુકડા કોઇન શિષ્યહાન વાટી દાં આખ્યાં, એને ચ્યાહાય લોકહાન વાટી દેના.

37 લોકહાય ખાદાં એને દારાઈ ગીયે, તોવે શિષ્યહાય હાંત ટોપલ્યો બોઆઈન વોદલા ખાઅના બેગા કોઅયા.

38 ખાનારે પોહ્ણે એને બાયો નાંય ગોણતા, ચાર ઓજાર માટડા આતા.

39 એને લોકહાન છોડીન ઈસુ ઉડીમાય બોહી ગીયો એને માગાદા દેશા વિસ્તારામાય ચેનો.

16

હોરગા નિશાણ્યે માગણી

(માર્ક 8:11-13; લુક. 12:54-56)

1 એને પોરૂષી લોક એને સાદૂકી લોક ઈસુવા પાહી ચેયન ચ્યાલ ફોસવા હાટી આખ્યાં, આમહાન હોરગા એહેરે મોઠે ચમત્કાર દેખાડ.

2 ઈસુવે જાવાબ દેનો, “વોખાતેહે તુમા આખતાહા, ‘વાતાવરણ હારાં ઓઅરી, કાહાકા આકાશ લાલ હેતાં’,

3 એને હાકાળ્યે સમયે આખતાહા, આજુ તોફાન ચી, કાહાકા આકાશ લાલ એને દુકાળા હેય, તુમા આકાશા ચે ચિન્હ એઇન ભેદ આખતાહા, બાકી સમાયા ચિન્હહા ભેદ કાહાનાય આખી હોકે?

4 ચે પિડયે ખારાબ એને વ્યબિચારી લોક ચમત્કાર હોદતાહા, બાકી યોના ભવિષ્યવક્તા ચિન્હ છોડીન બિજાં કાય ચિન્હ નાંય દેવાય” પાછે ઈસુ ચ્યાહાપાઅને જાતો રિયો.

પોરૂષીયાહા એને સાદૂકીયાહા ખમીર

(માર્ક 8:14-21)

5 શિષ્ય નોયે ચ્યેમેરે જાત્યે સમાયે બાખે લેઅના વિહરાય ગીયા.

6 ઈસુવે ચ્યાહાન આખ્યાં, “એઆ પોરૂષી લોકહા એને સાદૂકીયા ખમીરથી બોયાંહાટી હાયવીન રોજા.”

7 ચ્યા ચ્યાહા વોચમાય વિચાર કોઅતા એને આખા લાગ્યા, “તો એહેકેન ચાહાટી આખી રીયલો હેય કાહાકા આમેપાય પુરત્યો બાખે નાંય હેય.”

8 ઈ બોદા જાંઆઈન, ઈસુવે ચ્યાહાન આખ્યાં, “ઓ વોછા બોરહા વાળહાય, તુમા ચોક-બિજા આરે કાહા વિચાર કોઅતાહા કા આપહેવોચ બાખે નાંય હેય?

9 કાય તુમા આજુ લોગુ નાંય હોમજ્યાહા કા? કાય તુમહાન ચ્યા પાય ઓજારાહા પાય બાખ્યો નાંય ઇત હેય કા, એને નાંય કા તુમાહાય કોલ્યોહો ટોપલ્યો બોઅલ્યો?

10 એને ચ્યા ચાર ઓજાર લોકહાહાટી હાંત બાખ્યો મુડ્યો, એને નાંય કા તુમાહાય કોલ્યોહો ટોપલ્યો બોઅલ્યો?

11 તુમા કાહાનાય હોમજ્યા કા માયે તુમહાન બાખ્યે બારામાય નાંય આખલા કા, બાકી એહેકેન કા પોરૂષી લોકહા એને સાદૂકી લોકહા પાયને હાયવીન રોજા.”

12 તોવે ચ્યાહાન હોમાજ પોડ્યા કા, ચ્યે બાખે ખમીરા આરે નાંય, બાકી પોરૂષી લોકહા એને સાદૂકી લોકહા શિક્ષણાથી હાયવીન રા આખલા આતા.

પિત્તર ઈસુવાલ ખ્રિસ્ત આખીન કબુલ કોઅહે

(માર્ક 8:27-30; લુક. 9:18-21)

13 ઈસુ કેસરીયા ફિલીપીયા ભાગામાય ચેયન પોતે શિષ્યહાન પુછા લાગ્યો, “માઅહે માન, માઅહા પોહાલ કાય આખતેહે?”

14 શિષ્યહાય આખ્યાં, કાંચક લોક ચોહાન બાપતિસ્મા દેનારો આખતેહે, એને કાંચક એલીયો, એને કોલહાક ચિર્મયા ભવિષ્યવક્તા હેય ભવિષ્યવક્તામાંએને ચોક આખતેહે.

15 ઈસુવે શિષ્યહાન આખ્યાં, “બાકી તુમા માન કાય આખતાહા?”

16 તોવે સિમોન પિત્તરે જાવાબ દેનો, “તું પોરમેહેરા પોહો ખ્રિસ્ત હેય.”

17 ઈસુવે ચ્યાલ જાવાબ દેનો, “ઓ સિમોન, યોના પાહા, તું ધન્ય હેય, કાહાકા કાદે માઅહા લોય થી નાંય, બાકી મા આબહો જો હોરગામાય હેય, ઈ વાત તુલ જાણાવિહી.

18 એને આંચબી તુલ આખતાહાવ કા તું પિત્તર હેય, (ચુનાની ભાષામાય પિત્તર એટલે દોગડા ટુકડો હેય) એને આંચ યા દોગાડાવોય મા મંડળી બોનાડીહી, એને અઘોલોકા ફાટાક ચ્યાવોય જોર નાંય કોઅરી.

19 આંચ તુલ હોરગા રાજ્યા ચાવ્યો દિહી: એને જું કાય તું દોરત્યેવોય બાંદહે, તીં હોરગામાય બાંદહે, એને જું કાય તું દોરત્યેવોય ખોલહે, તીં હોરગામાય ખોલાઈ.”

20 તોવે ય્યાય શિષ્યહાન ચેતાવણી દેની કા, કાદાલ નાંચ આખના કા આંચ ખ્રિસ્ત હેય.

ઈસુ પોતાના દુઃખ એને મોરણા ભવિષ્યવાણી
(માર્ક 8:31-9:1; લુક. 9:22-27)

21 એ સમયે ઈસુ ચ્યા શિષ્યહાન આખા લાગ્યો, “જરુર હેય કા આંચ ચેરૂસાલેમ શેહેરમાય જાઉં, એને આગેવાન, એને મુખ્ય યાજક, એને મૂસા નિયમ હિકાડનારા ગુરુ આથાથી બોજ દુઃખ ઊઠાવીહી, એને માઆઇ ટાકલો જાહી, એને તીજે દિહી પાછો જીવી ઉઠહી.”

22 તોવે પિત્તરે ચ્યાલ આલાગ લેય જાયન પીડા એને માઆઇ ટાકના બારામાય વાત કોઅયી યાહાટી ખિજવાયા લાગ્યો. “ઓ પ્રભુ પોરમેહેર એહેકેન કોઇન મા કોઅહે, તોઆરે એહેકેન કોઇહી નાંચ ઓઅરી.”

23 ચ્યાય પાહલા એઇન પિત્તરાલ આખ્યાં, “ઓ સૈતાન, મા હામ્મેથી દુર ઓઅઇ જો, તું મા હાટી ઠોકરે કારણ હેય, કાહાકા તો વિચાર પોરમેહેરા એછને નાંચ, બાકી માઅહા એછને હેય.”

ઈસુવા પાછલા ચાલના મોતલાબ

24 એને શિષ્યહાઆરે લોકહાન હાદિન ઈસુવે આખ્યાં “જો કાદાં મા શિષ્ય બોના માગહે, ચ્યાલ પોતાલ નાકાર કોઅરા જોજે એને પોતાનો હુળીખાંબ ઉચકીન મા શિષ્ય બોને.

25 કાહાકા જીં માઅહું દોરતીવોય પોતે જીવ બોચાવાં માગહે, તો હાચ્યાં જીવન ગુમાવી દી, બાકી તુમા જ્યા મા લીદે એને પોરમેહેરા હારી ખોબારે લીદે ચ્યા જીવ દેહે, તો હાચ્યાં જીવન મેળવી.

26 ચોક માઅહાલ કાય લાભ જોવે ચ્યાલ બોજ મિલકાત મીળે બાકી પોરમેહેરાઆરે હાચ્યાં જીવન ગુમાવી દેય? ચોક માઅહું પોરમેહેરાલ કાય દી હોકહે, જીં ચ્યા અનંતજીવન વેચાતાં લેય?”

27 આંચ, માઅહા પોહો, મા હોરગા દૂતહા આરે મા આબહા મહિમામાય ચીહી, એને ચ્યે સમયે આંચ બોદહાલુજ ચ્યાહા કામહા ઇસાબે ઇનામ દિહી.

28 “આંય તુમહાન હાચ્યાંજ આખતાહાવ કા ઈહીં ઉબલા કોલહાક લોક તોવેબી જીવતા રોય, જાવ હુદુ માઅહા પોહાલ પોરમેહેરા રાજ્યા સામર્થકોય ચ્યાહા વોચ્યે ચેતા દેખી.”

17

ઈસુવા રુપ બદલાયા

(માર્ક 9:2-13; લુક. 9:28-36)

1 છ દિહા પાછે ઈસુવે પિત્તર, યાકૂબ એને ચ્યા બાહા યોહાનાલ લેયને ચ્યા ઉચા ડોગાવોય ગીયા.

2 તો ચ્યાહા આગલા ઈસુવા રુપ બોદલાય ગીયા. એને ચ્યા મુંય દિહા રોહણ્યે રોકા ચોમકા લાગ્યા એને ચ્યા ફાડકે ઉજવાડા રોકે ઉજળેંકુલ ઓઅઇ ગીયે.

3 એને ભવિષ્યવક્તા મૂસા એને એલીયા ઈસુવાઆરે વાતો કોઅતા દેખ્યા.

4 તોવે પિત્તરાય ઈસુવાલ આખ્યાં, “ઓ પ્રભુ, આપહે ઈહીં રોઅના હારાં હેય એને તું આખતો ઓરીતે ઈહીં આંય તીન માંડવા બોનાડુ, ચોક તોહાટી, ચોક મૂસા હાટી, એને ચોક એલીયા હાટી.”

5 તો આજુ બોલીજ રીયેલ ઓલાહામાયજ ચોક ઉજળા વાદળાં ચેના એને ચ્યાહાન ચ્યા સાવલ્યેકોય ડાકી લેદા, એને ચ્યાહાય વાદળામાઅરે પોરમેહેરાલ બોલતા વોનાયા, “ઓ મા પ્રિય પોહો હેય, ચ્યા આખલા માનજા.”

6 શિષ્ય ઈ વોનાયા તોવે ઉબડા પોડી ગીયા એને બોજ બિઇ ગીયા.

7 ઈસુવે પાહી ચેયન ચ્યાહાલ આથલ્યા એને આખ્યાં, “ઉઠા, બીયહા મા.”

8 તોવે તારાતુજ ચ્યાહાય ચોમખી એઅયા, એને ઈસુ ચોખલોજ દેખાયો, બિજો કાદોજ નાંય દેખાયો.

9 જોવે ઈસુ એને ચ્યા તીન શિષ્ય ડોગાવોયને ઉતતાજ ચ્યાય ચ્યાહાન ચોક આગના દેની કા, કાદાલબી ઈ મા આખહા કા તુમાહાય કાય એઅયા જાવ લોગુ આંય, માઅહા પોહો મોઅલા માઅને પાછો જીવતો નાંય ઓઅઇ જાવ.

10 એને પાછા શિષ્યહાય ઈસુવાલ પુછ્યાં, “મૂસા નિયમ હિકાડનારા ગુરુ એહેકેન કાહા આખતાહા કા, એલીયાલ ખ્રિસ્તા ચેયના પેલ્લા યાં જોજે?”

11 ઈસુવે ચ્યાહાન આખ્યાં કા, ઈ હાચ્યાં હેય કા પોરમેહેરાય “એલીયાલ દોવાડના વાયદો કોઅલો આતો કા તો બોદા કાય હુદારાવાંહાટી પેલ્લો ચેય જાય,

12 બાકી આંય તુમહાન આખહુ કા એલીયા તે ચેય ગીયહો, બાકી લોકહાય ચ્યાલ નાંય વોળખ્યોહો, બાકી જેહેકોય ચ્યાહા મોરજી જાયી તેહેકોય ચ્યાહાઆરે કોઅયા, ચેજપરમાણે માઅહા પોહોબી ચ્યાહા આથે દુઃખ વેઠી.”

13 તોવે શિષ્ય હોમજી ગીયા કા ચ્યે આમહાન ચોહાન બાપતિસ્મા દેનારા બારામાય આખ્યાહા.

મીગ્યેથી પીડાતા ચોકા પોહાલ ઈસુ હારાં કોઅના
(માર્ક 9:14-29; લુક. 9:37-43)

14 જોવે ચ્યા માઅહા ટોળા પાય જાય પોઅચ્યા તોવે ચોક માઅહું ચ્યા પાહી ચેયન પાગે પોડીન આખા લાગ્યા.

15 “ઓ પ્રભુ, મા પોહાવોય દયા કોઓ, કાહાકા ચ્યાલ મીગ્યા ચોળી ચેહે, તોવે તો બોજ દુઃખ વેઠેહે, બોજદા તો આગડામાય પોડહ્યો ને બોજદા તો પાઅયામાય પોડયોહો.

16 આંય ચ્યાલ તો શિષ્યહાપાય લેય ગીયેલ બાકી ચ્યા ચ્યાલ હારાં નાંય કોઅય હોક્યા.”

17 ઈસુવે ચ્યાહાન જાવાબ દેનો કા “ઓ બોરહો નાંય થોવનારા લોકહાય એને લુચ્ચી પીડી, તુમહેઆરે કોલાહા લોગુ રોઉ? કોલાહા લોગુ તુમહાન વેહું? ચ્યાલ તુમા માયેપાંય લેય યા.”

18 તોવે ઈસુવે ચ્યાલ દોમકાડયો, એને બુત ચ્યામાઅને નિંગી ગીયો, એને પોહો ચ્યેજ સમયે હારો જાયો.

19 જોવે ઈસુ ચોખલો આતો તોવે શિષ્ય ચ્યાપાય ચેના એને ચ્યાહાય આખ્યાં, “બુતાલ આમા કાહાનાય કાડી હોક્યા?”

20 ઈસુવે ચ્યાહાન આખ્યાં, તુમહે બોરહો વોછો હેય, આંય તુમહાન હાચ્યાંજ આખતાહાવ, તુમહે બોરહો ચોક રાયે દાણા ઓલહો રોય,

તોવે તુમા યા ડોગાલ આખી હોકતાહા, ઈહીરે પાછો ઓટીજો, તોવે તો પાછો ઓટી જાઅરી, એને તુમહેહાટી કાયજ અસંભવ નાંય હેય.

²¹ બાકી ઓ બુત ઉપહા કા પ્રાર્થના કોઅયા વોગાર નાંય નિંગે.

ઈસુવા મોરણા બારામાય પાછી ભવિષ્યવાણી

²² જોવે ય્યા ગાલીલ ભાગામાય આતા, તોવે ઈસુવે ય્યાહાન આખ્યાં, “માઅહા પોહો મા દુશ્માનાહા ઓદિકારામાય હોઅપાઈ જાય.

²³ એને ય્યા ય્યાલ માઆઈ ટાકી બાકી તો તીજે દિહી મોઅલા માઅને પાછો જીવતો ઉઠી” શિષ્ય તે બોજ નારાજ ઓઅઈ ગીયા.

દેવાળા કર દેયના

(માર્ક 9:30-32; લુક. 9:43-45)

²⁴ જોવે ય્યા કાપરનાહુમ ગાવામાય યેય લાગ્યા, તોવે દેવાળા કર લેનારાહાય પિત્તરાપાંય યેઈન પુછ્યાં, “કાય તુમહે ગુરુ દેવાળા કર નાંય દેય?”

²⁵ પિત્તરે આખ્યાં, “હાં, તો દેહે.” જોવે પિત્તરા ગોઅમે યેનો, તોવે ય્યા આખના પેલ્લાજ ઈસુય પિત્તરાલ પુછ્યાં, “ઓ સિમોન, તુલ કાય લાગહે? દુનિયા રાજા કોઅહા લોકહા પાયને કર લેતહા? ય્યાહા પાહાહા પાયને કા બીજહા પાયને?”

²⁶ પિત્તરાય આખ્યાં, “બીજહા પાયને, તોવે ઈસુવે આખ્યાં, તોવે પોહો વાચાય ગીયો.

²⁷ બાકી આમા નાંય ઇચ્છા રાખજે કા યા લોક આમે લીદે હેરાન ઓઅે, યાહાટી તું દોરિયા એછે જો એને ગોળાય ટાક એને પેલ્લા જીં માછલા ગોળાય માય લાગે ય્યા મુંય ઉગાડ, એને ય્યામાય ચોક સિક્કો (ચાર દિહાહા મજરી) મિળી તો લેઈને આપહે કર બોઅઈ દેજે.”

18

હોરગા રાજ્યામાય મોઠો કું?

(માર્ક 9:33-37; લુક. 9:46-48)

¹ તોવે શિષ્યહાય ઈસુવાપાય યેઈન પુછ્યાં કા, “પોરમેહેરા રાજ્યામાય કું મોઠો રોય.”

2 તોવે ઈસુય ચોકા પાહાલ ય્યાહા પાહી હાદિન વોચમાય ઉબો કોઅયો,

3 એને ઈસુવે આખ્યાં, આંચ તુમહાન હાચ્યાં આખતાહાવ, જાંઉ લોગુ તુમા બદલાયન એને પાહા રોકા નાંચ ઓઈ જાહા, તુમા હોરગા રાજ્યામાય જાય નાંચ હોકહા.

4 જો કાદો પોતાલ પાહાહા હારકો નમ્ર કોઅરી, તોજ હોરગા રાજ્યમાય મોઠો ઓઅરી.

5 એને જો કાદો મા નાવામાય ચોક ઓહડા પાહાલ માનહે, તો માન માની લેહે.

દોગો દેનારાલ હાય

(માર્ક 9:42-48; લુક. 17:1-2)

6 કાદાહાટીબી, પોતે ગોગ્યેમાય ગોઅટયે પુડ બાંદિન દોરિયામાય બુડવી દેયના ખારાબ સાજા હેય, બાકી જોવે કાદોબી યા વાહનાહામાઅને માયેવોય બોરહો રાખતેહેં, ય્યાહા પાપ કોઅના કારણ બોને તે ય્યાલ યા કોઅતીબી ખારાબ સાજા મિળી.

7 પાપ કોઅનારા લેદે દુનિયા હારાપી હેય, પાપ કોઅના ઓઅઇ હોકહે, બાકી જ્યા માઅહા લીદે પાપ કોઅહે ય્યાલ ખારાબ સાજા મિળી.

8 પાપ કોઅના બોદે કારણે બોંદ કોઆ ય્યાલ પુરીરીતે મોનાઈ કોઆ જેહેકોય કા પોતે પાગ કાપી રીઅલા હેય, જો તુમહે પાપ કોઅના કારણ બોનહે, જોવે તુમા હોરગામાય જાતહેં, ભલે તુમહેપાય ચોક પાગ હેય તીં હારાં હેય, બાકી તુમહેપાય બેન આથ એને બેન પાગ હેય એને તુમા નરકા કોવ્યેમાય જાહા, તે તી ખારાબ હેય.

9 પાપ કોઅના બોદે કારણે દુઉ કોઆ ય્યાલ પુરીરીતે મોનાઈ કોઆ જેહેકોય કા પોતે ડોળો બાઆ કાડી દે, જો તુમહે પાપ કોઅના કારણ બોનહે, જોવે તુમા પોરમેહેરા રાજ્યામાય જાતહેં, ભલે તુમહેપાય ચોક ડોળો હેય તી હારાં હેય, બાકી તુમહેપાય બેન ડોળા હેય એને તુમા નરકા કોળી જાહા, તે તી ખારાબ હેય.

ટાકાય ગીઅલા ગેટા દાખલો

(લુક. 15:3-7)

10 “હાયવીન રા, કા યા વાહાનાહા માઅને કાદાલ નોકામ્યા મા ગોણતા, કાહાકા તુમહાન આંય હાઅ્યાં આખતાહાવ, હોરગામાય આ હોરગા દૂત મા આબહા આરે કાયામ રોતહા.

11 કાહાકા આંય, માઅહા પોહો ટાકાઇ ગીઈલાહાન બોચાવાં યેનહો.”

12 તુમહાન કાય લાગહે? ચોકતા પાય હોવ ગેટૈં રોય, એને આહામાઅને ચોક ટાકાઇ જાય, તોવે નોવાણુ ગેટૈં છોડીન, ડોગાવોય ટાકાલા ગેટાલ નાંય હોદા જાય કા?

13 “જોવે એહેકેન ઓઅે કા તો આ ગેટાલ મેળવે, તે આંય તુમહાન હાઅ્યાં આખતાહાવ, કા તો નોવાણુ ગેટહા કોય ઓલો ખુશ નાંય ઓઅરી, જોલી ખુશી આ ચોકા ગેટાહાટી ઓઅરી.

14 યાહાટી તુમહે હોરગ્યા આબહા એહેકેન મોરજી નાંય હેય, કા યા વાહાનાહા માઅને ચોકબી નાશ ઓઅઇ જાય.”

ગુનેગારાહા બદાલ આપહાય કાય કોઅના (લુક. 17:3)

15 જોવે તુમહેઆરે કાદો હાંગાત્યો વિસ્વાસી તો વિરુદ્ધ પાપ કોઅહે, તોવે જાયન ચોખલામાંય આ બુલ હોમજાડી દે, જોવે તો તુમહે આખલ્યા પાળે, તો તુયે આલ જીતી લેદહો.

16 બાકી જોવે તો નાંય પાળે, તોવે ચોક બેન માઅહાન આરે લેતો જો, યાહાટી કા બોદી વાત બેન ત્રીન સાક્ષીયાહા વાતહે કોઇન સાબિત ઓઅઇ.

17 જોવે તો આહાબી નાંય પાળે, તોવે મંડળ્યેલ આખી દે, બાકી જોવે તો મંડળીબી નાંય પાળે, તોવે તુમા આઆરે એહેકેન વેવહાર કોઅજા જેહેકોય ગેર યહૂદી એને કર લેનારા આરે કોઅહા.

ચોકમોન ઓઇન માગના

18 “આંય તુમહાન હાઅ્યાં આખતાહાવ, જીં કાય તુમા દોરત્યેવોય બેગા કોઅહા, ત્રીંજ હોરગામાય બેગા કોઅહા એને જીં કાય તુમા દોરત્યેવોય ખોલાહા, ત્રી હોરગામાય ખુલી.

19 આંય પાછો તુમહાન આખતાહાવ, જોવે તુમહેમાઅને બેન માઅહે દોરતીવોય ચોકદયે જરુરી વાતેહાટી ચોકા મોનાકીય પ્રાર્થના કોઇન માગે, આહાન હોરગામાઅને આબહો દી.

20 ઈ યાહાટી કા જાં બેન કા તીન મા શિષ્ય ઓઅના લીદે બેગા ઓઅતાહા તાં આંય આહા વોચમાય રોતાહાંવ.”

માફ નાંય કોઅનારા ચાકારા દાખલો

21 તોવે પિતરાય પાહી યેયન ઈસુલ આખ્યાં, “ઓ પ્રભુ, મા હામ્મે મા હાંગાત્યો વિસ્વાસી પાપ કોઅહે, તોવે આલ આંય કોલાદા માફ કોઉ? હાંત દા કા?”

22 ઈસુવે આલ આખ્યાં, “આંય તુલ એહેકેન નાંય આખું કા હાંત દા માફ કોઓ બાકી હાતા હિત્તેર ગોણા આલ માફ કોઓ.”

23 “આંય તુલ ઈ આખતાહાવ યાહાટી હોરગા રાજ્યા આ રાજા હારકા હેય, જ્યેય આપહે ચાકારાહા ઇસાબ લાં માગહે.

24 એને જોવે ઇસાબ કોઅતો લાગ્યો તોવે ચોકા જાંઆલ લેય યેનલા, આ દસ ઓજાર તાલાંત એટલે ચોક તાલાંત પંદર વોરહા મોજ્યે કોરજામાય આતો.

25 બાકી જોવે આપાય કોરજાં ચુકાડાં કાયજ નાંય આતા, તોવે રાજાય આખ્યાં, કા ચાલ, યા થેએયેલ એને યા પાહાહાન, એને યા બોદી માલ-મિલકાત વેચિન કોરજાં વોસુલ કોઅરા કોઅયો.”

26 “તોવે ચ્યે ચાકારે આ રાજા પાગે પોડીન આખ્યાં, ઓ રાજા વાહાયોક ધીરજ રાખ, આંય તુલ બોદાંજ ચુકતાં કોઅઇ દિહી.”

27 તોવે આ ચાકારાવોય રાજાલ દયા યેની, તોવે આ બોદાંજ કોરજાં માફ કોઅયા એને આલ જાં દેનો.

28 “બાકી જોવે તો ચાકાર બાઆ ગીયો, તોવે આ હાંગાત્યા ચાકાર માઅને ચોક બિજો ચાકાર મિળ્યો તો આ (૧૦૦ દીનાર) હોવ દિહાહા મોજ્યે પોયહા કોર્જદાર આતો, તોવે ચ્યે આલ ગોગ્યેમાય દોઇન આખ્યાં, ‘જી કાય તોપાય કોરજાં હેય આલ તું ચુકાડી દે.’ ”

29 તોવે આ હાંગાત્યો ચાકાર આ પાગે પોડીન વિનાંતી કોઅરા લાગ્યો, વાહાયોક ધીર દોઓ આંય તુલ બોદા કોરજાં ચુકતાં કોઅઇ દિહી.

30 બાકી તો નાંચ માન્યો, એ જાયને ચ્યાલ જેલેમાય ટાકી દેનો, કા જાઉ લોગુ તું કોરજાં ચુકાડી નાંચ દેય, તાઉલોગુ તું ઈહીંજ રો.

31 ચ્યા હાંગાત્યા ચાકારાહાય ઈ દેખ્યાં તોવે ચ્યા બોજ નિરાશ ઓઅઇ ગીયા, એને આપહે રાજાપાય જાયને જી બોન્યાં તી બોદાંજ આખી દેખાડ્યાં.

32 તોવે ચ્યા રાજાય ચ્યાલ હાદિન આખ્યાં, ઓ લુચ્યા ચાકાર, તુયે જી માન રાવ્યાં કોઅયેલ, તોવે માયે તો બોદા કોરજાં માફ કોઅઇ દેનેલ.

33 તે જેહેકોય માયે તોવોય દયા કોઇન તો કોરજાં માફ કોઅયા, તેહેકોયન કાય તુલબી તો હાંગાત્યા ચાકારાવોય દોયા કોઇન ચ્યા કોરજાં માફ કોઅ નાંચ જોજે કા?

34 એને ચ્યા રાજાય બોજ ખિજવાઈન ચ્યાલ ડોંડ દેનારાહા આથામાય હોપી દેનો, કા તો બોદા કોરજાં જાઉ લોગુ બોઅઇ નાંચ પાડે, તાઉલોગુ ચ્યાલ ઈહીંજ રાખા.

35 “યેજપરમાણે તુમહેમાઅને જો કાદો પોતે હાંગાત્યા વિસવાશ્યાલ હાચ્ચે મોને પાપ માફ નાંચ કોઅઇ, તે મા આબો જો હોરગામાય હેય, તોબી તુમહેઆરે એહેકેનુજ કોઅરી.”

19

ઈસુ ફારગાત્યે બારામાય કાય હિકાડેહે

(માર્ક 10:1-12)

1 એને એહેકેન જાયા કા યો બોધો વાતો આખ્યો, તોવે ઈસુ એને ચ્યા શિષ્ય ગાલીલ ભાગ છોડીન, ચારદેન નોયે એમેરે યહૂદીયા શેહેરામાય ગીયા.

2 એને લોકહા મોઠી ગીરદી ચ્યા પાહલા યેની એને ઈસુચ ચ્યાહામાઅને દુઃખદ્યાન હારાં કોઅયા.

3 તોવે પોરૂષી લોકહાય ચ્યાપાય યેઇન ચ્યા પરીક્ષા લાંહાટી ચ્યાલ પુછ્યાં કા, “ગોમે એ કારણે થેઅયેલ ફારગાતી દેઅના ઈ પરવાનગી હેય કા?”

4 ઈસુવે જાવાબ દેનો કા, “કાય તુમાહાય નાંચ વાચ્યાહાં કા જ્યાંય ચ્યાહાન બોનાડયાહા, ચ્યાય પેલ્લેથી ચ્યાહાન માટડો એને થેએ બોનાડ્યા એને આખ્યાં,

5 ચ્યાહાટી યોક માટડો ચ્યા આયહે આબહાલ છોડીન ચ્યા થેઅયેઆરે રોય. એને ચ્યે બેની જાંએ યોકા શરીરા બોની.

6 એને ચ્યે બેની જાંએ યોકા શરીરા બોની, યાહાટી કા ચ્યે આમીને બેન માઅહા રોકે નાંય, બાકી ચ્યે યોકાજ માઅહા હારકે હેય. યાહાટી કા જ્યાલ પોરમેહેરાય ચોકઠા જોડલા હેય, ચ્યાલ કાદાબી માઅહું આલાગ નાંય કોઆ જોજે”.

7 ચ્યાહાય ઈસુલ આખ્યાં, “મૂસા નિયમશાસ્ત્રામાય કાહા એહેકેન ઠોરવ્યાહાં, કા લેખપાત્રી કોઇન ચ્યેલ છોડી દેયના?”

8 ઈસુય ચ્યાહાન આખ્યાં, “તુમા જિદ્દી આતા, ચ્યાહાટી મૂસાય તુમહાન થેઅયેલ છોડી દેયના પોરવાનગી દેની, બાકી પેલ્લા એહેકેન નાંય આતા.

9 બાકી આંય તુમહાન હાચ્યાં આખતાહાલ કા જો કાદો પોતા થેઅયેલ વ્યબિચાર સિવાય કોઅઇ બિજા કારણથી ફારગાતી દેય, એને જો યાકોય છોડી દેનલ્યે આરે વોરાડ કોઅે, તે તો વ્યબિચાર કોઅહે.”

10 તોવે ચ્યા શિષ્યહાય ચ્યાલ આખ્યાં, “જોવે માટડા થેઅયે આરે ઓહડો સબંધ હેય, તોવે વોરાડ કોઅના હારાં નાંય.”

11 યેયન ચ્યે ચ્યાહાન આખ્યાં, “ઈ વાત બોદે નાંય માની હોકે, માત્ર ચ્યાજ એહેકેન કોય હોકતાહા જ્યાહાન પોરમેહેરાય ચ્યા રીતે જીવાહાટી તાકાત દેનહી.

12 કાહાકા કોલાહાક નપુસક ઓહડા હેતા, જ્યા જન્માથીજ એહેકેન હેતા, એને કોલાહાક નપુસક ઓહડા હેતા, જ્યાહાલ માઅહાય નપુસક બોનાડયાહા, એને કોલાહાક ઓહડા નપુસક હેતા, જ્યા પોતેજ હોરગા રાજ્યાહાટી નપુસક બોનહ્યા, જ્યા યાલ હોમજી હોકતાહા ચ્યા હોમજી જાય.”

ઈસુ વાહના પોહાહાન બોરકાત દેહે

(માર્ક 10:13-16; લુક. 18:15-17)

13 પાછે માઅહે પોહાહાન ઈસુપાય લેય યેને, યાહાટી કા તો ચ્યાહાવોય આથ થોવે એને ચ્યાહા પ્રાર્થના કોઅે, બાકી શિષ્ય માઅહાન દોમકાડે.

14 બાકી ઈસુવે આખ્યાં, “પોહાહાન માયેપાંય યાં દા, ચ્યાહાન ઓટકાડાહા મા, કાહાકા ચ્યાજ લોક જ્યા યા પોહાહા રોકા બોરહાલાયક હેય, હોરગા રાજ્યામાય રોય.”

15 એને ઈસુય ચ્યાહાવોય આથ થોવિન બોરકાત દેની, પાછે તાઅને ચાલ પોડ્યા.

યોક મિલકાતવાળો જુવાન

(માર્ક 10:17-31; લુક. 18:18-30)

16 એને યોક માઅહું યેના એને ચ્યાલ ચ્યે પુછ્યાં, “ઓ ગુરુ, કાય કામ કોઉ કા પોરમેહેર માન અનંતજીવન દી?”

17 ઈસુવાય ચ્યાલ જાવાબ દેનો કા, “હારાં કા મા બારામાય તું માન કાહા પૂછતોહો? હારો તે યોકુજ હેય, બાકી તું અનંતજીવનામાય જાં માગે, તોવે આગનાયો પાળ.”

18 ચ્યે પુછ્યાં કોઅયોહો આગનાયો? ઈસુવે આખ્યાં, “તું ખૂન કોઅહે મા, વ્યબિચાર કોઅહે મા, ચોરી કોઅહે મા, જુઠી સાક્ષી દેહે મા.

19 તો આબહા એને આયહેલ માન દે, જેહેકોય પ્રેમ પોતાવોય રાખતોહો તેહેકોય બીજહાવોય રાખ.”

20 જુવાન્યાય ઈસુવાલ આખ્યાં, “ઈ બોદા આંય વાહનેરે પાળતો યેનોહો, આજુ મા કાય બાકી રિયા?”

21 ઈસુવાય ચ્યાઅેછે પ્રેમથી એઅયા એને ચ્યાલ આખ્યાં, “આજુ યોક વાત હેય જું તુલ કોઅના જરૂરી હેય, જો, જું કાય તો હેય તીં બોદા વેચિન ગોર-ગોરીબાહાન દેય દે, જોવે એહેકેન કોઅહે, તોવે તોપાય હોરગામાય મિલકાત રોઅરી એને યેયન મા શિષ્ય બોની જો.”

22 ઈ વાત વોનાઈન જુવાન્યો નિરાશ ઓઈન જાતો રિયો કાહાકા તો બોજ માલદાર આતો.

23 બાકી ઈસુવે ચ્યા શિષ્યહાન આખ્યાં, “તુમહાન હાચ્ચી વાત આખહુ, માલદાર માઅહાન હોરગા રાજ્યમાય જાયના બોજ કોઠાણ હેય?

24 આંય તુમહાન આખતાહાવ, કા ઉટડાલ હુવ્યે નાકલામાંઅરે જાઅના કોઠાણ હેય, તેહેકોય માલદાર માઅહાન પોરમેહેરા રાજ્યામાય જાઅના બોજ કોઠાણ હેય.”

25 જોવે શિષ્ય ઈ વાત વોનાયા, ચ્યા આજુ બોજ નોવાય પામી ગીયા, એને યોકા બિજાલ આખતા લાગ્યા કા, “તે પાછે કાહાટી પોરમેહેરા રાજ્યામાય બોયાવ ઓઈ જાઅના કેહેકેન સંભવ હેય?”

26 ઈસુયે ચ્યાહા એછે એઈન આખ્યાં, “ઈ માઅહાન તે નાંચ ઓઅઇ હોકે, બાકી પોરમેહેરાકોય ઓઅઇ હોકી, કાહાકા પોરમેહેર બોદાંજ કોઅઇ હોકહે.”

27 પિત્તર ચ્યાલ આખા લાગ્યો, આમે કાય ઓઅરી? “આમાહાય તે તો શિષ્ય બોનાહાટી બોદાંજ છોડી દેનલા હેય તે આમહાન કાય મિળી?”

28 ઈસુવે શિષ્યહાન આખ્યાં, “ચ્યે સમયે જોવે માઅહા પોહો ચ્યા સુંદરતામાય ચ્યા રાજગાદેવોય બોહોરી, તોવે તુમા જ્યા મા શિષ્ય બોન્યાહા, તુમા હોગા બાર રાજગાદેવોય બોહીન ઈસરાયેલ દેશા બાર જાત્યેહે ઉપે ન્યાય કોઅહા.”

29 ઈસુયે શિષ્યહાન આખ્યાં, “તુમહાન આંચ હાચ્યાં આખતાહાવ, મા શિષ્ય બોનાહાટી એને પોરમેહેરા હારી ખોબાર આખાહાટી, જ્યા કાદાંચબી ચ્યા ગુઉ છોડી દેનલા હેય, એને બાહા બોઅહી એને આયહો એને આબહો એને પાહાહાન કા ચ્યા ખેતાર છોડ્યા ઓરી, તો નોકકીજ યે પેડ્યેમાય સતાવણી આરે-આરે બોજ વસ્તુ મેળવી, એને યેનારા સમયામાય અનંતજીવન મેળવી.”

30 બાકી બોજ લોક જ્યે આમી પેલ્લે હેતે, ચ્યે પાછલા ઓઅરી, એને જ્યે આમી પાછલા હેય, ચ્યે પેલ્લે ઓઅરી.

20

દારાખા વાડ્યેમાય મજર્યાહા દાખલો

1 “હોરગા રાજ્ય યા દાખલા હારકા હેય, યોક દારાખાહા વાડ્યે માલિક હાકાળેહે નિંગ્યો, કા પોતાની દારાખાહા વાડ્યેમાય કામાવાળા માઅહાલ કામે લાવે.

2 ચ્યાય કામાવાળાહાન દિનેરોજ યોક દીનાર* ઠોરવી, એને ચ્યાહાન દારાખા વાડ્યેમાય કામ કોઅરા દોવાડ્યા.

3 પાછે નવ વાગે ચ્યાય નિંગીન બિજા લોકહાન રીકામા ઉબા રોતા દેખ્યા,

* 20:2 યોક દીનાર એટલે યોક દિહા કાંબારાં પરમાણે હેય

4 એને ચ્યાહાન વાડયે માલિકાય આખ્યાં, તુમા હોગા મા દારાખાહા વાડયેમાય જાયને કામ કોઆ, એને જીં કાય ઠીક હેય, તીં તુમહાન દિહી તોવે ચ્યાબી કામ કોઅરા ગીયા.

5 પાછે ચ્યે લગભગ બોપરેહે એને ત્રણ વાગેબી નિંગીન તેહેજ કોઅયા.

6 આસરે પાય વાગા પાછે વાડયે માલિક પાછો તાં ગીયો, એને બીજહાન પાછા ઉબલા દેખ્યા, એને ચ્યાહાન વાડયે માલિકાય આખ્યાં, તુમા કાહા રીકામાજ બોદો દિહી ઉમથાજ ઉબા રીયહા? ચ્યાહાય ચ્યાલ આખ્યાં, કાહાકા આમહાન કાદેજ કામાવોય નાંય લાવ્યાહા.

7 ચ્યાય ચ્યાહાન આખ્યાં” તુમાબી દારાખાહા વાડયેમાય જાં, એને કામ કોઆ.

8 “વોખાતેહે દારાખાહા વાડયે માલિકાય પોતાના કારબાર્યાલ આખ્યાં, કામાવાળાહાન હાદિન જ્યા બોદહાથી છેલ્લે કામ કોઅરાહાટી ચેનલા આતા, ચ્યાહાન પાહલા થી લેઈને પેલ્લા લોગુ ચ્યાહા મજરી દેય દે.

9 જોવે ચ્યે ચેને તોવે ચોક પારગોજ દિહી રોય ગીઈલો, તોવે ચ્યાહાન ચોક-ચોક દીનાર એટલે પુરાં દિહા મજરી મિળી.

10 જ્યે પેલ્લે ચેને ચ્યાહાન ઈ હોમજાયાકા, આમહાન વોદી મિળી, બાકી ચ્યાહાનબી ચોક-ચોક દીનાર એટલે પુરાં દિહા મજરી મિળી.

11 જોવે મિળ્યો, તોવે ચ્યા વાડયે માલિકાલ ટુટરીન આખા લાગ્યા,

12 ‘ચ્યા પેલ્લાંહાય ચોકુજ કલાક કામ કોઅયા, એને તુયે ચ્યાહાન આમહે બોરાબર કાંબારાં દેના જ્યાહાય દિહી બોઈન કામ કોઅયા તીડકો સહન કોઅયો?”

13 વાડયે માલિકાય ચ્યાહામાઅને ચોકાલ જાવાબ દેનો, ‘ઓ હાંગાત્યા, તોઆરે આંય અન્યાય નાંય કોઅઈ રીયોહો, કાય પુરાં દિહા કામ કોઅરાહાટી તુયેજ ચોક દીનાર બોલી નાંય કોઅયેલ?

14 જીં તો કાંબારાં હેય, લેય લે એને જાતો રો, મા મોરજી હેય કા જોલાહાં તુલ દાંઈ તોલાહાંજ પાહાલાર્યાહાન બી દાવ.

15 કાય ઈ ઠીક નાંય હેય કા મા પોયહા મા ઇચ્છા કોઅઈ ખોરયુ? કાય તું ભોલાં ઓરી ચ્યાલ તું તો ખારાબ નોજારે કોઅઈ એઅતહો? બાકી તુલ અદેખાય નાંય લાગા જોજે કાહાકા આંય બીજહાહાટી ઉદાર

હેતાંવ?”

16 બાકી બોજ લોક જ્યે આમી પેલ્લે હેતે, ચ્થે પાછલા ઓઅરી એને જ્યે આમી પાછલા હેય, ચ્થે પેલ્લે ઓઅરી.”

ઈસુ પોતાના મોરણા એને જીવી ઉઠના બારામાય પાછી ભવિષ્યવાણી

(માર્ક 10:32-34; લુક. 18:31-34)

17 ઈસુ યેરૂસાલેમ શેહેરમાય જાત્યે વોખાત ચ્થા બાર શિષ્યહાન એકાંતમાય લેય ગીયો, એને વાટેમાય ચ્થાહાન આખા લાગ્યો,

18 “એઆ, આપા યેરૂસાલેમ શેહેરમાય જાતહા તાં, એને માન, માઅહા પોહાલ મુખ્ય યાજકાહા એને મૂસા નિયમ હિકાડનારા ગુરુ આથામાય દોઅવાય જાય, ચ્થા માન માઆઇ ટાકરી.

19 એને ગેર ચહૂદી લોકહા આથામાય હોઅપી દેઅરી, ચ્થા લોક માન ગાળી દી, મા ઉપે થૂપી, માન ચાપકાહાકોય માર ઠોકી, એને હુળીખાંબાવોય ચોડવી, એને તીજે દિહી પાછો જીવતો ઓઅઇ જાહી.”

યોક આયહે માગણી

(માર્ક 10:35-45)

20 તોવે જબદયા પાહા આયહયે આરે જાયને ઈસુવાપાય ચેયન પાગે પોડયે, એને ઈસુલ રાવ્યાં કોઅરા લાગી.

21 ઈસુવે ચ્થેલ આખ્યાં, “તું કાય માગતીહી?” ચ્થેય ચ્થાલ આખ્યાં, “ઈ વચન દે કા મા યા બેન પાહા તો રાજ્યામાય યોક જાંઆ જમણે આથે એને યોક ડાબે આથે બોહે.”

22 ઈસુવે ચ્થાહાન આખ્યાં, “તુમા ઈ નાંય જાંએ કા તુમા કાય માગતેહે? કાય તુમા બોગવાં હાટી તિયાર હેય, જેહેકોય આંય બોગાવનારો હેય, મોઅરાંહાટી જેહેકોય આંય મોઅહી?” ચ્થાહાય ઈસુલ આખ્યાં, “આમહે કોય ઓઅઇ હોકી.”

23 ઈસુય ચ્થાહાન આખ્યાં, “જેહેકોય આંય બોગવીહી, તેહેકોયજ તુમા બોગવાહા, તુમા મોઅઇ જાહા, જેહેકોય આંય મોઅઇ જાહી, બાકી માન નોક્કી કોઅના ઓદિકાર નાંય હેય કા મા જમણે એને ડાબે

આથે, કું તો માનાપાના જાગો મેળવી, પોરમેહેરાય આ જાગાલ તિયાર કોઅલા હેય, જ્યાહાન આય નિવડયાહા આહાહાટી.”

24 ઈ વોનાઈન દોહો શિષ્ય યાકૂબ એને યોહાનાલ ખિજવાયા લાગ્યા.

25 તોવે ઈસુય આહાન પાહી હાદિન આખ્યાં કા, “તુમહાન ખોબાર હેય, કા જ્યા લોક યા દુનિયામાય જ્યા ઓદિકારી ગોણાતાહા, એ આહા ઓદિકારા ઉપયોગ આહા તાબામાઅને લોકહાઉપે ઓદિકાર ચાલાહાહાટી કોઅતાહા.

26 બાકી તુમહામાય ઓહડા નાંય ઓરી, બાકી તુમહેમાય જો કાદો મોઠો બોના માગહે, તો તુમહે ચાકાર બોને,

27 એને જો કાદો તુમહામાય મુખ્ય ઓરા માગે, તો તુમહે દાસ બોને.

28 જેહેકોય કા આંય, માઅહા પોહો, બીજહા સેવા કોઅરાહાટી યા દુનિયામાય યેનો, યાહાટી નાંય યેનો કા બીજે મા સેવા કોએ, આંય ઘોણા લોકહાન આહા પાપાહામાને છોડાવાહાટી પોતાનો જીવ દાં યેનો.”

બેન આંદળાહાન ઈસુ દેખતા કોઅના

(માર્ક 10:46-52; લુક. 18:35-43)

29 જોવે આ યેરીખો શેહેરામાઅને નિંગે તોવે, ચોક મોઠો ટોળો આ પાહલા યાં લાગ્યો.

30 એને બેન આંદળા, જ્યે વાટયે મેરાવોય બોઠલા આતા, તો આ ઈ વાત વોનાયા કા ઈસુ ઇહિને જાય રિયહો, તોવે આ એહેકેન બોબલીન આખા લાગ્યા કા, “ઓ પ્રભુ દાઉદ રાજા કુળા પોહા, આમહાવોય દયા કોઓ,”

31 લોક આહાલ દોમકાડા લાગ્યા એને ઠાવકાજ રા આખ્યાં, બાકી આ આજુ મોઠેરે બોબાલતા લાગ્યા કા, “ઓ પ્રભુ, દાઉદ રાજા કુળા, આમહાવોય દયા કોઓ.”

32 તોવે ઈસુ ઉબો રોઇન, આહાન હાદિન આખ્યાં, તુમા કાય માગતાહા કા આંય તુમહેહાટી કાય કોઉ?

33 આહાય આલ આખ્યાં, “ઓ પ્રભુ, ઈજ કા આમા દેખતા ઓઅજે.”

34 ઈસુવે આહાવોય દયા કોઇન આહા ડોળાહાન આથ લાવ્યાં, એને આ તારાતુજ દેખતા જાયા, એને આ પાહલા વાટ દોઇન ચાલા લાગ્યા.

21

ઈસુવા યેરૂસાલેમ શેહેરામાય વિજય પ્રવેશ

(માર્ક 11:1-11; લુક. 19:28-44; યોહા. 12:12-19)

1 જોવે ઈસુ એને ચ્યા શિષ્ય યેરૂસાલેમ શેહેરા પાહી યેય પોઅચ્યા, એને જૈતુન ડોંગાવોય બેતફાગે પાહી યેના, તોવે ઈસુવાય ચ્યા બેન શિષ્યહાન એહેકેન આખીન દોવાડ્યા.

2 “હામ્મેને ગાવામાય જાં, એને તાં જાતાંજ તુમહાન ચોક કુરક્યા વાછડાં હેય ચ્યાવોય આજુ લોગુ કાદોજ નાંય બોઠહો, તીં બાંદલા નોજરે પોડી, ચ્યાલ છોડીન માયેપાંય લેય યા.

3 જો કાદાં તુમહાન કાય પુછે, તોવે એહેકેન આખજા,? ઈસુ આમે પ્રભુલ યા ઉપયોગ કોઅના ગોરાજ હેય, એને તો ચ્યાલ તારાતુજ લેય દોવાડી.”

4 ઈ યાહાટી જાયા, કા જું વચન પોરમેહેરાય ભવિષ્યવક્તાહાથી આખલા આતા, તી પુરાં ઓએ.

5 “યેરૂસાલેમ શેહેરા લોકહાન આખા, એઆ, તુમહે રાજા તુમહેપાય યેય રિઅલો હેય, તો નમ્ર હેય, એને વોજો ઉચાકનારા કુરક્યા વાછડા ઉપે બોહીન યેહે.”

6 શિષ્યહાય જાયને, જેહેકોય ઈસુવા આખલ્યે પરમાણેજ જાવાબ દેનો,

7 એને ચ્યા બેન શિષ્ય કુરક્યા વાછડાલ ઈસુપાય લેય યેના, એને ચ્યાવોય ચ્યાલ બોહાંહાટી કુરક્યા વાછડા બોઅડા વોય પોતાને ફાડકે પાથ્યે એને તો વાસડાવોય બોહી ગીયો, એને યેરૂસાલેમ શેહેરા એછે જાં લાગ્યો.

8 બોજ લોકહાય ઈસુ હામ્મે વાટેઉપે પોતાના ફાડકે પાથ્યે, એને લોકહાય ચ્યાલ માનપાન દાંહાટી વાટેવોય જાડાહા પાલાવાવ્યો ડાળખ્યો પાથ્યો, જ્યો ચ્યા લોક રાનહામાઅને વાડીન લિયેનલા આતા.

9 એને કાંચક લોકહા ટોળો ઈસુવા આગલા-આગલા ચાલતો આતો, એને કાંચક પાહલા ચાલતો આતો, ચ્યા બોદા ખુશ્ચેકોય બોંબલી રીયલા આતા, “દાઉદ રાજા પોહા હોસાન્ના, ધન્ય હેય તો જો પ્રભુ નાંવા કોય યેહે, હોરગામાય હોસાન્ના.”

10 જોવે ઈસુ યેરૂસાલેમ શેહેરમાય ગીયો, તોવે બોદા શેહેરમાય દાવ દોડ ઓઅઇ ગિઇ એને પૂછર્તે લાગ્યે, “એલો કું હેય?”

11 લોકહાય જાવાબ દેનો કા, “એલો ગાલીલ ભાગામાઅને નાજરેત ગાવા ભવિષ્યવક્તા ઈસુ હેય.”

ઈસુ દેવાળામાય જાયના એને વેપાર્યાહાન બાઆ કાડહે
(માર્ક 11:15-19; લુક. 19:45-48; યોહા. 2:13-22)

12 ઈસુ એને ચ્યા શિષ્ય યેરૂસાલેમ શેહેરમાય પોઅચ્યા, એને પોરમેહેરા દેવાળા બાઆપુર ગીયા, ઈસુ ચ્યા લોકહાન તાઅને બાઆ કાડના સુરુ કોઅયા, જ્યા બલિદાનાહાટી ઉપયોગ ઓઅનારે જોનાવારે એને બાકી વસ્તુ વેચાતાં લાંહાટી એને વેચાંહાટી કામ કોઅઇ રીયલા આતા, ચ્યાય પોયહા બોદાલનારાહા બાકડાહાન ડેકલી દેના, એને ચ્યાય કબુતર વેચનારાહાપાંચ જાયન વેચનારાહા ખુરચ્ચેહેલ કોથલાડી દેને.

13 ચ્યાહાન ઈસુવે હિકાડીન એહેકેન આખ્યાં કા, “કાય પવિત્રશાસ્ત્ર ઈ નાંચ આખે, કા મા દેવાળાલ બોદયે જાત્યે લોકહાહાટી પ્રાર્થના ગુઉ આખલા જાય? બાકી તુમાહાય તીં બાંડાહા ગુઉ બોનાવી રાખ્યાહાં.”

14 આંદળા એને લેંગડા દેવાળામાય ચ્યાપાય યેના, એને ચ્યે ચ્યાહાન હારાં કોઅયા.

15 બાકી જોવે મુખ્ય યાજકાહા એને મૂસા નિયમ હિકાડનારા ગુરુ ઈસુ મોઠે કામે, જ્યે ચ્યાય કોઅલે, એને પોહાહાન દેવાળામાય “દાઉદ રાજા પાહા હોસાન્ના” એહેકેન બોંબલીન આખતા વોનાયા, તોવે ચ્યા ખિજવાય ગીયા.

16 એને ચ્યાહાય ચ્યાલ પુછ્યાં, “ચેં કાય આખતેહે તીં તું વોનાય રિયહો કા?” ઈસુવે જાવાબ દેનો, “હાં, એને કાય તુમાહાય પવિત્રશાસ્ત્રામાય ઈ કોદહી નાંચ વાચ્યાહાં: કા પોહાહા એને દુદ પિતા પાહાહા મુયેથી, તુયે મહિમા કોઆડી?”

17 તોવે ચ્યાહાન છોડીન તો શેહેરા બારે બેથાનીયા ગાવામાય ગીયો, એને રાત તાં રિયો.

અંજુરા જાડા બારામાય હિકના
(માર્ક 11:12-14,20-24)

18 હાકાળેહે પાછો શેહેરામાય યેહે, તોવે ચ્યાલ બુખ લાગી.

19 વાટે મેરાવોય ચ્યે ચોક અંજુરા જાડ દેખ્યાં એને ચ્યા પાહી ગીયો, બાકી પાલાંજ દેખાયાં, તોવે ઈસુવે જાડાલ આખ્યાં, “આમી પાછે તુલ કોઅઇ દિહી, ફળ નાંચ લાગરી” અંજુરા જાડ તારાતુજ ઉખાય ગીયા.

20 ઈ એઇન શિષ્યહાન બોજ નોવાય લાગી ચ્યાહાય આખ્યાં, “ઈ અંજુરા જાડ કેહેકેન તારાતુજ ઉખાય ગીયા?”

21 બાકી ઈસુવે ચ્યાહાન જાવાબ દેનો, “આંચ તુમહાન હાચ્યાં આખતાહાવ, જોવે તુમા બોરહો કોઅહા એને મોનામાય શંકા નાંચ કોઅહા, તોવે યા અંજુરા જાડાલ ઓલાહાંજ નાંચ, બાકી એલા ડોગાલ તુમા આખહા, જો, એને દોરિયામાય જાય પોડ, તોવે ઈ ઓઅઇ જાઅરી.

22 એને જીં કાય તુમા પ્રાર્થનામાય માગતાહા, ઓહડો બોરહો રાખા કા તી તુમહાન મિળી જાય, તોવે પોરમેહેર ચ્યાહાટી ઈ કોય દી.”

ઈસુ ઓદિકારા બારામાય સાવાલ (માર્ક 11:27-33; લુક. 20:1-8)

23 ઈસુ એને ચ્યા શિષ્ય પાછા યેરુસાલેમ યેય ફૂગ્યા, એને જોવે તો દેવાળામાય હિકાડે તોવે મુખ્ય યાજક, મૂસા નિયમ હિકાડનારા ગુરુ એને આગેવાન ચ્યા ચ્યાપાય યેયન પુછા લાગ્યા. “તુલ ચેં કામે કોઆહાટી તોપાય કાય ઓદિકાર હેય? કુંયે તુલ ઓહડા ઓદિકારાહાતે દોવાડયોહો?”

24 તોવે ઈસુય ચ્યાહાન આખ્યાં, “આંચબી તુમહાન ચોક સાવાલ પૂછતાહાવ, જોવે ચ્યા તુમા માન જાવાબ દાહા, પાછે આંચ કા ઓદિકારાકોય કામ કોઅતાહાંવ તીં તુમહાન આખતાહાવ.

25 જોવે યોહાનાય લોકહાન બાપતિસ્મા દેના, તે કાય ચ્યા ઓદિકાર હોરગામાઅને પોરમેહેરા એહેરે કા માઅહા એહેરે આતો? માન આખા.” તોવે ચ્યા જાતેજ વિચાર કોઆ લાગ્યા કા હોરગામાઅને આખહુ તોવે, તો આમહાન આખરી કા, તોવે તુમાહાય ચ્યાવોય કાહાનાય બોરહો થોવ્યો?

26 એને જોવે આમા માઅહા એહેરે આખહુ તોવે કાય ઓઅઈ? ચ્યા યા હારકો જાવાબ નાંય દેય કાહાકા ચ્યા લોકહાથી બિઅતા આતા, જ્યા ઈ માનતા આતા કા, યોહાન પોરમેહેરા પાયને ચોક હાચ્યો ભવિષ્યવક્તા આતો.

27 એને ચ્યાહાય ઈસુવાલ જાવાબ દેનો કા, “આમા નાંય જાંઆજે કા યોહાનાલ લોકહાન બાપતિસ્મા દાંહાટી કુંયે દોવાડલો” તોવે ઈસુય ચ્યાહાન આખ્યાં, તે “આંયબી તુમહાન નાંય જાવાબ દાંઉ કા, ઈ કામ આંય કોઅહા ઓદિકારાકોય કોઅહુ.”

બેન પોહાહા દાખલો

28 “તુમા યા દાખલા કોય કાય હોમાજતાહા? ચોક માઅહા બેન પોહા આતા ચ્યે મોઠા પોહાલ જાયને આખ્યાં, ‘મા પોહા આજે દારાખા વાડયેમાય કામ કોઅજે.’

29 ચ્યે જાવાબ દેનો, ‘આંય નાંય જાવ,’ બાકી પાછે ચ્યાલ ચ્યા જાવાબાવોય પોસ્તાવો યેનો એને વાડયેમાય કામ કોઅરા જાતો રિયો.

30 તોવે ચ્યે બિજા પોહાપાય જાયને તેહેજ આખ્યાં, ચ્યે જાવાબ દેનો, ‘ઠીક આંય જાહાંવ,’ બાકી તો નાંય ગીયો.

31 યા બેની પોહામાઅને આબહા મોરજી પરમાણે કુંયે કોઅયા?” ચ્યાહાય આખ્યાં, “પેલ્લાય” ઈસુવે ચ્યાહાન આખ્યાં, “આંય તુમહાન હાચ્ચી વાત આખતાહાવ, કા જકાતદાર એને વેશા કામ કોઅનારે પોરમેહેરા રાજ્યામાય તુમહે કોઅતા પેલ્લા જાય.

32 આંય તુમહાન એહેકેન યાહાટી આખહુ કાહાકા યોહાન બાપતિસ્મા દેનારાય જોવે તુમહાન આખ્યાં, કેહેકેન હારાં જીવન જીવા જોજે, તોવે તુમાહાય ચ્યાવોય બોરહો નાંય કોઅયો: બાકી જાકાતદારે એને વેશા કામ કોઅનારે પાપ કોઅના બોંદ કોઅઈ દેના એને ચ્યા બોરહો કોઅયો, ઈ બોદા એઈન બી તુમાહાય પાપ કોઅના બોંદ નાંય કોઅયા એને ચ્યા બોરહો નાંય કોઅયો.”

ખારાબ ખેડુતાહા દાખલો

(માર્ક 12:1-12; લુક. 20:9-19)

33 “પાછો ઈસુ બિજા દાખલા દેયન યહૂદીયાહા આગેવાનાહાઆરે વાત કોઆ સુરુ કોઅયા ચોક માઅહાય ચ્યા રાનામાય દારાખા વાડી

લાવી, ચ્યાય રાના ચોમખી દોગડાહા ચોક બીતડા બોનાવ્યાં, એને ચોક રોહયા ખાડો ખોદ્યો, ચ્યાય બાંડાહા એને જોનાવરહા ઇહિને રાના હાંબાળ કોઅરાહાટી ચોક માળો પાડ્યો, પાછે ચ્યાય ચ્યા રાનાલ કોલહાક ખેડુતાહાન બાગે દેય દેના એને બિજા દેશા એછે લાંબી મુસાફીર્યેલ નિંગી ગીયો.

34 જોવે દારાખે પાકી ગીયે, તે ચ્યા ચાકારાહામાઅને ચોકાલ બાગ્યા ખેડુતાપાય દોવાડ્યો, કા ચ્યાલ દારાખાહા વાડયેમાઅને ભાગ લી યેય.

35 બાકી ખેડુતાહાય ચ્યાલ દોઇન માર દેનો, એને ચ્યાલ કાયજ નાંચ દેના એને પાછો દોવાડી દેનો.

36 પાછો વાડયે માલિકાય બિજા ચાકારાહાન દોવાડયા, જ્યા પેલ્લા કોઅતા વોદારી આતા, બાકી ચ્યા ખેડુતાહાય ચ્યાહાનબી તેહેજ કોઅયા.

37 સેવાટ ચ્યે ચ્યા પોહાલ દોવાડ્યો, કાહાકા ચ્યે એહેકેન જાંઅયા કા, મા પોહા ચ્યા દાક રાખી.

38 બાકી જોવે ખેડુતાહાય ચ્યા પોહાલ ચેતા દેખ્યા, તે ચ્યાહાય ચોક બીજહાન આખ્યાં, ‘એલો તે વારસદાર હેય, ચાલા, એલાલ આપા માઆઇ ટાકતા, તોવે વારસો આપહે ઓઅઇ જાઅરી.’

39 એને ખેડુતાહાય ચ્યાલ દોઇન, દારાખા વાડયે બાઆ લેય જાઅને માઆઇ ટાક્યો.

40 જોવે તો દારાખા વાડયે માલિક ચી તોવે તુમહાન કાય લાગહે કા દારાખાહા વાડયે માલિક કાય કોઅરી?”

41 તો યેયન ચ્યા ખેડુતાહાન માઆઇ ટાકી, એને દારાખાહા વાડી બીજહાન દેય દી.

42 ઈસુવે ચ્યાહાન આખ્યાં, “પવિત્રશાસ્ત્રામાય લોખલાં હેય તીં તુમાહાય કાદે દિહે નાંચ વાચ્યાહાં: ‘જ્યા દોગાડાલ કોડયાહાય નોકામ્યો હોમજ્યેલ, તોજ ખૂણા પાયા મુખ્ય દોગાડ બોની ગીયો, એલા પ્રભુ એસને ઓઅયા, એને આમે નોજાર માય તીં અદભુત હેય?’ ”

43 “ચ્યાહાટી આંચ તુમહાન આખડુ, કા પોરમેહેરા રાજ્ય તુમહે પાયરે લેય લેવામાય ચી, એને ચ્યાહાન દેનલા જાય, જું પોરમેહેરા આગનાયો માની.

44 જીં કાદાં માઅહું યા દોગડા ઉપે પોડી, ય્યા ટુકડા-ટુકડા ઓઅઇ જાય, બાકી જ્યા ઉપે ઓ દોગાડ પોડી, ય્યાલ બુપટા બોનાડી દી.”

45 મુખ્ય યાજક એને પોરૂષી લોક દાખલા વોનાઈન હોમજી ગીયા કા ઈસુ આમહે વિરુદ્ધમાય આખહે.

46 ય્યા ઈસુવાલ દોઈ દાં માગેત બાકી ય્યા લોકહાન બીયેત કાહાકા લોક ઈસુવાલ ભવિષ્યવક્તા માનેત.

22

વરાડા ખાયનાં દાખલો
(લુક. 14:15-24)

1 આજુ ઈસુ ય્યાહાન દાખલા દેયન આખા લાગ્યો,

2 “હોરગા રાજ્ય યા દાખલા હારખા હેય, ચોક રાજા આતો, ય્યા પોહા વોરાડ કોઅયા,

3 એને ય્યાય ય્યા ચાકારાહાન વોરાડામાય આમંત્રિત લોકહાન હાદાં દોવાડયા, બાકી ય્યા નાંચ યાં માગેત.

4 આજુ ચોકદા એ બિજા ચાકારાહાન દોવાડયા, એને ય્યાહાન આખ્યાં, ‘જ્યાહાન હાદદ્યા ય્યાહાન આખા કા એઅેયા, માયે જેવાણ તિયારી કોઅયા, એને મા બોયલ એને પાળલે વાછડે ખાંહાટી માઅલે હેતે, એને બોદા તિયારીજ હેય, વોરાડા જેવણામાય યા.’

5 બાકી ય્યાહાય નોજાર અંદાજ કોઅયી બાકી ય્યા પોત-પોતેહે કામે નિંગી ગીયા, કોલાહાક જાંઆ રાન ગીયા એને કોલાહાક જાંઆ વેપાર કોઅરા ગીયા.

6 એને બીજહાંય ય્યા ચાકારાહાન દોઅોઈન નકાર કોઅયા એને માઆઇ ટાક્યા.

7 જોવે રાજા ઈ વોનાયો, તોવે રાજા બિજવાઈ ગીયો, એને ય્યા સીપાડાહાલ દોવાડીન ય્યા ખૂન્યાહાન માઆઇ ટાક્યા, એને ય્યાહા શેહેરે બાળી ટાક્યે.

8 પાછે ચાકારાહાન આખ્યાં, ‘વોરાડા જેવાણ તે તિયારીજ હેય બાકી હાદલા લોક લાયકે નાંચ બોન્યા.

9 યાહાટી આમી તુમા બારે બોદે જાગે જાયા, એને જોલાબી લોક તુમહાન મીળે, ય્યા બોદહાન વરાડામાય ખાં હાદી લીયા.’

10 ચાકાર બારે ગીયા, એને બોદહાન ટોળો કોઅયા, હારાં માઠાં જીં મિવ્યાં તીં, એને વોરાડયો માંડવો વોરાડયાહા કોય બાઆઈ ગીયો.”

11 “જોવે રાજા વોરાડયાહાન એરા માજા યેનો, તોવે ચે તાં ચોક માઅહાલ દેખ્યો, તો વોરાડા ફાડકે પોવ્યા વોગાર યેનેલ.

12 તોવે રાજાય ચ્યાલ પુછ્યાં, ‘ઓ મા દોસ્તાર, વોરાડા ડોગલેં પોવ્યા વોગાર તું ઈહીં કાહા યેનો?’ બાકી તી માઅહું ઠાવકાજ રિયા.

13 તોવે રાજાય ચાકારાહાન આખ્યાં, ‘એલાલ આથ પાગ બાંદિન બાર્યા આંદારામાય ટાકી દિયા, તાં એલા રોડના એને દાત કોકડાવના રોય.’

14 કાહાકા બોજ લોક હાદલા હેતા બાકી નિવાડલા વોછાજ હેતા.”

કૈસરાલ કર દેઅના

(માર્ક 12:13-17; લુક. 20:20-26)

15 તોવે પોરૂષી લોકહાન જાયને આંદાર-આંદાર વિચાર કોઅયા, કા ચ્યાલ કેહેકેન વાત્યેહેમાય ફસાવજે.

16 ચ્યાહાય પોતાના શિષ્યહાન હેરોદ લોકહા ટોળા આરે ઈસુવાપાય ઈ આખા દોવાડયા, “ઓ ગુરુ, આમા જાંઅજેહે કા, તું સાદા હાચ્યાં આખતોહો એને તું યા બારામાય ચિંતા નાંય કોએ કા લોક તો બારામાય કાય વિચાર કોઅતાહા, કાહાકા તું બોદહાઆરે હારકો વેવાહાર કોઅતોહો, બાકી પોરમેહેરા વાટ હાચ્યાયે પરમાણે હિકાડતોહો. તે પાછે આમી આમહાન આખ, કાય કૈસરાલ કર દેઅના આમે નિયમા વિરુદ્ધ હેય?

17 તે પાછે આમી આમહાન આખ, કાય કૈસરાલ કર દેઅના આમે નિયમા વિરુદ્ધ હેય?”

18 ઈસુવાય ચ્યાહા ખારાબી એઇન આખ્યાં, “ઓ ડોંગી તુમા માન જુઠા આખવાકોય ફસવા કોશિશ કાહા કોઅય રીઅલા હેય?”

19 માન ચોક દીનાર (૧ દીનાર એટલે ચોકા દિહા કાંબારાં ઓઅહે) આંઆઈ દિયા, માન એરા દિયા.

20 તોવે ચે ચ્યાહાન આખ્યાં, “ઓ ફોટો એને નાંવ કા હેય?”

21 ચ્યાહાય આખ્યાં, “કૈસરા” તોવે ચે ચ્યાહાન આખ્યાં, “જીં કૈસર રાજા હેય, તીં કૈસરાલ દિયા, એને જીં પોરમેહેરા હેય, તીં પોરમેહેરાલ દિયા.”

22 ઈ વોનાઈન, ચ્યાહાન નોવાય લાગી, એને ચ્યાલ છોડીન ચ્યા ચાલ પોડ્યા.

પાછા જીવી ઉઠના એને વરાડા બારામાય
(માર્ક 12:18-27; લુક. 20:27-40)

23 ચ્યેજ દિહી સાદૂકી ટોળા કોલહાક લોક ઈસુવાપાય ચેના, સાદૂકી ટોળો ઈ માનેત કા મોઅલા માઅને પાછા જીવતા નાંચ ઓઅઇ હોકે.

24 ચ્યાહાય ચ્યાલ પુછ્યાં. “ઓ ગુરુ, મૂસાય આખલા આતા, કા જોવે કાદો પોહાલ પૈદા કોઅયા વોગાર મોઅઇ જાય, તો ચ્યા બાહા ચ્યા થેઅયેઆરે વોરાડ કોઇન ચ્યા બાહાહાટી પોહૈ પૈદા કોઅે.

25 આમી આમહે ઈહી હાંત બાહા આતા, બોદહા મોઠા બાહાય વોરાડ કોય લેદા બાકી વોગાર પોહાહા તો મોઅઇ ગીયો. ચ્યાહાટી ચ્યે થેઅયેલ બિજા બાહે રાખી.

26 ચેજપરમાણે બિજા બાહે ચ્યે વિધવાયેલ રાખી લેદી, બાકી તોબી વોગાર પાહાહા મોઅોઈ ગીયો, એને તીજ વાત તીજા બાહા આરે જાઈ. એને બોદા હાંતી બાહાહા આરે જાઈ,

27 છેલ્લે, તી થેઅેબી મોઅોઈ ગિઇ.

28 એને આમી આમહાન આખ, આમી ચે થેઅેયે વોરાડ હાંત માટડાઆરે ઓઅયા, તે જોવે મોઅલા માઅને પાછા જીવતા ઓઈ, તોવે તી કા થેઅે રોય? કાહાકા તી હાંતહ્યા થેઅે આતી.”

29 ઈસુવે ચ્યાહાન આખ્યાં, “તુમા જુઠા હેય કાહાકા તુમા નાંચ જાંઅેતકા પવિત્રશાસ્ત્ર કાય આખહે, એને તુમા પોરમેહેરા સામથ્યાં બારામાય નાંચ જાંઅેત.

30 કાહાકા જોવે મોઅલા માઅને પાછા જીવી ઉઠી, તોવે તે નાંચ માટડા એને નાંચ થેઅયો વોરાડ કોઅરી, બાકી હોરગામાય રોનારા પોરમેહેરા દૂતહા રોકે રોય.

31 એને મોઅલા માઅને પાછા જીવી ઉઠી ચ્યા બારામાય તુમાહાય નાંચ વાચ્યાહાં કા તુમહાન પોરમેહેર આખહે.

32 ‘આંચ આબ્રાહામા પોરમેહેર, એને ઈસાકા પોરમેહેર, એને યાકૂબા પોરમેહેર હેતાઉ?’ તો મોઅલાહા પોરમેહેર નાંચ, બાકી જીવતાહા પોરમેહેર હેય.”

33 જોવે ય્યા ઈ વોનાયા, તોવે ય્યા, ય્યા હિકાડનાથી બોજ નોવાય પામ્યા.

બદાહાથી મોઠી આગના

(માર્ક 12:28-34; લુક. 10:25-28)

34 જોવે પોરૂષી લોક વોનાયા કા ઈસુવે સાદૂકીયાહાન ઠાવકાજ રાખ્યા, તોવે ય્યા ટોળો વોળ્યા,

35 એને ય્યાહામાએને યોક મૂસા નિયમ હિકાડનારો ગુરુ, ઈસુવા પારાખ કોઅરાહાટી ય્યાલ પુછ્યાં કા.

36 “જોલ્યો આગના નિયમશાસ્ત્રામાય દેનહ્યો, ય્યાહામાએને બોદ્યેહેમાય મોહત્વા આગના કોઅહી?”

37 ઈસુય ય્યાલ આખ્યાં, “પ્રભુ પોરમેહેરાવોય તો પુરાં મોનથી, એને બોદા જીવા કોઇન, એને આખી બુદ્યે કોઅઈન, એને આખ્યે ગોત્યે કોઇન પ્રેમ રાખજે.

38 ઈજ પેલ્લી એને મુખ્ય આગના હેય.

39 એને બીજી યા રોકીજ હેય કા, તો પોતાવોય જોલો પ્રેમ રાખતોહો તોલોજ તું તો પોડોશાવોય તો રોકો પ્રેમ રાખ.

40 યોજ બેની આગના બોદા નિયમશાસ્ત્રા એને ભવિષ્યવક્તાહા આધાર હેય.”

ખ્રિસ્ત કા પોહો હેય?

(માર્ક 12:35-37; લુક. 20:41-44)

41 જોવે પોરૂષી લોક યોખઠા આતા, તોવે ઈસુવે ય્યાહાન પૂછ્યાં:

42 “ખ્રિસ્તા બારામાય તુમહાન કાય લાગહે? તો કા પોહો હેય?” ય્યાહાય જાવાબ દેનો, “દાઉદ રાજા.”

43 તોવે ઈસુવે ય્યાહાન આખ્યાં, “તોવે દાઉદ રાજા આત્મામાય રીન ય્યાલ કેહેકેન પ્રભુ આખી હોકહે?”

44 પ્રભુ પોરમેહેરાય મા પ્રભુવાલ આખ્યાં, “તું મા જમણે આથે બોહો, જાવ લોગુ આંય તો દુશ્માનાહાન આરવી નાંય દાંઉ તાંઉલોગુ.”

45 દાઉદ રાજા પોતેજ ય્યાલ પ્રભુ આખહે, પાછે તો ય્યા પોહો કેહેકેન ઓઅહે?

46 કાદો ચ્યાલ ચોકબી વાત આખી નાંચ હોક્યા, એને તોદહિને ચ્યાહાન સાવાલ પૂછના કાદા ઈમાત નાંચ ચાલી.

23

મૂસા નિયામ હિકાડનારા ગુરુ એને પોરૂષીયાહાથી હાયવીન રોઅના
(માર્ક 12:38-40; લુક. 20:45-47)

1 પાછે ઈસુવે લોકહા ટોળાહાન એને ચ્યા શિષ્યહાન આખ્યાં.

2 “મૂસા નિયમ હિકાડનારા ગુરુ એને પોરૂષી લોકહાપાંચ મૂસા નિયમાહાલ ઉડેથી હમજાડના ઓદિકાર હેય.

3 ચ્યાહાટી તુમહાન ચ્યા જી કાય આખે તી બોદા કોઆ એને પાળા, બાકી ચ્યાહા હારકા કામે તુમા મા કોઅહા, કાહાકા ચ્યા હિકાડતાહા બાકી ચ્યા પાળેત નાંચ.

4 ચ્યા બોજ બાઆય વોજો બોઇન માઅહા ખોવાહાવોય થોવતાહા, બાકી તી ઉસલાં હાટી ચોક આંગળી બી નાંચ લાવેત.”

5 ચ્યા બોદા કામ માઅહાલ દેખાડાં હાટી કોઅતાહા જ્યેહેવોય ચ્યા પવિત્રશાસ્ત્રા વચન લોખીન માથાવોય એને આથા આરે બાંદતા આતા, એને પોતાના ફાડકાહા છેડા પોઅળા કોઅતાહા.

6 જેવાણેહેમાય માનાપાના જાગો ચ્યાહાન ગોમહે, એને સોબાયે ઠિકાણે મુખ્ય જાગો જોજે.

7 આટામાય સલામ લેઅના એને લોક ચ્યાહાન ગુરુ આખતાહા ઈ ચ્યાહાન બોજ ગોમહે.

8 તુમા ગુરુજી નાંચ આખાડના, કાહાકા તુમહે ચોકુજ ગુરુ હેય: એને તુમા બોદા બાહા બોઅહી રોકા હેતા.

9 આપહે શારીરિક આબહાલ છોડીન ફાદાલબી દોરત્યેવોય આબહા માન નાંચ દેયના કાહાકા પોરમેહર તુમહે ચોકુજ આબહો હેય, જો હોરગામાય હેય.

10 એને તુમા કાદાલ “માલિક” મા આખહા કાહાકા તુમહે માલિક ચોકુજ હેય, એટલે ખ્રિસ્ત.

11 તુમહેમાય જો મોઠો ઓરા માગહે તો તુમહે ચાકાર રા જોજે.

12 જું માઅહું ચ્યા પોતેજ મોઠા બોના માગહે, તો વાહનો બોનાડલો જાય, એને જું માઅહું પોતેજ વાહના બનેહે, ચ્યાલ મોઠો બોનાડલો જાય.

13 ઓ ડોંગ્યાહાય મૂસા નિયમ હિકાડનારા ગુરુ એને પોરૂષી લોકહાય તુમહાવોય હાય, તુમા મુશીબાતમાય હેય, તુમા માઅહા વિરુદ્ધ હોરગા રાજ્યા બાઅણે બંદ કોઅઇ દેતહા, તુમા પોતે ચ્યામાય નાંય જાત, એને ચ્યામાય જાનારાહાલ બી નાંય જાં દેત.

14 ઓ ડોંગ્યા મૂસા નિયમ હિકાડનારા ગુરુવાહાય એને પોરૂષીહાય તુમા મુશીબાતમાય હેય, તુમા વિઘવા બાયહે ગોએ લુટી લેતહા, એને બીજહાન દેખાડાહાટી લાંબી વાઆ પ્રાર્થના કોઅતાહા, પોરમેહેર હાચ્યાંજ ચ્યાહાન કોઠાણ સાજા દી.

15 ઓ ડોંગ્યા મૂસા નિયમ હિકાડનારા ગુરુવાહાય એને પોરૂષી લોકહાય તુમા મુશીબાતમાય હેય, તુમા ચોકા જાંઆલ તુમહે શિષ્ય બોનાડાહાટી બોદેજ જાગે જાતાહા, એને જોવે તો તુમહે શિષ્ય ઓઅઇ જાહાય તોવે ડાબાલ નરકા કોળી લાયકે બોનાડતાહા.

16 ઓ આંદળા આગેવાનાહાય તુમા મુશીબાતમાય હેય, તુમા એહેકેન આખતાહા કા દેવાળા કોસામ ખાય તોવે કાય ફેર નાંય, બાકી દેવાળા હોના કોઇન કોસામ ખાય તો બાંદાય જાય.

17 ઓ મુખાહાય, ઓ આંદળાહાય, કું મોઠો હેય, હોના કા દેવાળ જ્યાકોય હોના પવિત્ર ઓઅહે?

18 એને આખતાહા વેદે કોસામ ખાય તે તોવે કાય ફેર નાંય, બાકી વેદેવોય ચોડાવલી બેટે કોઇન કોસામ ખાય તોવે બાંદાય જાય.

19 ઓ આંદળાહાય, કું મોઠા હેય, બેટ મોઠી કા વેદી જ્યેકોય બેટ પવિત્ર બોનહે?

20 ચાહાટી જો વેદે કોસામ ખાહે, તો ચ્યે, એને જું કાય ચ્યાવોય હેય, ચ્યે બેટે બી કોસામ ખાહે.

21 એને જું માઅહું દેવાળા કોસામ ખાય તો દેવાળા એને દેવાળામાય વોહતી કોઅનારા પોરમેહેરા કસમ ખાય.

22 જું માઅહું હોરગા કોસામ ખાય તી પોરમેહેરા સિંહાસન એને ચ્યાવોય બોહનારા કોસામ ખાહે.

23 ઓ ડોંગ્યા મૂસા નિયમ હિકાડનારા ગુરુવાહાય, એને પોરૂષી લોકહાય તુમહાવોય હાય, તુમા ફુદીના, એને સોફ, એને જીરા દોસમો ભાગ દેતહા, બાકી તુમાહાય નિયમશાસ્ત્રા ગંભીર વાતો એટલે ન્યાય, એને દયા, એને બોરહાલ છોડી દેનહા, ગોમે તે તુમા ચાલ બી કોઅતા રોતા, એને ચાલ બી નાંચ છોડતા.

24 ઓ આંદળા ગુરુવાહાય, તુમા મોગાહાલ કાડી ટાકતાહા બાકી ઉટડાલ ગીળી જાતાહા.

25 ઓ ડોંગ્યા મૂસા નિયમ હિકાડનારા ગુરુવાહાય એને પોરૂષી લોકહાય તુમહાવોય હાય, તુમા થાળી ઉપે-ઉપે ચોળતાહા, માજે લોબ એને વ્યબિયાર બોઆલા હેય.

26 ઓ આંદળા પોરૂષી લોકહાય, પેલ્લા વાટકા એને થાળી માજેરે ચોળા તોવે બાઆરે બી ચોખ્ખાં ઓઅરી.

27 ઓ ડોંગ્યા મૂસા નિયમ હિકાડનારા ગુરુવાહાય એને પોરૂષી લોકહાય તુમહાવોય હાય, તુમા ચુના લાવલા માહણા હારકા હેતા બાઆરે હારે ઉજળે દેખાતેહે, બાકી માજે મોઅલા માઅહા આડકે એને બોદા હોડલા બાઆલા હેય.

28 તેહેજ કોઇન તુમા ઉપેરે બોદહાન હારાં ન્યાયી દેખાતાહા, બાકી માજે ડોંગ એને પાપાહા કોઇન બોઆલા હેતા.

29 ઓ ડોંગ્યા મૂસા નિયમ હિકાડનારા ગુરુવાહાય એને પોરૂષી લોકહાય તુમહાવોય હાય, તુમા ભવિષ્યવક્તાહા માહણો હુદરાવતાહા એને ન્યાયી લોકહા માહણો બોનાવતાહા.

30 એને એહેકેન આખતાહા, જોવે આમા આમે આગલા ડાયહા સમાયામાય રોતા તે ભવિષ્યવક્તાહાલ માઆઇ ટાકાડનામાય ભાગી નાંચ રોતા.

31 ચાકોય તુમા પોતાવોય સાબિતી કોઅતાહા, કા તુમા ભવિષ્યવક્તાહાલ માઆઇ ટાકનારા પાહા તુમાંજ હેતા.

32 માન માલુમ હેય, કા પોતાના ચ્યા પાપહાલ પુરાં કોઅનારા હેય, જ્યાહાન આપહે આગલા ડાયહાય સુરુ કોઅલા આતા.

33 ઓ હાપડા હારખા જેરીવાળા લોક એને ચ્યાહા પોહાહાય તુમા નરકા કોળી ડોડા કોય નાંચ બોયહા.

34 યાહાટી મા આખલ્યા વોનાયા, આંય તુમહાપાય ભવિષ્યવક્તા, બુદેવાળા એને મૂસા નિયમ હિકાડનારા ગુરુહુલ દોવાડુહુ, એને તુમા આહામાઅને કોલાહાલ ચોક માઆઇ ટાકહા, એને કોલહાક હુળીખાંબાવોય ચોડવાહા, એને કોલહાક તુમહે સોબાયે ઠિકાણે ચોપકાહા માર ઠોકહા, એને કોલહાક ચોકા ગાવામાઅને બિજા ગાવામાય તાંગાડતા ફીરહા.

35 ન્યાયી હાબેલાથી લેઈને બીરીક્યા પોહો જખરિયા લોગુ, જ્યાલ તુમાહાય દેવાળા એને બેટ ચોડાવના વેદે વોચમાય માઆઇ ટાક્યો, જોલા ન્યાયી લોકહા ખૂન જાયા, બોદા તુમહેવોય ચેય પોડી.

36 આંય તુમહાન હાચ્યાં આખતાહાવ, યા બોદહા ખૂન કોઅના સાજા ચે પેડચે લોકહાવોય ચી પોડી.

યેરૂસાલેમ શેહેરાહાટી ઈસુવા પ્રેમ
(લુક. 13:34-35)

37 ઓ યેરૂસાલેમ શેહેરા લોકહાય, ઓ યેરૂસાલેમ શેહેરા લોકહાય, તુમા ભવિષ્યવક્તાહાલ માઆઇ ટાકતાહા, જ્યાહાલ તુમહેપાય દોવાડચેલ, આહાન તુમા દોગડાકોય ઠોકતાહા. કોલાદા માયે ચોકઠા કોઅરા ઇચ્છા કોઅયી, કા જેહેકોય કુકડી પિચલાહાલ પાખડા તોળે બોચાવ કોઅહે, તેહેકોય આંયબી તો પાહાહાન રાખવાળી કોઉ, બાકી તુમહે ઇચ્છા નાંય આતી.

38 યાહાટી આમી હોમજી લા કા તુમહે ગોઅ તુમહેહાટી ઉજાડ કોઅવામાય ચી.

39 કાહાકા આંય તુમહાન આખતાહાવ, કા આમીને લેઈને જાવ લોગુ તુમા નાંય આખહા, બોરકાત વાળો હેય જો, પ્રભુ ઓદિકારાકોય ચેહે, તાંવ લોગુ તુમા માન પાછા કોદહી નાંય એઅહા.

24

ઈસુવાય દેવાળા નાશ કોઅના ભવિષ્યવાણી
(માર્ક 13:1-31; લુક. 21:5-33)

1 જોવે ઈસુ દેવાળામાઅને નિંગીન જાં આતો, તોવે આ શિષ્ય દેવાળા રચના દેખાડાં હાટી આપાય ચેના.

2 ઈસુવે આહાન આખ્યાં, “તુમા ઈ બોદા એએતાહા બાકી, આંય તુમહાન આખહુ, ચોકબી દોગાડ પોતે જાગાવોય નાંય છોડી, આ બોદા નાશ કોઅઇ દી.”

ઈસુ પાછા ચેયના નિશાણી

3 જોવે તો જૈતુના ડોગાવોય બોઠલો આતો, તોવે એકાંતમાય શિષ્યહાય ચેયન પુછ્યાં, “આમહાન આખ કા ચો વાતો કોવે ઓઅરી? તો ચેયના એને દુનિયા છેવાટે કાય નિશાણી રોય?”

4 ઈસુવે આહાન આખ્યાં, “હાયવીન રોજા કા તુમહાન કાદો નાંય છેતરે.

5 બોજ લોક મા નાંવા કોઇન ચી, અંચે આખી, આંય ખ્રિસ્ત હેતાઉ, એને બોજ લોકહાન આહા માનાડાંહાટી છેતરી.

6 બાકી જોવે તુમા લોડાઈ, એને લોડાયેહે વાતો વોનાયાહા, તોવે મા ગાબરાયાહા, કાહાકા ઈ ઓઅનારાંજ હેય, બાકી દુનિયા છેવાટ તારાત નાંય ઓઅરી.

7 ચોક જાતી લોક ગેર ચહૂદી લોકહાવોય હમલો કોઅરી એને ચોક દેશા લોક બિજા દેશા લોકહા વિરુદ્ધ લોડી, બોદેજ દોરતીકંપ ઓઅરી.

8 એને કાળ પોડી એને ઈ દુઃખ પોહાહા જન્મા પેલ્લા ઓઅનારી પીડાયે હારકા હેય.

9 તોવે જ્યા લોક તુમહે વિરુદ્ધ કોઅતાહા આ આબદા દાંહાટી તુમહાન દોઅવાડી દી, એને તુમહાન માઆઇ ટાકવામાય ચી, કાહાકા તુમા મા શિષ્ય હેય યા લેદે, બોદી જાત્યા લોક તુમહેઆરે દુશ્માની કોઅરી.

10 તોવે બોજ લોક માયેવોય બોરહો કોઅના બંદ કોઅઇ દી, એને ચોકબિજાલ દોઅવાડી, એને ચોકબીજાઆરે આડાઇ કોઅરી.

11 એને બોજ જુઠા ભવિષ્યવક્તા નિંગી, એને બોજ લોકહાન દોગો દી.

12 એને પાપહાલીદે બોજ લોક ચોકા બિજાવોય પ્રેમ નાંય કોઅરી.

13 બાકી જ્યા લોક માયેવોય બોરહો કોઅનામાય લાગી રોય, એને દોરત્યેવોય આ જીવના છેલ્લે લોગુ મા પાહલા ચાલતો રોય, આ પાપહા ડોંડ બોગાવનાથી તારણ ઓઅઇ જાઅરી.

14 એને પોરમેહેરા રાજ્યા ઈ હારી ખોબાર બોદા દુનિયામાય પોઅચાડવામાય ચી, કા બોદી જાત્યે લોકહાન પોરમેહેરાવોય બોરહો કોઆ મોકો મીળે, તોવે દુનિયા છેવાટ ઓઅરી.”

બોજ ખારાબ દિહી

15 ચોક દિહી તુમા ખારાબ વાના દેખહા જ્યા વાત દાનિએલ ભવિષ્યવક્તાથી ઓઅયેલ, દેવાળાલ છોડી દેવામાય ચી, તો આ જાગાવોય ઉબો રોય જાં આલ ઉબો રોઅના કાયજ ઓદિકાર નાંય હેય. જો કાદો વાયહે તો ચાલ હોમજાંહાટી કોશિશ કોએ, જોવે તો સમય ચી.

16 જ્યા લોક ચઢૂદીયા વિસ્તારામાય હેય આહાન બોચાંહાટી ડોગહાવોય નાહી જાં પોડી.

17 જો ગોઆ ઉપે ચોડયો ઓરી, તો કાયબી લાંહાટી પાછા નિચે ગોઆમાય નાંય ઉરાય;

18 એને જો રાનામાય ગીયો ઓરી તો, ડોગલાં લાંહાટી પાછો ગોઓ નાંય વોળી યેય.

19 ઈ અં બાયહેહાટી ચોક નોવાય લાગે ઓહડો સમય ઓઅરી જ્યો મોયનાવાળ્યો હેય, એને આ બાયો જ્યો પોહાહાન દુદ પાજી રિઅલ્યો હેય, અંહેલ નાહરાં બોજ કોઠાણ પોડી.

20 ચાહાટી પ્રાર્થના કોઅચા કોઆ કા ઈ બોદા હીયાળામાય નાંય બોને, જોવે મુસાફીર કોઅરા કોઠાણ પોડે, પાછે આરામા દિહી એહે તેહે નાહરાં નાંય પોડે.

21 આ દિહાહામાય લોક બોજ ગંભીર રીતે પીડિત ઓઅરી, જેહેકોય લોકહાય કોદહી ઓહડો સામનો નાંય કોઅલો હેય જોવે પોરમેહેર પેલ્લા દુનિયા બોનાવલા આતા, લોક પાછા એહેકેન પીડિત નાંય ઓઅરી.

22 બાકી પોરમેહેરાય આ દુઃખા દિહી ઓછા કોઅઇ દેઅના નિર્ણય લેદલો હેય, નેતે, કાદાબી જીવા બોચાવ નાંય ઓઅતો, બાકી આ નિવડી લેદલાહા લીદે જ્યાલ આય નિવડયાહા, આ દિહહાલ ઓછા કોઅરી.

23 એ સમયે તુમહાન ચોકતા એહેકેન આખે કા, એઆ, ખ્રિસ્ત ઈહી હેય, કા એઆ તાં હેય, તોવે તુમા બોરહો મા થોવતા.

24 “કાહાકા જુઠા ખ્રિસ્ત્યા એને જુઠા ભવિષ્યવક્તા યી, એને ઓહડે મોઠે ચમત્કારાહા ખોટું કામે કોઅનારા બોની, કા ચ્યા લોકહાન દોગો દાંહાટી જ્યાહાલ પોરમેહેરાય નિવડી લેદલા હેય.

25 એઆ, માયે તુમહાન પેલ્લાજ ઈ બોદા ઓઅરી ચ્યા બારામાય આખી દેનહા.

26 યાહાટી જોવે એ તુમહાન એહેકેન આખરી, ‘એઆ, તો ઉજાડ જાગામાય હેય,’ તે બારે નાંચ નિંગી જાઅના, યા ‘એઆ, તો ખોલ્યેમાય હેય,’ તે ચ્યાહાવોય બોરહો નાંચ કોઅના.”

27 કાહાકા જેહેકોય વીજળી દિહી ઉદા પાયને નિંગીન દિહી બુડતા લોગુ ચમકેહે, તેહેકોયજ માઅહા પોહા બી ચેયના ઓઅરી.

28 જાં મુરદાં હેય તાંજ ગીદ બેગા ઓઅતાહા.

માઅહા પાહા ચિન્હે આકાશમાય દેખાયી

29 “ચ્યા દિહાહામાય, બોજ પીડા સમય બંદ ઓઅરા પાછે” દિહી એને ચાંદ ઉજવાડો દેઅના બંદ કોઅય દી, એને આકાશમાઅને ચાંદાલેં ટુટી પોડી, એને આકાશમાઅને પરાક્રમ આલી જાય.

30 તોવે માઅહા પાહા ચિન્હે આકાશમાય દેખાડી દી, એને તોવે આખી દોરત્યેવોયને બોદા લોક છાતી ઠોકી, એને માઅહા પોહાલ મોઠા સામર્થ્યમાંચ એને મહિમા ને હાતે આકાશા વાદળાઊપે ચેતા દેખી.

31 તો રણસીગડા મોઠા આવાજા આરે પોતાના દૂતહાન દોવાડી, એને તો આકાશા યા છેડાપાયને તે ચ્યા છેડા લોગુ, ચારી ચોમખીને ચ્યા નિવાડલા લોકહાન બેગા કોઅરી.

અંજુરા જાડાવોયને હિકના

32 “અંજુરા જાડાવોયને ઓ દાખલો હિકાં, જોવે ચ્યા કોવવ્યો ડાળખ્યો ફૂટ્યોહો એને ડાહાગ્યો પીલવાત્યો લાગે, તોવે તુમહાન ખોબાર પોડહે કા ચોમહા સમય પાહાય ચેય ગીયહો.

33 તેહેજ કોઇન, જોવે ઈ બોદા તુમહાન બોનતાં દેખાય, તોવે તુમહાન ખોબાર પોડી જાં જોજે કા દુનિયા છેલ્લો સમય ચેય ગીયહો એને તો દુઉ નાંચ હેય.

34 આંય તુમહાન હાચ્યાં આખતાહાવ, કા ઈ બોદા યે પેડયે લોક તોવેબી જીવતા રોય જોવે ઓહડા બોનાવ બોની.

35 આકાશ એને દોરતી નાશ ઓઅઇ જાય, સાદામાટે નાંય રોય, બાકી માયે જી આખ્યાહા તી સાદામાટે હાચ્યાં રોય.”

જાગતા રા

(માર્ક 13:32-37; લુક. 17:26-30,34-37)

36 યો વાતો કોઅયેહે ગેડયે એને કોઅહે દિહયે ઓઅરી કાદાજ નાંય જાંએ, નાંય હોરગા દૂત જાંએ, નાંય પોરમેહેરા પોહો જાંએ, બાકી આબહોજ ઓ દિહી એને ઈ ગેડી જાંએ.

37 જેહેકોય નોહા દિહી આતા, તેહેકેન માઅહા પોહા યેયના બી ઓઅઇ.

38 કાહાકા જેહેકોય રેલ યેઅના પેલ્લા દિહીહયામાય, જોદીહી લોગુ નોહો ઉડીમાય નાંય ચોડયેલ, ચ્યા દિહયા લોગુ લોક ખાં-પિયાં આતા, એને ચ્યા વોરાડે બી કોઅતા આતા.

39 એને જાંઉ લોગુ રેલ યેઇન ચ્યાહાન વોવાડી નાંય લી ગીયી, તાંઉલોગુ ચ્યાહાન કાંઇજ ખોબાર નાંય પોડ્યા, તેહેકોયજ માઅહા પોહા બી યેઅના ઓરી.

40 ચ્યા સોમાયામાય બેન માઅહે રાનામાય રોય, ચોક લેય લેવામાય યી એને બિજાં છોડી દેવામાય યી.

41 બેન થેએયો ગોઅટયે બોહીન દોળી, ચ્યેહેમાઅને ચોક લેય લેવામાય યી એને બીજી છોડી દેવામાય યી.

42 યાહાટી ઈસુય શિષ્યહાન આખ્યાં કા, તુમા નાંય જાંએ કા પ્રભુ કોવે પાછો યી.

43 બાકી ઈ જાંઆય લીયા કા જો ગાઆ માલિકાલ એહેકોય માલુમ રોતા કા બાંડ કોઅહે વેળાયે યી, તે તો જાગતો રોતો, એને પોતે ગોઆમાય ચોરી નાંય ઓઅરા દેતો.

44 યાહાટી તુમાબી તિયાર રા, કાહાકા જ્યે વેળાયે બારામાય તુમા જાંએબી નાંય, ચ્યે વેળાયે માઅહા પોહો યેય જાય.

બોરહાવાળો ચાકાર એને ખારાબ ચાકાર

(લુક. 12:41-48)

45 “આર્મી: બોરહાવાળો એને બુદ્ધિમાન ચાકાર કું હેય, જ્યાલ માલિકાય પોતાના નોકાર-ચાકારાવોય કારબારી બોનાડયોહો, કા તો વેળાયે વોય ચ્યાહાન ખાઅના દેય?

46 ઘન્ય હેય, તો ચાકાર, જ્યાલ માલિક યેઇન એહેજ કોઅતો એએ.

47 આંય તુમહાન હાચ્યાંજ આખતાહાવ કા, તો ચ્યાલ ચ્યા પોતાની બોદી મિલકાત્યે ઓદિકારી બોનાડી દી.

48 બાકી જોવે મૂર્ખ ચાકાર એહેકન વિચાર કોઆ લાગે કા, મા માલિકા યેયના આજુ વાઆ હેય.

49 એને પોતાના ચાકારાહાન માર ઠોકાં લાગે, એને પીનારાહા આરે ખાય-પિયે.

50 તોવે તો ચ્યા ચાકારા માલિક પાછો યી, જોવે તો ચ્યા વાટ નાંય જોવે, એને ઓહડા સોમાયા જ્યા બારામાય તો જાંઆય બી નાંય.

51 તોવે તો ચ્યાલ બોજ કોઠાણ સાજા દેયન, એને ચ્યા ભાગ ડોંગ્યા લોકહાઆરે ગોણવામાય યી: જાં રોડના એને દાત કોકડાવના હેય.”

25

દોહો કુંવારીહે દાખલો

1 “પાછે ઈસુય ચ્યાજ શિષ્યહાન આખ્યાં, જોવે આંય, માઅહા પોહો પાછો યીહીં, તોવે હોરગા રાજ્ય એ દોહો કુંવારીયેહે પરમાણે ઓઅરી; જ્યો પોતાના દિવા લેઈને વોવડાલ મિળાં નિંગ્યહો.

2 એહેમાય પાય મૂર્ખ એને પાય હોમાજદાર આત્યો.

3 મૂર્ખ કુંવારીહેય એહે દિવા તે લેદા, બાકી એહેય જૈતુના તેલ નાંય લેદા.

4 બાકી જ્યો હોમાજદાર આત્યો એહેય દિવા આરે સીયહયેમાય જૈતુના તેલ બી બોઅઈ લેદા.

5 જોવે વોવડાલ યાં વાઆ લાગી ગીયી, તોવે એ બોદહયેન નિંદ યા લાગી, એને ચ્યો હૂવી ગીયો.”

6 “આરદે રાતી બોબલા લાગ્યે: એઅયા, વોવડો યેય રિયહો, ચ્યાલ મિળાં ચાલા.”

7 તોવે બોધો કુંવારીયો ઉઠીન એહે દિવા હારાં કોઅરા લાગ્યો.

8 એને એ મૂરખ્યેહેય હોમાજદારહયેલ આખ્યાં, તુમહે જૈતુના તેલામાંઅને વાયજ આમહાનબી દિયા, કાહાકા આમહે દિવા ઉલાય જાં કોઅતાહા.

9 બાકી હોમાજદારહયે જાવાબ દેનો કા ઈ તેલ આમે એને તુમહેહાટી પુરાં નાંય ઓઅરી, હારાં તે ઈ હેય કા તુમા વેચનારાહાપાંય જાયને પોતાહાટી વેચાતાં લીયા.

10 જોવે યો વેચાતાં લાં જાત, તોવે વોવડો યેય પોઅચ્ચેલ, એને જ્યો તિયારી આત્યો, યો ય્યાઆરે વોરાડા ગોઆમાય જાત્યો રિયો એને બાઅણા લાવી લેદા.

11 યા પાછે બીજ્યો કુંવારીયોબી યેચન વોવડાલ આખા લાગ્યો, ઓ માલિક, આમહેહાટી બાઆં ઉગાડી દે.

12 ય્યાય જાવાબ દેનો, કા આંય તુમહાન હાચ્યાંજ આખતાહાવ, કા આંય તુમહાન નાંય વોળખું.

13 યાહાટી જાગતા રિયા, કાહાકા તુમહાન નાંય ખોબાર મા પાછા યેચના બારામાય, એને ય્યા સોમાયા બારામાય.

ત્રીન ચાકારાહા દાખલો (લુક. 19:11-27)

14 “હોરગા રાજ્ય ય્યા માઅહા હારકા હેય, જ્યાંય પારદેશ જાતી વેળાયે પોતાના ચાકારાહાન હાદિન ય્યાહાન ય્યા મિલકાત્યે માઅને કોલહાક પોયહા હોઅપો દેના.

15 એ યોકાલ પાય ઓજાર દેના, બિજાલ બેન, એને ત્રીજાલ ચોક, એટલે બોદહાન ય્યાહા લાયકાત પરમાણે દેના, તોવે તો પારદેશ ચાલ્યો ગીયો.

16 તોવે જ્યાલ પાય તાલાંત મિળ્યાં એટલે ચોક તાલાંત પંદર વોરહા મોજરી ઓઅહે, ય્યાય તારાતુજ જાયને વેપાર કોઅયો એને પાય બિજા પાછા કામાવ્યા.

17 એજ રીતેકોય જ્યાલ બેન તાલાંત મિળ્યાં, ય્યાય બી પાછા બેન તાલાંત કામાવ્યા.

18 બાકી જ્યાલ ચોક તાલાંત મિળ્યો, ય્યાય જાયને દોરતી ખોદી એને ય્યા માલિકા દેનલા તાલાંત દોબાડી દેના.”

19 “બોજ દિહયા પાછે ય્યા ચાકારાહા માલિક યેનો એને ય્યાહાપાઅને ઇસાબ લેતો લાગ્યો.

20 જ્યાલ પાય ઓજાર મિળ્યેલ, તો પાય ઓજાર પાછા લેય યેયન આખા લાગ્યો, ‘ઓ માલિક, તુયે માન પાય ઓજાર હોપલા, એએ માયે બિજા પાય ઓજાર કામાવ્યાહા.’

21 ચ્યા માલિકાય ચ્યાલ આખ્યાં, ધન્ય હેય મા લાયક્યે એને ઈમાનદાર ચાકાર, તું વોછામાય ઈમાનદાર રિયો, આંય તુલ બોજ વસ્તુહુ ઓદિકારી બોનાડહી, તો માલિકા આનંદામાય ભાગીદાર બોન.”

22 “એને જ્યાલ બેન ઓજાર મિળ્યેલ, ચ્યાય બી યેયન આખ્યાં, ‘ઓ માલિક, તુયે માન બેન ઓજાર હોપલા, એએ, માયે બેન ઓજાર પાછા કામાવ્યાહા.’

23 ચ્યા માલિકાય ચ્યાલ આખ્યાં, ધન્ય હેય મા લાયક્યે એને ઈમાનદાર ચાકાર, તું વોછામાય ઈમાનદાર રિયો, આંય તુલ બોજ વસ્તુહુ ઓદિકારી બોનાડહી, તો માલિકા આનંદામાય ભાગીદાર બોન.”

24 “તોવે જ્યાલ ચોક ઓજાર મિળલા આતા, ચ્યાય યેયન આખ્યાં, ‘ઓ માલિક, આંય તુલ જાંઅતો આતો કા, તું બોજ કોડાક માઅહું હેય: તું ઓહડા માઅહા રોકો હેય જો નાંય બિયારો પોઅય બાકી પાક ચોખઠા કોઅના આશા રાખહે.’

25 ચાહાટી જોવે આંય તો પોયહા ટાકી દાંઉ તે તું માન સાજા દેહે, એને જાયન તો પોયહા દોરત્યેમાય દાટી દેના, એએ જું તો હેય, તી ઈ હેય.

26 ચ્યા માલિકાય ચ્યાલ જાવાબ દેનો, ઓ નોકામ્યા એને આળહ્યા ચાકાર, જોવે તું જાંઅતો આતો કા આંય ઓહડા માઅહા રોકો હેય, જો નાંય બિયારો પોઅય બાકી પાક ચોખઠા કોઅના આશા રાખહે.

27 તે તુયે જાંઆ જોજતાં કા, મા પોયહા સાવકારાપાય થોવી દેતો, તોવે આંય યેયન મા પોયહા વિયાજ હાતે લી લેતો.

28 તોવે ચ્યા માલિકાય બિજા ચાકારાહાન આખ્યાં, ચ્યા વોઅરે પોયહા લીયા એને જ્યાવોય દસ ઓજાર હેય ચ્યાલ દેય દા.

29 કાહાકા જ્યા પાય હોમાજ હેય, તો વોદારી હોમાજ મેળવી, બાકી જ્યા પાય કાય હોમાજ નાંય મીળે, ચ્યાપાય જું વોછીબી હોમાજ ઓરી તીં બી ચ્યાપાઅને ખોવાય જાય.”

30 ચ્યા નોકામ્યા ચાકારાલ બારે આંદારામાય ટાકી દા, જાં રોડના એને જાં દાત કોકડાવના ઓરી.

ઈસુવા રાજ્યાસન

31 “જોવે આંય, માઅહા પોહો પાછો ચીહીં, તોવે આંય મા મહિમામાય ચીહીં એને બોદા હોરગા દૂતહાન મા આરે લેય ચીહીં, તોવે આંય બોદા લોકહા ન્યાય કોઅરાહાટી પોતે મહિમામય રાજ્યાસનાવોય બોહહી.

32 એને બોદી જાત્યો મા હામ્મે ચોકઠી કોઅવામાય ચી, એને જેહેકોય ચોક ગોવાળ ગેટાહાલ એને બોકડાહાલ આલાગ કોઅઇ દેહે, તેહેકોય આંય ચ્યાહાન ચોકબિજાથી આલાગ કોઅઇ દિહી.

33 આંય ગેટાહાલ એટલે જ્યા ન્યાયી લોકહાન ચ્યા જમણી એછે એને બોકડાહાલ એટલે ખારાબ લોકહાન મા ડાબી એછે ઉબે કોઅહી.

34 તોવે, રાજા ચ્યા જમણી વાળાહાલ આખરી, ‘ઓ મા આબહા બોરકાતવાળા લોક, યા, એને મા એને ચ્યા રાજ્યા ઓદિકારી ઓઅઇ જાય, જું દુનિયા શુરવાતથી તુમહેહાટી તિયારી કોઅલા હેય.

35 કાહાકા આંય બુખો આતો, એને તુમાહાય માન ખાઅના દેના, આંય તરસ્યો આતો તોવે તુમાહાય માન પાઆઈ દેના, આંય પારકો આતો, બાકી તુમાહાય માન તુમહે ગોઆમાય જાગો દેનો.

36 આંય ઉગાડો આતો, એને તુમાહાય માન ડોગલે પોવાડયે, આંય માંદગી માય આતો, તોવે તુમાહાય મા ચાકરી કોઅચી, આંય જેલેમાય આતો તોવે તુમા માન મિળાં યેના.’ ”

37 “તોવે ન્યાયી માન જાવાબ દેઅરી, ‘ઓ પ્રભુ, આમાહાય તુલ કોવે બુખો દેખ્યો, એને ખાઅના ખાવાડયા? કા તરસ્યો આતો તોવે પાઆઈ પાજ્યાં?

38 આમાહાય તુલ કોવે પારકો દેખ્યો એને આમે ગોઅમે રાખ્યો કા ઉગાડો દેખ્યો, એને ડોગલે પોવાડયે?

39 આમાહાય કોવે તુલ બિમાર કા જેલેમાય દેખ્યો, એને તુલ મિળાં યેના?”

40 તોવે રાજા ચ્યાહાન જાવાબ દી, આંય તુમહાન હાચ્યાં આખતાહાવ કા, તુમાહાય મા યા વાહનામાય વાહના શિષ્ય માઅને ચોકા આરેબી કોઅચા, તી માંજ આરે કોઅચા?”

41 “તોવે તો ડાબી બાજુ વાળાહાલ આખરી, ઓ હારાપી લોક, મા હામ્મેથી ચ્યે નરકા કોબ્યેમાય જાતે રા, જો સૈતાન એને ચ્યા દૂતહાહાટી

પોરમેહેરાય તિયાર કોઅયીહી.

⁴² કાહાકા આંય બુખો આતો, એને તુયે માન ખાઅના નાંય દેનાઃ આંય તરસ્યો આતો, એને તુયે માન પાઆઈ નાંય પાજ્યાં.

⁴³ આંય પારકો આતો, એને તુમાહાય માન તુમહે ગોઅ નાંય રાખ્યો, આંય ઉગાડો આતો એને તુમાહાય માન ડોગલે નાંય પોવાડયે, આંય બિમાર એને જેલેમાય આતો, એને તુમાહાય મા હાંબાળ નાંય લેદી.”

⁴⁴ “તોવે ચ્યા જાવાબ દેઅરી, ‘ઓ પ્રભુ આમાહાય તુલ કોવે બુખો, એને તરસ્યો, કા પારકો, કા ઉગાડો, કા બિમાર, કા જેલેમાય દેખ્યો, એને તો સેવા નાંય કોઅયી?’

⁴⁵ તોવે આંય જાવાબ દિહી, આંય તુમહાન હાચ્યાં આખડુ કા તુમાહાય યા વાહનામાય વાહના યોકા બી શિષ્યા આરે નાંય કોઅયા, તી મા આરેબી નાંય કોઅયા.

⁴⁶ એને જ્યે ડાબી બાજુ હેતે ચ્યે સાદામાટે અનંત નાશમાય જાય, બાકી ન્યાયી લોક અનંતજીવનામાય પ્રવેશ કોઅરી.”

26

ઈસુવાલ માઆઈ ટાકના આવાડ કોઅતાહા

(માર્ક 14:1-2; લુક. 22:1-2; યોહા. 11:45-53)

¹ જોવે ઈસુય યો બોદો વાતો આખ્યો પાછે, પોતાના શિષ્યહાન આખતો લાગ્યો,

² આમી પાસ્કા સણ એને બેખમીર બાખ્યે સણ બેન દિહયા પાછે સુરુ ઓઅનારો હેય, એને માન, માઅહા પોહાલ હુળીખાંબાવોય ચોડવાહાટી દોઆડી દી.

³ તોવે મુખ્ય યાજક એને લોકહા આગેવાન કાયફા નાંવા મહાયાજકા ગોઆ બાઆપુર યોખઠા જાયા.

⁴ એને ચ્યાહાય મિળીન ઈસુલ અપમાનિત રીતે દોઇન ચ્યાલ માઆઈ ટાકાડના વિચાર કોઅયો.

⁵ બાકી ચ્યા આખે કા, “આપહાન પાસ્કા સણા દિહે એહેકેન નાંય કોઅરા જોજે, કાહાકા લોકહામાય દામાલ ઉસબી જાય.”

ઈસુવોય બોજ કિમત્યા અત્તાર તેલ રેડયા

(માર્ક 14:3-9; યોહા. 12:1-8)

6 એ સમયે ઈસુ બેથાનીયા શેહેરામાય સિમોના ગોઅમે, જ્યાલ ઈસુય કોડા બીમાર્યે માઅને હારો કોઅલો આતો ખાં બોઠેલ.

7 ઓલહામાય ચોક બાય સંગેમરમર દોગડા બોનાવલી ચોક બાટલી લેય ચેની, જ્યેમાય અત્તાર તેલ બોઅલાં આતા, જું ચોખ્ખાં જાટામાસીથી બોનાડલા અત્તાર તેલથી બોઅલાં આતા, એને બાટલ્યે મુયાઈહને તોડી દેના, એને તી ઈસુલ સન્માન દાંહાટી ઈસુ માથાવોય બોદા અત્તાર તેલ રેડી દેના.

8 શિષ્યહાય ઈ દેખ્યાં તોવે ખિજવાઈન બોદા આખા લાગ્યા, અત્તાર કાહા બોગાડયા?

9 ઈ બોજ મોઅગાં વેચાતાં એને ચ્યા પોયહા ગોરીબાહાન વાટી દેવાતા.

10 ઈસુવે ઈ જાઈન આખ્યાં, “તુમા બાયેલ કાય કોઅરા ખીજવાતાહા? એ તે મા હાટી હારાં કામ કોઅયા.

11 કાહાકા ગોરીબ લોક તુમહેપાય કાયામ રોઅનારાજ હેતા બાકી આંય તુમહેઆરે કાયામ નાંય હેતાઉ.

12 એ મા શરીરાવોય જું અત્તાર તેલ રેચવ્યાહા, તી માન દાટાહાટી તિયારી કોઅયી.

13 આંય તુમહાન હાચ્યાં આખતાહાવ કા આખા દુનિયામાય જાં કેસ હારી ખોબાર આખવામાય ચી, તાં એલ્યેય માંહાટી જું કોઅયાહાં, તીં એ યાદગીર્યેહાટી આખવામાય ચી.”

ઈસુવાલ દોઅઇ દેનારો યહૂદા ઇસ્કારીયોત

(માર્ક 14:10-11; લુક. 22:3-6)

14 તોવે યહૂદા ઇસ્કારીયોત જો બાર શિષ્યહા માઅને ચોક શિષ્ય આતો, તો મુખ્ય યાજકાહાપાય ગીયો એને આખ્યાં.

15 એને એ આખ્યાં ચ્યાલ આંય તુમહે કોબજે કોઅઇ દિહી, તુમા માન કાય દાહા? ચ્યાહાય ચ્યાલ તીહી ચાંઘે સિક્કા તોલીન દેય દેના.

16 પાછે તો ઈસુવાલ ચ્યાહા આથામાય દોઆડી દેઅના મોકો હોદતો લાગ્યો.

શિષ્યહાઆરે પાસ્કા સણા છેવાટલા ખાઅના

(માર્ક 14:12-21; લુક. 22:7-14,21-23; યોહા. 13:21-30)

17 “બેન દિહ્યા પાછે, બેખમીર પાસ્કા સણા પેલ્લે દિહે શિષ્યહાય ઈસુવાપાય જાયને આખ્યાં તું આમહાન કેછ દોવાડા માગતોહો કા આમા પાસ્કા ખુશ્યે હાટી ખાઅના તિયાર કોઅજે કા આપા ખાજે?”

18 અ્યે આખ્યાં શેહેરામાય ફલાણા પાય જાયા એને ચ્યાલ આખી દેજા કા ગુરુ આખહે કા, મા દિહી પાહાય યેય પોઅચ્યોહો, તો ગોઆમાય આંય મા શિષ્યહાઆરે પાસ્કા સણા જેવાણ કોઅહી.

19 ઈસુવે આખ્યાં તેહે શિષ્યહાય કોઅયા એને તાં ચ્યાહાય પાસ્કા સણા જેવાણા તિયારી કોઅયી.

20 રુવાળી પોડી, તોવે તો બાર શિષ્યહાઆરે ખાઅના ખાં બોઠો.

21 જોવે ચ્યા ખાત તોવે ચ્યાય આખ્યાં કા આંય તુમહાન હાચ્યી વાત આખતાહાવ તુમહેમાઅનો યોક જાંઆ માન દોઈ દી.

22 જોવે ચ્યા ઈ વાત વોનાયા, ચ્યાહાન બોજ દુઃખ લાગ્યા, એને ચ્યા પાછા-પાછા સાવાલ પુછા લાગ્યા કા, “કાય તો આંય હેતાઉ કા?”

23 અ્યે ચ્યાહાન આખ્યાં જ્યાંય મા થાવ્યેમાય આથ ટાક્યોહો તોજ માન દોઅય દી.

24 આંય, માઅહા પોહો મોઅઇ જાહીં કાહાકા પવિત્રશાસ્ત્રમાય લોખલાં હેય, બાકી ચ્યા માઅહાન બોજ કોઠાણ શિક્ષા ઓરી જો માન દોઅય દાંહાટી મોદાત કોઅહે ચ્યા માઅહાહાટી, જો કાદાં ચ્યાલ જન્મોજ નાંય દેતા તીં હારાં ઓઅતા.

25 તોવે ચ્યાલ દોઅય દેનારો યહૂદાય આખ્યાં, “ઓ ગુરુ, તો આંય હેતાઉ કા?” ઈસુય ચ્યાલ આખ્યાં “તુયે પોતેજ આખી દેના.”

પ્રભુબોજ

(માર્ક 14:22-26; લુક. 22:15-20; 1 કરિ. 11:23-25)

26 જોવે ચ્યા ખાત તોવે, ઈસુવે બાખ્યે ટુકડો લેદો, એને બાખ્યેહાટી પોરમેહેરા આભાર માન્યા એને, મુડીન શિષ્યહાન દેની, એને અ્યે આખ્યાં, “લા એને ખાં, ઈ મા શરીર હેય.”

27 પાછે ઈસુવે દારાખા રોહા પિયાલો લેદો, એને પોરમેહેરા આભાર માનીન તીં ચ્યા શિષ્યહાન દેના, એને ચ્યા બોદહાય ચ્યામાઅને પિદાં.

28 એને ઈસુવે ચ્યાહાન આખ્યાં, “ઓ દારાખા રોહો મા લોય હેય, મા લોય ઘોણા લોકહા પાપહા માફ્યે હાટી વોવાડલાં જાહે, ઓ ચ્યા વાયદા સાબિત કોઅરી જો પોરમેહેર પોતે લોકહાઆરે બોનાવી રિઅલો હેય.

29 આંય તુમહાન હાચ્યાંજ આખતાહાવ કા, ચ્યા પાછે, આંય ચ્યા દિહ્યા લોગુ પાછે કોવેજ દારાખા રોહો નાંય પિયું, જાંઉ લોગુ આંય પોરમેહેરા રાજ્યામાય નોવો દારાખા રોહો નાંય પીયહીં”.

30 તોવે ઈસુ એને ચ્યા શિષ્યહાય પાસ્કા ગીતે આખ્યે એને પોરમેહેરા સ્તુતિ કોઅયી, એને યેરસાલેમ શહેરા બાઆ જાતા રિયા એને જૈતુન ડોગા ઉપે ચાલ પોડ્યા જો પાહાય આતો.

પિત્તરા નાકારના ભવિષ્યવાણી

(માર્ક 14:27-31; લુક. 22:31-34; યોહા. 13:36-38)

31 તોવે ઈસુવે ચ્યાહાન આખ્યાં, તુમા બોદા માન છોડીન નાહી જાહા, જેહેકોય લોખલાં હેય કા, આંય મેંડવાળ્યાહાલ ઠોકીહી એને, ગેટ્ટે ટોળામાઅને વેરગાઈ જાઅરી.

32 બાકી મા મોઅલાહામાઅને જીવી ઉઠના પાછે, આંય તુમહે પેલ્લા ગાલીલ ભાગામાય જાહીં, એને તાં મીળહી.

33 બાકી પિત્તરે ઈસુવાલ આખ્યાં કા, “જેરુ બોદાજ છોડીન નાહી જાય, બાકી આંય તુલ છોડીન નાંય જાંઉ.”

34 ઈસુવે ચ્યાલ આખ્યાં કા આંય તુલ હાચ્યી વાત આખહુ કા આજે રાતી કુકાડ વાહાય ચ્યા પેલ્લા તું તીનદા એહેકેન આખહે કા આંય ચ્યાલ નાંય વોળખું.

35 પિત્તરે આખ્યાં, “એને તોઆરે માન મોરાં બી પોડી, તેરુંબી આંય કોવેજ નાંય આખું કા આંય નાંય વોળખું,” એને યેજપરમાણે બોદા શિષ્યહાય એહેજ આખ્યાં.

ગેતસેમાની બાગમાય ઈસુવા પ્રાર્થના

(માર્ક 14:32-42; લુક. 22:39-46)

36 ચ્યા પાછે ઈસુ ચ્યાહાઆરે ગેતસેમાને નાંવા જાગાવોય યેનો એને ચ્યે શિષ્યહાન આખ્યાં કા તુમા ઈહીં બોહીજા “આંય જાયન પોરમેહેરાલ પ્રાર્થના કોઅહુ.”

37 એને એ પિત્તર જબદી પોહો યાકૂબ એને યોહાન આઆરે ગીયા એને આજુ વાયજ દુર લેઈને ગીયો, એને પાછે તો બોજ દુઃખી એને નિરાશ ઓઅઇ રીયલો આતો.

38 તોવે એ શિષ્યહાન આખ્યાં, “મા જીવ બોજ દુઃખી હેય, ઓહડા લાગહે કા મા જીવ નિંગી જાય: તુમા ઈહીં રિયા એને જાગતા રોજા.”

39 પાછો ઈસુ વાહાયોક દુઉ ગીયો એને મેંડયે પોડયો એને પોતે ચેહેરો દોરત્યેવોય ટેકાડી દેનો એને પ્રાર્થના કોઅરા લાગ્યો, “ઓ પિતા, નોકીજ બોની હોકેત યા દુઃખા પિયાલો માથી દુઉ ઓઅઇ જાય, તેરુંબી જેહેકોય આંય વિચારતાહાવ તેહેકેન નાંય, બાકી જેહેકોય તું વિચારતો તેહેકોયનુજ ઓઅે.”

40 તો પાછો શિષ્યહાપાય યેનો તોવે એ આહાન હુતલા દેખ્યા એને પિત્તરાલ આખ્યાં, “કાય તુમહાન ચોક કલાક બી નાંય જાગતા રોવાયાં?

41 જાગતા એને પ્રાર્થના કોઅતા રા, કા તુમા પરીક્ષામાય નાંય પોડે, તુમહે આત્મા તે હાચ્યાં કોઅરા તિયારી હેય, બાકી શરીર નોબળાં હેય.”

42 આજુ ચોકદા પાછા જાયને એ ઓહડી પ્રાર્થના કોઅયી કા, ઓ મા આબા જોવે વાટકો પિયા વોગાર માયેપાઅને નાંય ઓટી હોકે, તે તું તો મોરજયેકોય ઓઅરા દે.

43 પાછા યેઇન ઈસુય આહાન હુતલા દેખ્યા, કાહાકા આહા ડોળા નિંદે કોઇન બાઆય ગીઅલા આતા.

44 આહાન છોડીન તો પાછો ગીયો, એને તીજ વાત પાછી આખીન, તીજેદા પ્રાર્થના કોઅયી.

45 પાછા શિષ્યહાપાય યેયન એ આહાન આખ્યાં, આજુબી તુમા હુતલાજ રા એને આરામ કોઅતાજ રા, ઓલહાંજ આમી, “એઆ આમી મા સમય યેય ગીઅલો હેય માન, માઅહા પોહાલ પાપી લોકહા આથામાય દેય દી.

46 ઉઠા, ચાલા, એઆ, જો માન દોઅવાડી દાંહાટી મોદાત કોઅઇ રિઅલો હેય, તો આમી યેય રિઅલો હેય.”

ઈસુલ દોઅય લેઅના

(માર્ક 14:43-50; લુક. 22:47-53; યોહા. 18:3-12)

47 એને તો આજુ બોલહે ઓલાહામાયજ, યહૂદા ઇસ્કારીયોત જો બાર શિષ્યહા માઅને ચોક જાંઆ આતો તાં યેનો, આ હાતે બોજ લોક આતા, યા લોક મુખ્ય યાજક એને યહૂદી આગેવાનાહાથી દોવાડલા આતા, યહૂદા હાતે આતા આ લોકહાપાય તારવાયો એને ડૅંગારા લેયને યેના.

48 યહૂદા ઇસ્કારીયોત, જો આલ દોઅવાડી દાંહાટી નિશાણી દેનેલ કા, જ્યાલ આંય પ્રેમ કોય ગુળા દાવ તોજ હેય, આલ દોઓઈ લેજા.

49 યહૂદા ઇસ્કારીયોત યેનો, એને તારાતુજ ઈસુવાપાય જાયને આખ્યાં, “ઓ ગુરુ, સલામ” એને ચે આલ બોજ ગુળા દેના.

50 ઈસુવે આલ આખ્યાં, “ઓ હાંગાત્યા, જું કામ કોઅરાહાટી તું ઈહીં યેનો, તી કોઅઇ લે” તોવે આ લોકહાય ઈસુવાપાય યેયન આલ દોઅય લેદો.

51 એને એએ ઈસુવા હાંગાત્યા માઅને ચોક શિષ્યે આથ લાંબો કોઇન તારવાય કાડી એને મહાયાજકા ચાકારા ઉપે ચાલાડી એને આ કાન કાપી ટાક્યો.

52 તોવે ઈસુવે આલ આખ્યાં, તો તારવાય આ જાગે પાછી થોવી લે, કાહાકા તારવાય ચાલાડનારા હેય, આ બોદા તારવાયે કોઇન મોઅઇ જાય.

53 કાય તું નાંય હોમજે, તો જોવે આંય મા આબાપાય માગુ તોવે તારાત તો હોરગા દૂતા બાર સૈન્યા કોઅતા વોદારે સૈન્યા ટોળો નાંય દોવાડે કા?

54 બાકી જોવે પવિત્રશાસ્ત્રા વાતો કેહેકેન પુરાં ઓઅઇ, જ્યામાય લોખલાં હેય કા ઈ બોદા યેજપરમાણે તી પુરાં ઓરા જોજે?

55 ઈસુવે આહાન આખ્યાં, “કાય તુમા માન ડાખૂ હોમજીન દોઓરાં હાટી તારવાય એને ડૅંગારા લેઈને યેનાહા કા? એને આયતે દિને દેવાળામાય તુમહેઆરે રોઇન હિકાડૂ, તેરુ તુમાહાય માન નાંય દોઅયેલ.

56 બાકી ઈ યાહાટી ઓઅયા કા, ભવિષ્યવક્તાહા લોખલાં હેય તી પુરાં ઓઅઇ જાય.” એને તોવે બોદા શિષ્ય આલ છોડીન નાહી ગીયા.

મુખ્ય યાજકા હામ્મે ઈસુ

(માર્ક 14:53-65; લુક. 22:54-55,63-71; યોહા. 18:13-

14,19-24)

57 બાકી ઈસુવાલ દોઇન ચ્યા ચ્યાલ કાયફા નાંવા મહાયાજકાપાય લેય ગીયા, તાં મૂસા નિયમ હિકાડનારા ગુરુ એને આગેવાન યોખઠા ઓઅલા આતા.

58 પિત્તર દુઉ લોગુ ચ્યા પાહલા-પાહલા મહાયાજકા ગોઆ બાઆપુર લોગુ ગીયો, એને માજા જાયન કાય ઉસબે તી એરા ચાકારા આરે બોહી ગીયો.

59 મુખ્ય ચાજક એને બોદયે સોબા યેય ઈસુવાલ માઆઇ ટાકાડાંહાટી ઈસુવા વિરુદ્ધમાય સાબિતી હોદેત,

60 બાકી બોજ જુઠા સાક્ષી યેના તેરુ ચોકબી નાંય જોડી, સેલ્લે બેન સાક્ષી યેના.

61 “ચ્યાહાન આખ્યાં કા એલે એહેકેન આખ્યેલ કા પોરમેહેરા દેવાળાલ તોડી પાડહી એને તીન દિહીહયામાય આંય તી બાંદી હોકીહી.”

62 તોવે મહાયાજકે બોદહા વોચમાય ઉબા રોઇન ઈસુવાલ પુછ્યાં, “કાહા તું જાવાબ નાંય દેય? યા લોક તો વિરુદ્ધમાય કાય સાક્ષી દેતાહા?”

63 બાકી ઈસુ ઠાવકોજ રિયો, તોવે મહાયાજકાય ચ્યાલ આખ્યાં “આંય તુલ જીવતા પોરમેહેરા નાંવે કોસામ આખતાહાવ, આમહાન જાવાબ દે તું પોરમેહેરા પોહી ખ્રિસ્ત હેતો કા?”

64 ઈસુવે ચ્યાહાન આખ્યાં, “તુયે હાચ્યાં આખ્યાં, બાકી આંય આખતાહાવ કા આમી પાછે તુમા માઅહા પોહાલ બોજ સામર્થ હાતે પોરમેહેરા જમણી એછે બોઠલો એઅહા એને આકાશા વાદળામાઅરે યેતો એઅહા.”

65 તોવે મહાયાજક વોનાયોકા ઈસુય કાય આખ્યાં, તોવે મુખ્ય ચાજક ચ્યા પોતેજ ફાડકે ફાડી ટાક્યે એને બોજ ખિજવાય ગીયો એને આખ્યાં કા, “આમી આપહાન બિજા સાક્ષીદારા જરુર નાંય હેય, તુમા ચ્યાલ પોરમેહેરા નિંદા કોઅતા વોનાયાહા.”

66 આમી તુમહે કાય આખના હેય? ચ્યા બોદા યે વાતે સહમત આતા કા ઈસુ ગુનેગાર હેય એને મોઅરા લાયકે હેય.

67 તોવે ચ્યાહાય ચ્યા મુંચા ઉપે થુખ્યાં, એને ચ્યા મુંચ ડાકીન ઠોકાં લાગ્યા.

68 એને એહેકેન આખીન ચ્યા મશ્કરી કોઅયી, “ઓ ખ્રિસ્ત, જોવે તું ચોક ભવિષ્યવક્તો હેય તે આમહાન આખ કા તુલ કુંયે ઠોક્યાં?” એને ચાકારાહાય ચ્યાલ દોઇન થાપડાહાકોંય ઠોક્યાં.

પિત્તરા ઈસુવાલ નાકાર કોઅના

(માર્ક 14:66-72; લુક. 22:56-62; યોહા. 18:15-18,25-27)

69 પિત્તર બાઆપુર બોઠલો આતો તોવે ચોક દાસી ચ્યા પાહાય ચેયન આખ્યાં તુંબી ગાલીલ ભાગા માઅહું ઈસુવાઆરે આતો.

70 બાકી તો બોદહા દેખતા નાંચ માના લાગ્યો એને ચ્યે આખ્યાં તું કાય આખતીહી તી આંચ નાંચ જાઅઉ.

71 એને જોવે તો દોરવાજા એછે જાં લાગ્યો તોવે ચોક બીજી દાસીય ચ્યાલ દેખ્યો એને તાં ઉબા રિઅલાહામાઅને આખ્યાં “એલો નાજરેત ગાવા ઈસુવાઆરે આતો.”

72 એને તો પાછો નાંચ માનતો લાગ્યો એને કોસામ ખાયન આખ્યાં, “આંચ ચ્યા માઅહાન બિલકુલ નાંચ વોળખું.

73 થોડી વાઆમાય તાં ઉબા રીઅલા માઅહાય ચેયન પિત્તરાલ આખ્યાં નોક્કી તું હોગો ચ્યા માઅનોજ હેતો, તો બોલી હોગી તુલ દેખાડી દેહે.”

74 તોવે પિત્તર હારાપ દાં લાગ્યો એને કોસામ ખાયન આખતો લાગ્યો કા, “આંચ એલા માઅહાન નાંચ વોળખું, જ્યા માઅહા બારામાય તુમા વાત કોઅતાહા.” તોવે ચ્યેજ ગેડયે કુકાડ વાહાયો.

75 તોવે ચ્યેજ ગેડયે કુકાડ બીજાદા વાહાયો એને પિત્તરાલ ઈસુવા આખલી વાત યાદ ચેની, “કુકાડ વાહાયી ચ્યા પેલ્લા તું માન તીનદા નાકાર કોઅઇ દેહે કા તું માન નાંચ વોળખે” એને તોવે પિત્તર ચ્યા પોતે દુઃખાલ તાબામાંચ નાંચ કોઅઇ હોક્યો એને તો હુંઅકા ટાકીન રોડાં લાગ્યો.

27

પિલાતા હામ્મે ઈસુ

(માર્ક 15:1; લુક. 22:66-71)

1 જોવે ઉજાળાં ઓઅઇ ગીયા, તોવે મુખ્ય યાજકેં એને આગેવાન લોકહાય ઈસુવાલ માઆઇ ટાકના નોક્કી કોઅયા.

2 એને ચ્યાહાય ચ્યાલ બાંધો એને ચ્યાલ પારખાંહાટી રાજ્યપાલ પિલાતા મેહેલામાય લેય ગીયા.

યહૂદા ઇસ્કારીયોતા આત્મહત્યા

3 જોવે ચ્યાલ દોઅય દેવાડનારા યહૂદા ઇસ્કારિયોતાલ માલુમ જાયા કા ઈસુ મોઅરાંહાટી ગુનેગાર હેય, તો ચ્યાલ પોસ્તાવો જાયો એને તીહી ચાંદે સીક્કાહાન મુખ્ય યાજકાપાંચ એને આગેવાનાહાપાયને ફેરવી લેય યેનો.

4 એને એહેકેન આખ્યાં, કા “માયેતે ગુના વોગાર માઅહાન માઆહાટી દોઅોવાડીન પાપ કોઅયાહાં” ચ્યાહાય આખ્યાં, આમહાન ચ્યા પારવા નાંચ હેય, યા તું જાવાબદાર હેય.

5 તોવે તો ચ્યા સીક્કાહાન દેવાળા બાઆમાય ટાકી દેયન જાતો રિયો, એને પાછે બાઆ જાયને ચ્યે પોતે ફાસી લાવી લેદી.

6 મુખ્ય યાજકાંચ ચ્યા સિક્કા લેઈને આખ્યાં, “ચાહાન, ભંડાર માય થોવના નિયમશાસ્ત્ર આપહાન પોરવાનગી નાંચ દેય, કાહાકા યા કાદાલ માઆઇ ટાકના કાંબારાં હેય.”

7 તોવે ચ્યાહાય વિચાર કોઇન ચ્યા પોયહા ચોક કુંબાડા રાન વેચાતાં લેદા, તીં પારદેશીયાહા માહણા હાટી.

8 યાહાટી આજુ લોગુ ચ્યા રાનાલ “લોયા રાન” આખતેહે.

9 તોવે યિર્મયા ભવિષ્યવક્તા આખલા તી વચન પુરાં ઓઅઇ ગીયા: ચ્યે ચ્યા તીહી સીક્કાહાન ચ્યે નોક્કી કોઅયેલ તી કિંમાત લેય લેદી, જ્યાહાય ઈસરાયેલ દેશા પોહાહાય એને આજુ બોજ જાઅહાય કિંમાત નોક્કી કોઅયી.

10 એને જેહેકોય પ્રભુવે માન આગના કોઅયેલ, ચ્યે પરમાણે ચ્યાહાય ચ્યા કુંબાડા રાનાહાટી ચ્યા પોયહા દેય દેના.

પિલાતુસા ઈસુવાલ સાવાલ

(માર્ક 15:2-5; લુક. 23:3-5; યોહા. 18:33-38)

11 જોવે ઈસુ પિલાત રાજા હામ્મે ઉબો આતો, તોવે ચ્યા રાજાય ચ્યાલ એહેકેન પુછ્યાં, કા “કાય તું યહૂદીયાહા રાજા હેતો કા?” ઈસુવે ચ્યાલ આખ્યાં, “તું પોતેજ ઈ આખી રિયહો.”

12 જોવે મુખ્ય યાજક એને આગેવાન ચ્યાવોય દોષ લાવી રીઅલા આતા, તોવે ચ્યે કાંઇજ જાવાબ નાંચ દેનો.

13 તોવે પિલાતે ચ્યાલ આખ્યાં, “એલા તો વિરુદ્ધમાય ઈ બોદા આખી રીયહા, તી તું નાંચ વોનાયે કા?”

14 બાકી ચ્યે ચ્યાલ ચોકબી વાતે જાવાબ નાંચ દેનો, યે વાતે વોય પિલાત રાજાલ મોઠી નોવાય લાગી.

ઈસુવાલ છોડાહાટી પિલાત અસફળ

(માર્ક 15:2-5; લુક. 23:3-5; યોહા. 18:33-38)

15 પિલાત રાજા ઓહડી રીત આતી કા ચ્યા પાસ્કા સણામાય લોક જ્યા કૈદાલ માગતે આર્તે, ચ્યાલ ચ્યાહાહાટી છોડી દેતા આતા.

16 ચ્યે સમયે બારાબ્બાસ નાંવા ચોક માઅહું આતા, તો બિજા કૈદાહા આરે જેલેમાય આતો.

17 જોવે લોક ટોળો જાયા, તોવે પિલાતે ચ્યાહાન આખ્યાં, “તુમા કાય આખતાહા તીં આંચ તુમહેહાટી કાલ છોડી દાવ? બારાબ્બાસાલ, કા પાછે ઈસુવાલ જો ખ્રિસ્ત આખાયેહે?”

18 કાહાકા પિલાત રાજાલ ખોબાર આતી કા મુખ્ય યાજકાહાય ઈસુલ ઓદ્રાયેકોય દોઅવાડી દેનેલ.

19 જોવે તો ન્યાય કોઆહાટી ખુરચ્ચેવોય બોઠો, તોવે ઓલહામાય ચ્યા થેઅયે ચ્યાલ આખા દોવાડયા કા, “તું એલા ન્યાયી વોચમાય કાય મા કોઅતો, કાહાકા માયે આજે હોપનામાય એલા બારામાય બોજ દુઃખ વેઠયાહા.”

20 મુખ્ય યાજક એને આગેવાન લોકહાન એહેકેન હોમજાડયા કા બારાબ્બાસાલ માગી લેઅના, એને ઈસુવાલ માઆઈ ટાકાડના.

21 પિલાત રાજાય ચ્યાહાન પુછ્યાં કા, “યા બેન્યાહા માઅને તુમા કાલ માગતાહા કા ચ્યાલ આંચ તુમહેહાટી છોડી દાંઉ?” તોવે ચ્યાહાય આખ્યાં, “બારાબ્બાસાલ.”

22 પિલાત રાજાય આહાન પુછ્યાં, “તોવે જ્યાલ તુમા ખ્રિસ્ત આખતેહે આ ઈસુવાલ કાય કોઅઉ?” આ બોદહાય આખ્યાં, “આલ હુળીખાંબે ચોડવી દિયા.”

23 પિલાત રાજાય આખ્યાં, કા “કોહડા હાટી, એલે કાય ગુનો કોઅયોહો?” બાકી આ પાછા જોરમાય બોંબાલતા લાગ્યા કા, “એલાલ હુળીખાંબે ચોડવી દિયા.”

24 પિલાતે એઅયા કા, આથી કાયજ નાંચ ઓઈ હોક્યા, ઉલટાં વિરુદ્ધ વોદતાંજ જાય, તોવે એ પાઆય લેઈને લોકહા દેખતે આથ દોવ્યા, એને આખ્યાં, “આંચ એલા ન્યાયી માઅહાલ માઆઇ ટાકનાથી નિર્દોષ હેતાઉ, તુમાંજ આ જિમ્મેદાર હેય.”

25 બોદા લોકહાય જાવાબ દેનો, “એલા લોચ આમહેવોચ એને આમહે પાહાહાવોચ ઓઅઇ.”

ઈસુલ હુળીખાંબાવોચ ચોડવાહાટી હોઅપના

26 તોવે પિલાતે લોકહાન રાજી કોઅરાહાટી, બારાબ્બાસાલ આહાહાટી છોડી દેનો, એને ઈસુવાલ ચાપકાહા માર દેવાડીન રોમી સીપાડાહાલ હોઅપી દેનો, કા એ આલ હુળીખાંબાવોચ ચોડવી દેય.

ઈસુવા ટોલપીવોચ કાટહા ટોપી થોવી

(માર્ક 15:16-20; યોહા. 19:2-3)

27 તોવે પિલાત રાજા સીપાડા ઈસુવાલ મેહેલા આંદાર બાઅવામાય લેય ગીયા તીં ઠિકાણ પ્રીટોરિયુમ નાંવે કોઇન વોળખાયેહે, એને બોદયે ટુકડયેલ હાદી લેય યેના, લગભગ છઃછો સીપાડા આતા.

28 આહાય આ ફાડકે કાડી લેદે એને ચોક લાલ ડોગલાં પોવાડયા.

29 એને કાટાહા ટોપી વીઈન આ ટોલપીવોચ થોવી, એને આ જમણા આથામાય ચોક લાકડી દેની પાછે માંડયે પોડીન, આ મશ્કરી કોઇન આખતા લાગ્યા કા, “ઓ યહૂદીયાહા રાજા, સલામ.”

30 એને આ ઉપે થુપ્યાં, એને લાકડી લેઈને આલ ઠોકતા લાગ્યા.

31 જોવે આહાય આ મશ્કરી પુરી કોઅયા પાછે, આ ઉપને આહાય ડોગલાં કાડી લેદા એને આજ ફાડકે આલ પોવાડયે, એને પાછે આલ હુળીખાંબા ઉપે ચોડવાહાટી શેહેરા બાઆ લેય ગીયા.

ઈસુવાલ હુળીખાંબાવોય ચોડાવના

(માર્ક 15:21-32; લુક. 23:26-39; યોહા. 19:17-19)

32 જોવે ચ્યા શેહેરા બાઆ જાય રીયલા આતા, તે સિમોન નાંવા ચોક માટડો ગાવા ભાગામાઅને યેરૂસાલેમ શેહેરામાય યી રિઅલો આતો. સિમોન કુરેની ગાવામાઅનો આતો, એને તો સિકંદર એને રૂફસા આબહો આતો, સીપાડાહાય ચ્યાલ આખ્યાં કા તો હુળીખાંબલીન ચ્યા જાગા હુદુ લેય જાય જાં ચ્યા ઈસુલ હુળીખાંબાવોય ચોડાવનારા આતા.

33 જોવે ચ્યા ગુલગથા નાંવ્યા (મોતલાબ-ખોપરીયે જાગો) એહેકેન આખાયેહે તાં યેનો,

34 ચ્યાહાય ચ્યાલ માણા બેખાળલો દારાખા રોહો પિયાં દેનો, બાકી અ્યેચ ચ્યાલ વાહાયોક ચાખ્યાં પાછે નાંય પિદાં.

35 તોવે ચ્યાહાય ચ્યાલ હુળીખાંબાવોય ચોડવી દેનો, એને ચ્યા ફાડકે ચીઠયો ટાકીન વાટી લેદે.

36 એને તાં બોહીન ચ્યા રાખવાળી કોઆ લાગ્યા.

37 સીપાડાહાય ઈસુ ટોલપા વાહાયોક ઉચે ચોક દોષા પાટી લાવી દેની, ચ્યામાય એહેકેન લિખલાં આતા, “યહૂદીયાહા રાજા ઈસુ હેય.”

38 તોવે ચ્યાઆરે બેન બાંડ હુળીખાંબે ચોડવી દેના, ચોકાલ ચ્યા જમણે એછે એને બિજાલ ચ્યા ડાબે એછે.

39 એને વાટે જાતે માઅહે ટોલપા આલવી-આલવીન એહેકેન આખીન ચ્યા નિંદા કોઅેત કા,

40 “એરે, દેવાળાલ પાડી ટાકનારા, એને તીન દિહાહામાય ચ્યાલ પાછા બોનાવનારા, તો પોતાનેજ બોચાવ કોઅઅ લે જોવે તું પોરમેહેરા પોહો ઓરીતે, હુળીખાંબા ઉપને ઉતી પોડ.”

41 જેજપરમાણે મુખ્ય યાજકબી, મૂસા નિયમ હિકાડનારા ગુરુ એને આગેવાનાહાઆરે મશ્કરી કોઅઈન આખે કા,

42 એલે બીજહાન બોચાવ્યા, બાકી પોતેજ પોતાલ બોચાવી નાંય હોકે. ઓ માઅહું જો ઈસરાયેલ દેશા ખ્રિસ્ત એને રાજા, ઓઅરા માગતો આતો આમી હુળીખાંબાવોયને ઉતી યે, કા આમા એછ હોકજે એને તોવોય બોરહો કોઅઅ હોકજે કા ઓજ આમે રાજા હેય.

43 એલે પોરમેહેરા બોરહો રાખ્યોહો, જોવે પોરમેહેર ચ્યાલ માગહે,

તોવે ચ્યાલ આમી બોચાવી લેય, કાહાકા એલોજ આખે કા, “આંય પોરમેહેરા પોહો હેતાઉ.”

44 યેજપરમાણે ચ્યાઆરે જ્યા બાંડ હુળીખાંબાવોય ચોડાવલા આતા ચ્યાહાય બી ચ્યા નિંદા કોઅયી.

ઈસુવે જીવ ટાક્યો

(માર્ક 15:33-41; લુક. 23:44-49; યોહા. 19:28-30)

45 બોપરેહે પાછે બોદા દેશામાય આંદારાં ઓઅઇ ગીયા, એને તીં તીન વાગ્યા લોગુ રિયા.

46 તીન વાગે લગભગ, ઈસુવે મોઠેરે બોંબલીન આખ્યાં કા, “એલોઈ, એલોઈ, લમા શબ્કથની?” એટલે, “ઓ મા પોરમેહેર, ઓ મા પોરમેહેર, તુયે માન કાહા છોડી દેનોહો?”

47 ચા લોકહામાંઅરે કોલહાક લોક જ્યા તાં ઉબા આતા, ચ્યા વોનાયા બાકી ચ્યા જુઠી રીતે હોમજ્યા એને ચોકાબીજાલ આખ્યાં, “વોનાયા, તો ભવિષ્યવક્તા એલીયાલ હોરગામાઅને પોતે મોદાત કોઅરાહાટી હાદી રિઅલો હેય.”

48 એને ચ્યા માઅહા માઅને ચોક માઅહું દાંહાદી ગીયા, ચોક પોંચ લેદો, એને ચ્યાલ ખાટામાય બુડવી દેના, એને વાતડયે લાકડયેઉપે બાંદિન ચ્યાલ ચુહૂરાં દેના.

49 બાકી બીજહાંય આખ્યાં, કા “રુકાય જો, આપા એઅતા, એલીયો ચ્યાલ બોચાવાં હાટી યેહે કા નાંય.”

50 તોવે ઈસુ મોઠેરે બોંબલ્યો એને મોઅઇ ગીયો.

51 એને તો મોઠો પોડદો જો દેવાળામાય લોટકાડલો આતો, જો બોદહાલ પોરમેહેરા હજર્યેમાય જાંહાટી રોકતો આતો, ઉપેરે તે નિયે લોગુ બેન ભાગ ઓઅઇન ફાટી ગીયો.

52 માહાણોં ઉગડી ગીયે, એને મોઅોઈ ગીઅલા પવિત્ર લોકહા બોજ કુડયો પાછયો જીવત્યો ઉઠયો.

53 ઈસુ મોઅલા માઅને પાછા જીવી ઉઠના પાછે ચ્યા માહાણા માઅને નિંગીન પવિત્ર નગરામાય ગીયા, એને બોજ લોકહાન દેખાયાં.

54 બાકી જોમાદાર એને ચ્યાઆરે જ્યે ઈસુવા રાખવાળી કોએત, એ દોરત્યેવોય એને જું બોન્યાં તીં એઇન આખતે લાગ્યે, “હાચ્યાં હેય કા ઓ માઅહું પોરમેહેરા પોહો આતો.”

55 બોજ થેએયો, જ્યો ઈસુવા ચાકરી કોઅરાહાટી ગાલીલ ભાગામાઅને ચ્યા પાહલા ચાલત્યો યેનલ્યો, ચ્યો દુઉ રોયન ઈ એઅચા કોએત.

56 ચા ટોળામાય મરિયાબી આતી જું મગદલા નાંવા શેહેરામાઅને આતી, એને ચાફૂબ એને યોસેસા આચહો મરિયમ એને જબદયા પાહાહા આચહો આતી.

ઈસુલ માહણામાય ડાટી દેયના

(માર્ક 15:42-47; લુક. 23:50-56; યોહા. 19:38-42)

57 દિહી બુડી ગીયો પાછે યોસેફ નાંવ્યો અરીમતિયા શેહેરા ચોક માલદાર માઅહું યેના, તો હોગો ઈસુવા શિષ્ય આતો, યેનો.

58 તો પિલાતાપાંચ ગીયો, એને ઈસુવા કુડી માગી એને તી પિલાતે દેય દેઅના આગના કોઅચી,

59 એને યોસેફ કુડી લેઈને ચ્યેલ હારાં ફાડકામાય ચોંડાળી લેદા.

60 એને ખોલકડામાય ખોદલા ચ્યા પોતા નાંવા ચોક નોવા માહાણા આતા ચ્યામાય ડાટી દેના, એને માહાણા મુંચાવોય ચ્યે ચોક મોઠો દોગાડ કોથલાડીન જાતો રિયો.

61 એને મરિયાબી આતી જું મગદલા નાંવા શેહેરામાઅને આતી એને તી બીજી મરિયમ તાં કોબારે હુમ્મે બોહી ગીયી.

માહાણા રાખવાળી કોઅના

62 બીજે દિહી, તો જો તિયારી દિહ્યે, મુખ્ય ચાજક એને પોરૂષી લોક પિલાત રાજાલ મિળાં ગીયા.

63 ચ્યાહાય આખ્યાં “ઓ માલિક, આમહાન યાદ હેય, કા એલો ઠોગ આજુ જીવતો આતો તોવેજ ચ્યે એહેકેન આખ્યેલ કા આંચ મા મોઅના તીન દિહા પાછે, પાછો જીવી ઉઠહી.

64 ચ્યાહાટી તીજા દિહી લોગુ તું માહાણા રાખવાળી કોઅના આગના કોઓ, કાહાકા એહેકેન કા ચ્યા શિષ્ય યેઇન મુરદાં લેઈને નાહી પોડે, એને

લોકહાન આખા લાગી કા, ‘તો તે મોઅલા માઅને જીવી ઉઠયોહો,’ નેતે પેલ્લા દોંગા કોઅતો આમી વોદારી દોંગો ઓઅરી.”

65 પિલાત રાજાય આહાન એહેકેન આખ્યાં, “તુમહેપાય તે રાખવાળ્યા હેય તે જાયા, તુમહાન ફાવે તેહે રાખવાળી કોઅયા.”

66 તોવે આ રાખવાળ્યાહાન આરે લેઈને કોબારેપાય લી ગીયા, એને કોબારેવોય થોવલા દોગાડાવોય નિશાણી લાવી દેની કા દોગડાલ કાદો નાંય ઓટાડે, પાછે આ સિપાડાહાન રાખવાળી કોઅરા છોડી ગીયા.

28

ઈસુ જીવી ઉઠના

(માર્ક 16:1-8; લુક. 24:1-12; યોહા. 20:1-10)

1 વોખાતેહે જોવે આરામા દિહી પુરો ઓઅઈ ગીયો તોવે આઠવાડ્યા પેલ્લે દિહી ઉજાળાં ઓઅતાંજ, મરિયમ જું મગદલા નાંવા શેહેરામાઅને આતી, એને બીજી મરિયમ માહણાલ એરા ચેન્યો.

2 તોવે યોક મોઠો દોરતીકપ ઓઅયો, કાહાકા પ્રભુ યોક દૂત હોરગામાઅને ઉત્યો, એને પાહી ચેઈન દોગડાલ હોરકાવી દેનો, એને તો આવોય બોઠો.

3 આ રુપ વીજે હારખા એને આ ફાડકે બરફા હારકે ઉજળે આતે.

4 એને આ ઘાકા કોઅઈ રાખવાળ્યા કાપી ઉઠયા, એને મોઅલા માઅહા રોકા ઓઅઈ ગીયા.

5 હોરગા દૂતહાય બાઈહેલ આખ્યાં, “બીયહા મા, આંય જાંઅહું કા તુમા ઈસુવાલ જો હુળીખાંબાવોય ચોડાવામાય ચેનેલ આલ હોદત્યોહો.

6 તો ઈહીં નાંય હેય, બાકી પોતાના વચના ઇસાબે પાછો જીવી ઉઠયોહો, એને તો જાગો એઆ, જાં પ્રભુલ થોવ્યેલ.

7 એને જલદી જાયન આ શિષ્યહાન આખા કા તો મોઅલા માઅને પાછો જીવી ઉઠયોહો, એને તો તુમહે પેલ્લા ગાલીલ ભાગામાય જાહે, તાં તુમા આલ એઅહા, એઆ, માયે તુમહાન આખી દેનહા.”

8 આ બીઈન મોઠા આનંદા હાતે કોબારથી જલદીથી જાયને આ શિષ્યહાન ખોબાર દાંહાટી દાંહાદી ગીયો.

9 તોવે, ઈસુ ચ્યેહેન મિળ્યો એને આખ્યાં, “સુખી રા” એને ચ્યેહેય આ પાહી જાયને એને આ પાગ દોઈન આ પાગે પોડયો.

10 તોવે ઈસુવે એહેન આખ્યાં, “મા બીયહા, મા શિષ્યહાન જાયન આખા કા ગાલીલ ભાગામાય જાય તાં માન દેખી.”

રાખવાવ્યાહા સાક્ષી

(માર્ક 16:14-18; લુક. 24:36-49; યોહા. 20:19-23)

11 એ શિષ્યહાન ખોબાર કોઅરાહાટી જાઈજ રિઅલ્યો આત્યો, કા જ્યા સીપાડા કોબારે ઈહીં રાખવાળી કોએત ય્યાહામાઅને વોછાહાય શેરમાય યેઇન બોદો વાતો મુખ્ય યાજકાહાલ આખ્યાં.

12 મુખ્ય યાજકાહાય આગેવાનાહાઆરે ચોકઠા ઓઇન યુક્તિ કોઅયી એને રાખવાવ્યાહાન બોજ પોયહા દેયને આખ્યાં.

13 “લોકહાન એહેકેન આખજા કા ઈસુ મોઅલા માઅને જીવતો નાંય જાયહો, બાકી રાતી જોવે આમા હૂવી ગીયલા, તોવે ય્યા શિષ્ય યેયન ય્યા શરીર ચોરી લેય ગીયા.

14 એને તુમા હૂવી ગીયલા આતા, એહેકેન રાજ્યપાલાલ માલુમ ઓઅઇ જાય, તોવે આમા ય્યાલ હાંબાળી લાહુ, આમા તુમહાલ વાચાડી લાહુ.”

15 એને ય્યાહાય પોયહા લેયને જેહેકોય હિકાડવામાય યેનેલ, તેહેજ કોઅયેલ, એને ઈવાત આજેલોગુ યહૂદી લોક એહેકેન માનતાહા કા ઈસુ મોઅલા માઅને જીવતો નાંય જાયલો હેય.

શિષ્યહાન દર્શન એને છેલ્લી આગના

(માર્ક 16:15-18)

16 ઓગ્યાર શિષ્ય ગાલીલ ભાગામાય ય્યા ડોગાવોય ગીયા, જાં જાંહાટી ઈસુ ય્યાહાન આખલા.

17 ય્યાહાય ય્યા દર્શન કોઇન ય્યાલ ભક્તિ કોઅયી, બાકી કાદા કાદાલ શંકા ઓઅયી કા તો હાચ્યોજ જીવતો ઓઅઇ ગીયહો.

18 ઈસુય ય્યાહા પાહી યેયન આખ્યાં, “હોરગા એને દોરતી બોદો ઓદિકાર માન દેવામાય યેનહો.”

19 યાહાટી તુમા જાં, બોદી જાત્યે લોકહાન શિષ્ય બોનાડા, એને પિતા, એને પુત્ર, એને પવિત્ર આત્મા નાવાકોય ય્યાહાન બાપતિસ્મા દા,

20 એને ચ્ચાહાન બોધો વાતો જયો માયે તુમાહાલ આગના દેનહી, ચ્ચો માનના હીકાડા: એને યાદ રાખા, આંચ દુનિયા છેલ્લે લોગુ તુમહેઆરે હેય.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d